

MATEO REMBICUACHIA JESUS RECOCUER RESENDAR

SAN MATEO

Ava eta oyesu vahe Jesucristo yesu renondeve

1 ¹Co yipindar Jesucristo renondeve yuvirecoi vahe aracahe Abraham suindar, mborerecuar guasu David suindar avei:

²Abraham rahir Isaac, Isaac rahir evocoyase Jacob, ipare Jacob rahir ahe Judá ambuae tiqehir, tivireta reseve. ³Judá rahir yuvirecoi Fares iyavei Zara (ahe ichi rer Tamar). Fares rahir Esrom, Esrom rahir evocoyase Aram. ⁴Aram rahir Aminadab, Aminadab rahir Naasón, Naasón rahir evocoyase Salmón, ⁵Salmón rahir Booz (ahe ichi rer Rahab). Booz rahir Obed (ahe ichi rer Rut), Obed rahir Isaí, ⁶Isaí rahir mborerecuar guasu David, David rahir evocoyase Salomón, Urías rebirecocuer pipe oyesu vahe.

⁷Salomón rahir Roboam, Roboam rahir Abías, Abías rahir Asa. ⁸Asa rahir Josafat, Josafat rahir Joram, Joram rahir evocoyase Uzías. ⁹Uzías rahir Jotam, Jotam rahir Acáz, Acáz rahir ahe Ezequías. ¹⁰Ezequías rahir Manasés, Manasés rahir Amón, Amón rahir evocoyase Josías. ¹¹Josías rahir Jeconías tivireta reseve, Babilonia ve mbiguai yuvirecoi vahecuer.

¹²Mbiguai yuvirecoire Jeconías omboyesu Salatiel, Salatiel rahir ahe Zorobabel. ¹³Zorobabel rahir Abiud, Abiud rahir ahe Eliaquim, Eliaquim rahir evocoyase Azor. ¹⁴Azor rahir Sadoc, Sadoc rahir ahe Aquim, Aquim rahir evocoyase Eliud. ¹⁵Eliud rahir Eleazar, Eleazar rahir ahe Matán, Matán rahir evocoyase Jacob. ¹⁶Jacob rahir José, María mer, María evocoyase Jesús si seci. Ahe imembri Tüpa Rembiporavo Poropisrosar.

¹⁷Evocoiyase Abraham yesusa sui tupri oyepota oso David yesusa rupive. Ahe catorce yesu yoapi agüer. David reco agüer sui oyepota oso ava mbiguai sereco agüer pipe Babilonia ve; ahe omomba avei catorce yesu yoapi agüer. Mbiguai ava serecosa sui oyepota araviter Poropĩsirosar haragüer rupi, ahe omomba iri avei ambuaec catorce yesu yoapi agüer.

Jesucristo yesu agüer

¹⁸Na ehi Jesucristo oyesu aracahe. María, ichi, ahe omenda pota vahe José rese. Oyese yuvirecoiēhi viteseve rumo, Espíritu Santo pĩratasa pipe imembi. ¹⁹Evocoiyase José, imevi, ahe ava seco catupri vahe, “Tapoiño ayase ava icuaēhisa pipe che remimbotar rupi ichui” ehi chupe viña ‘co rupi tarecomegua eme co cuñatai rer aviye vahe’ ohesa pipe. ²⁰Aipo opĩhañemoñeta reseve oque. Iquerve rumo, Tũpa rembiguai oyemboyecua chupe aipo ehi: “José, David suindar, eresiquiyei rene María rese nde menda āgua. Esepia, Espíritu Santo sui ou imembirã. ²¹María virecose omembri, pemondora sererguã Jesús. Esepia, ahe oipĩsirora omu judío eta yangaipa sui” ehi.

²²Co rupi opa yaviye yande Yar remimombehugüer aipo ehi vahecuer iñehe mombehusar aracahe:

²³“Cuña ndaseco marai vahe imembira.

Ahe imembri rer-ra Emanuel” ehi
(“Tũpa yande rese ité secoi’ oya aipo ehi).

²⁴Omahese José, Tũpa rembiguai oyeupe ñehe agüer omboyeroya ité. Ichui omenda María rese cute. ²⁵Ndoyapo vitei eté rumo mbahe oyese yuvireco. Yipindar imembira rane ité, ahese José omondo Jesús sererguã.

Ava yasitata rese oyembohe vahe ari sēsa cotindar yuviraso pĩtani repia

2 ¹Herodes mborerecuar guasu recose, Jesús oha Judea ivi rupi tecua Belén ve. Coiye yugüeru ava yasitata rese oyembohe vahe ari sēsa coti sui Jerusalén ve. ²Ahe oporandu Herodes upe yuvireco aipo ehi:

—¿Que vo aipo oha judío rerecuar guasu? Esepia niha, caharu coti yasitata orosepia. Sese oroyu ari sēsa coti sui imboetei āgua —ehi yuvireco chupe.

³Aipo ihese, mborerecuar Herodes oyembosiquiye tēi, ava Jerusalén pendar avei ēgüe ehi pāve yuvireco. ⁴Iyavei cūrteimi opa omonuha uca pahi rerecuareta, Moisés porocuita rese oporombohe vahe avei. Ipare oporandu chupe:

—¿Que vo aipo ohara Poropīsirosar? —ehi.

⁵Ahe omboyevi yuvireco chupe:

—Ahe ohara Judea rupi Belén ve —ehi—. Esepia, Tūpa ñehe mombehusar Miqueas rembicuachiagüer pipe aipo ehi:

⁶‘Pe, tecua mini Belén pīpendar, ndahei ivi coti tēi vahe ambuae tecua Judá pīpendar sui peico.

Esepia, pe sui osēra mborerecuar che recua iguar Israel yocuai āgua’ ehi —ehi yuvireco Herodes upe.

⁷Aipo hese, Herodes oñehe ñemi ava yasitata rese oyembohe vahe upe ‘toicua eme ava yuvireco’ oyapave oporandu: “¿Mbahe yasi pipe ité vo pesepia ramo aipo yasitata?” ehi. ⁸Oyeupe mombehu pare, omondopa Belén ve aipo ehi chupe:

—Peso evocoyase, peseca pītani. Acoi peyosuse, co rupi avei peyevi cheu icua uca āgua. Che avei evocoyase tasomi imboetei —ehi angahu chupe.

⁹Aipo oyeupe he pare, yasitata rese oyembohe vahe osiriño voi yuviraso. Ahe pipeve yasitata oyemboyecua iri senonera. Ichui pītani recosa rese tupri tecua Belén ve opita yasitata. ¹⁰Sepiase, ovihareté yuvireco. ¹¹Ipare yuviroique oī pipe, osepia pītani ichi María reseve yuvireco. Ichui oñenopiha sovai imboeteisa pipe. Ipare opōhe ombahe riru pipe yuvireco oicuvēhe vaherā oporerecosa sepirusu vahe oro, itaisi, ambuae mbahe sīacua vahe mirra serer vahe avei. ¹²Yuviroyevise güecuave yuviraso, ndoyuviroyevi iri Jerusalén rupi mborerecuar Herodes upe imombehu. Esepia, Tūpa aipo omombehu iquerve chupe ambuae perī rupi iyeve āgua.

Jesús pītani seroñemisa Egipto ve

¹³Aipo ava yepepī pare, José upe oyemboyecua Tūpa rembiguai iquerve, aipo ehi chupe: “Eñarapuha, eroñemi pītani ichi reseve eraso Egipto ve. Aheve erepītara acoi che amombeuse voi nde yeve āgua. Esepia, mborerecuar Herodes osecara pītani yuca āgua oico” ehi chupe.

¹⁴Ahe p̄itu pipeve voi José viraso p̄itani ichi reseve Egipto ve.
¹⁵Aheve yuvirecoi co mborerecuar Herodes mano r̄āro. Co rupi imboaviyesa Tūpa ñehe mombehusar remimombehuḡuer: “Egipto sui anose che Rahir” ehi vahe.

Herodes oyuca uca ch̄ihivahe eta

¹⁶Mborerecuar Herodes rumo oñemoiró iteanga yasitata rese oyembohe vahe ombopa t̄esa rese. Sese, “Toyuviraso sundao tecua Belén ve, toyucapa ch̄ihivahe cuimbahemi yuvireco opacatu ñuvirío araviter ovireco vahe, ch̄ihivahemi catu vahe avei, ahe tecua ivirindar pipe avei no” ehi. Esepia, omoñetase yasitata rese oyembohe vahe yuvireco, oicua ahe araviter opa cūritei. ¹⁷Ēgüe ehi yaviye Tūpa ñehe mombehusar Jeremías remimombehuḡuer aipo ehi vahe:

¹⁸“Oyeendu ava Ramá ve.

Ahe Raquel oyaseho ité omembireta manose;
 ndoyemboviha catui eté ipipe” ehi.

¹⁹Mborerecuar Herodes manore, Egipto ve José upe oñehe iri Tūpa rembiguai iquerve aipo ehi: ²⁰“Eñarapuha, eroyeve p̄itani ichi reseve Israel recuave. Esepia, opa omano p̄itani yuca potasar yuvireco” ehi.

²¹Aipo oyeupe hese, oñarapuha, viroyevi p̄itani ichi reseve Israel recuave. ²²⁻²³Peri rupi oyanduse rumo Arquelao vu recoyar mborerecuar chinise, ahese oyembosiquiye aheve oso āgua. Coiyemi t̄ei iquerve Tūpa, “Peso Galilea ivi rese” ehi chupe. Ichui yuviraso tecua Nazaret ve. Aheve opita yuvireco cute. Ēgüe ehi yaviye Tūpa ñehe mombehusar remimombehuḡuer: “‘Nazaret pendar’ ehira serecosa” ehi vahe.

Juan Oporoāpiramo vahe ivi iporupir̄ehisa rupi secoi

3 ¹Ipare Juan Oporoāpiramo vahe Tūpa recocuer rese oñehe oico Judea ivi rupi ava yemboerecuaēhisave ²aipo ehi: “iPemboasi pe angaipa; peyeve Tūpa upe! Esepia, co Tūpa mborerecuasa cōimi secoi yandeu” ehi.

³Co Juan rese niha oñehe ȳipive Tūpa ñehe mombehusar Isaías aipo ehi güembicuachiaḡuer pipe:

“Oyeendu ñehesa ava yemboerecuaēhisave:

‘Pemoingatu yande Yar raperã; pemohivi tupri avei’ ehi” ehi aracahe.

⁴Juan turucuar ahese camello ragüer apopri, sumbicusasa mbahe pিরer, sembihu evocoiyase tucru, eiri caha pìpendar avei. ⁵Opacatu ava Jerusalén pendar, Judea rupindar tecua, iai Jordán rerovica pendar avei yuviraso ñehe rendu ⁶oangaipagüer mombehu ãgua. Ahese Juan oñapiramo iai Jordán pìpe.

⁷Yugüeru atise rumo fariseo iyavei saduceo oñeapiramo uca ãgua, Juan aipo ehi ahe ava upe: “iPe mboi mboetasa tēi peico! ¿Ava vo, ‘Pesēra Tūpa ñemoirosa ou vaheṛā sui’ ehi tupri tēi pēu? ⁸Yipindar toyecua tupri rane Tūpa upe pe yevisa pe angaipa mboasisa pìpe. ⁹Iyavei ndapeyeroyai chira ‘ore Abraham suindar oroico’ pe hesa rese tēi pe ñepisiro ãgua. Esepia, Tūpa oicatuño ité co ita sui Abraham suindar nungar tupri apo ãgua oyeupe nara yepi. ¹⁰Hacha niha imoingatusa voi eté opacatu ivira ndihai vahe sapo rupi yasia ãgua. Ichui yasia pare imondosa tatave. ¹¹Che i pìpe tēi opoãpiramo Tūpa upe pe yevi ãgua. Oura rumo ambuae che raquicuei, ahe pe ãpiramora Espiritu Santo tata nungar pìpe. Ahe seco pìrata catu vahe secoi che sui. Sese cheu ndiyai eté ahe ipitaquisã yora ãgua ichui. ¹²Ahe oipehara mbahe rãhii ihigüer sui. Sãhii evocoiyase oyapocatura, ihigüer rumo omondora tata apirēhi vahesave” ehi.

Jesús ãpiramosa

¹³Ipare Jesús oso Galilea sui iai Jordán ve Juan recosave ‘tache ãpiramo’ oya. ¹⁴Yipindar rumo Juan ndoipotai eté, aipo ehiño chupe:

—Nde rumo iya ité che ãpiramora eve viña, ¿nde rumo ereyu che nde ãpiramo ãgua? —ehi.

¹⁵—Ëgüe tehiño aipo. Iyacatu yayapora Tūpa porocuita —ehi Juan upe.

Evocoiyase Juan, “Aviye” ehi chupe. ¹⁶Oãpiramo pare, osē ive sui. Ahe pìpeve voi iva oyemboi tupri, aheseve avei osepia Tūpa Espiritu ogüeyise ou iharive apicasu nungar. ¹⁷Iyavei oyeendu ñehesa iva suindar aipo ehi vahe: “Co che Rahir, che rembiaisu. Sese aviharete vichico” ehi.

Jesús recoãhasa

4 ¹Ipare Tūpa Espiritu viraso Jesús ava yemboerecuaēhisave ‘tosecoãha Carugar’ ohesa pìpe.

²Aheve cuarenta ari, cuarenta pĩtu ndocarui. Sese ndasiepoi eté oico. ³Evocoiyase oyemboya Carugar sese secoãha água, aipo ehi chupe:

—Tũpa Rahir ité nde recose, co ita sui eyapo pan cūritei —ehi.

⁴Jesús rumo omboyeve chupe:

—Icuachiapri pipe rumo aipo ehi:

‘Ndahei chira pan sui güeraño ava yuvirecove.

Ëgüe ehi rumo opacatu Tũpa Ñehengagüer reroya pipe ava yuvirecovera yepi’ ehi —ehiño chupe.

⁵Ichui Carugar víraso Jesús Jerusalén maranehi pipendar tũparo torre apĩterve. ⁶Aheve aipo ehi chupe:

—Tũpa Rahir ité nde recose, eviapi cohava sui. Esepia niha, icuachiapri pipe:

‘Tũpa oyocuaire güembiguai eta nde rãro água.

Ahe nde mopuhara yuvireco que ñepe ita nde momara rãgüer sui’ ehi —ehi Carugar chupe.

⁷Evocoiyase omboyeve Carugar upe:

—Icuachiapri pipe rumo aipo ehi avei no: ‘Nderesecoãhai chira nde Yar Tũpa’ ehi —ehi chupe.

⁸Ipare Carugar víraso iri ivitri ivate vahe apĩterve secoãha água. Aheve aipo opacatu ivi pipendar, tecua guasu pipendar mbahe porañete vahe yemboivate aisa omboyecua chupe, ⁹aipo ehi:

—Che rovai ereñenopihase che mboetisave, co opacatu mbahe nde rembiepia amondora nde mahera —ehi Carugar chupe.

¹⁰Aipo oyeupe hese:

—Eyepepi che sui cūritei, Carugar —ehi—. Esepia, icuachiapri: ‘Emboetei nde Yar Tũpa, ahe güeraño tupri avei eremboyeroyara’ ehi —ehi Carugar upe.

¹¹Ahese Carugar oyepepi ichui. Ipare Tũpa rembiguai yuvirogüeyi Jesús rese hañeco água yuvireco.

Jesús omboipi oporombohe Galilea rupi

¹²Jesús oyanduse Juan roquendasa, oso Galilea ivi rese Nazaret ve. ¹³Ndopitai rumo aheve. Osoño Capernaum ve, aheve opita. Ahe tecua ipa Galilea ivi, ivi Zabulón iyavei Neftalí rupi avei. ¹⁴Na ehi yaviye Tũpa ñehe mombehusar Isaías rembicuachiagüer aipo ehi vahe aracahe:

15 “Co ava ivi Zabulón pendar, Neftalí pendar,
para guasu ivirindar, iai Jordán rovaindar iyavei Galilea
pipendar ndahei vahe judío,
16 ahe aviye pītumimbisave yuvirecoi vahe,
osepia ramo vahe tesapesa yuvireco; iyavei mano rãgüer pipe
yuvirecoi vahe upe avei aviye oyecua ramo vahe tesapesa” ehi.
17 Ahe ari suive Jesús omombehu Tūpa recocuer ava upe:
“Pemboasi pe angaipa; peyevi Tūpa upe. Esepia, cōimi eté Tūpa
mborerecuasa secoi” ehi.

Jesús, “Perio che rupi” ehi irungatu pira mbohasar upe

18 Coiye ipa Galilea ivii oguatase, Jesús osepia mbia Simón
Pedro serer vahe tivri Andrés reseve. Ahe pira omboha yuvireco.

19 Evocoiyase:

—Pe pira recasar peico. Perio che rupi. Na peye aveira ava reca
ãgua cheu nara —ehi chupe.

20 Aipo he ramoseve, opoi opira mbohasa sui yuvireco, yuvirasosupí.

21 Coi coti catu aipo Jesús osepia ambuae mbia Santiago tivri
Juan reseve, ahe uguapi yuvinoi carite pipe oyesupa Zebedeo piri;
omoiugatu opira mbohasa yuvinoi. 22 “Perio che rupi” he ramoseve,
opano oporaviquisa sui opoi yuvireco, oseyano oyesupa, yuvirasosupí.

Jesús ombohe ava rehii

23 Jesús evocoiyase uguata opacatu Galilea ivi rupi, judío tūparo
yacatu rupi oporombohe oico. Aheve ñehesa aviye vahe omombehu
Tūpa mborerecuasa resendar. Oporombogüera avei opacatu-catu
tēi mbaherasisa ava vireco vahe sui. 24 Oyepotase rumo serãcua
opacatu Siria ivi rupindar upe, ahese güeru opacatu iparaisu vahe
yuvireco chupe: imbaheasi vahe, carugar vireco vahe, que nañaca
pōrai vahe iyavei ndoguatai vahe. Ahe opa tupri ombogüera.

25 Ëgüe ehi ava rehii uguata yuvireco opacatu iguatasa rupi supí:
Galilea pendar, Decápolis pendar, Jerusalén pendar, opacatu Judea
pendar, iai Jordán rovaindar avei no.

Jesús oporombohe ivitrive

5 1 Ñepeí ari pipe, ava rehii repiase, Jesús oyeupi ivitri rese.
Aheve uguapi oĩ. Ahese semimbohe oyemboya yuvireco sese.
2 Ichui omboipi imbohe aipo ehi:

3“Sorivete catura acoi ava oicuaase mbahe ipane vahe Tūpa rese ité güeco tupri āgua. Esepia niha, chupe nara ité Tūpa mborerecuasa.

4“Sorivete catura acoi ava oyaseho vahe oviharēhisa pipe. Esepia niha, Tūpa omboura viharetesa chupe coiye.

5“Sorivete catura ndaseco asiimi vahe. Esepia, ahe chupe imondosara co ivi imahera curi.

6“Sorivete catura ava oipota vahe teco catuprisa Tūpa suindar. Esepia, chupe ité ahe imondosara.

7“Sorivete catura acoi ava oporoparaisuereco vahe. Esepia, ahe Tūpa oiparaisuerecora.

8“Sorivete catura acoi ava ipihañemoñeta tupri vahe. Esepia niha, ahe osepiara Tūpa yuvireco curi.

9“Sorivete catura acoi ava oporomoñeroi vahe mbahe tupri pipe. Ahe chupe, ‘Che rahir ité’ ehira Tūpa.

10“Sorivete catura acoi ava seco catupri rese imombaraisupri. Esepia, ahe chupe nara Tūpa mborerecuasa.

11“Perorivete catura pe acoi ava iñehe-ñehe tēise pēu, iyavei pe mombaraisuse, acoi oyapo-yapo tēise güemira-mira tēi pipe mbahe pe rese che recocuer sui tēi yuvireco. ¹²Pe rumo peyembovihañora. Esepia, ivave tuvichá vahe porerecosa peipisira curi. Ēgüe ehi avei niha yipindar evocoi ava ramoi Tūpa ñehe mombehusareta mombaraisu yuvireco aracahe” ehi.

Jesús reroyasar aviye yucrí iyavei tesapesa yuvirecoi ava upe

13“Co ivi pipe pe aviye yucrí peico opacatu ava upe. Yucrí rumo nasehe irise, ndayaicatuí imoehe iri āgua, ndiporusai chietera; imombopasara ava pirunga āgua yuvireco.

14“Iyavei pe tesapesa nungar peico opacatu ava upe co ivi pipe inungar que tecua guasu yapopri ivitri rese. Ahe ndayaicatuí ñomi āgua. ¹⁵Iyavei ndayamoendii chira tataendi mbahevrive tēi. Iyacatu rumo yasupi ivate sendave opacatu oi pipendar ava resape āgua. ¹⁶Pe ēgüe peye aveira pemboyecua ava eta upe pe recocuer aviye vahe. Ipípe sui toamboetei yande Ru Tūpa íva pendar yuvireco” ehi ava rehii upe.

Jesús oporombohe Moisés porocuita rese

17“Aní chira, ‘Co mbia revo oporombohe Tūpa ñehe mombehusar rembicuachía mboyeroyaēhi āgua iyavei Moisés porocuita

cuachiapri mboyeroyaēhi āgua avei no' peye tēi cheu. Ēgüe ehi rumo che ayu imboaviye āgua. ¹⁸Supi eté co iva, ivi avei yandeu oime vitemiseve, ndipoi chietera que ñepepe yepe Moisés porocuita, que ambuae Tūpa ñehe mombehugar rembicuachiagüer ocañi tēi vaheṛā; ñepepe porocuita imombehupri imboaviyesaño itera. ¹⁹Sese acoi ava ndoviroyai vahe que ñepepe mborocuitamira viña, ombohe avei ava seroyaēhi āgua, ahe evocoyase ivi coti catu vahe aveira Tūpa mborerecuasave yuvirecoi. Acoi viroya vahe rumo Tūpa porocuita yuvireco iyavei oporombohe vahe yuvireco sese, ahe evocoyase Tūpa osecomboivate catura omborerecuasave curi. ²⁰Iyavei amombehu pēu: acoi pe reco ivi tuprisa ndaheise aviye catu vahe fariseo recocuer sui iyavei ndaheise aviye catu vahe Moisés porocuita rese oporombohe vahe recocuer sui avei, ahese ndapeiquei chietera Tūpa mborerecuasave” ehi.

Jesús oporombohe ñemoiroēhi āgua rese

²¹“Pe peicua acoi pe ramoi aracahendar upe aipo ehi vahe: ‘Peporoyucaí rene. Acoi que ava oporoyuca vahe rumo, ahe serasosara mborerecuar porandusave mbahe sembiapocuer repirā’ ehi. ²²Che rumo aipo ahe pēu: acoi ava ambuae ava rese oñemoiro vahe yuvireco, ahe avei serasosara aheve. Iyavei acoi ‘nde ēgüe ere tēi vahe eico’ ehi vahe ambuae ava upe, ahe serasosara porandu āgua mborerecuar ivate catu vahe rovai. Acoi ava rumo oñehe marase seroīrosave ambuae ava upe, ahe iyacatu imondosa ité tata guasuve.

²³“Sese Tūpa upe pe porerecosa reropovēhesave tūparo pipe pemahenduhase ava pe amotarēhimbar rese, ²⁴peseya rane pe porerecosa aheve; peyevi rane pe amotarēhimbar upe pēu iñero āgua rese. Acoi peñerose oyeupe, ahese voi peyevi, tapeicuavēhe pe porerecosa Tūpa upe.

²⁵“Iyavei peyemotarēhise, peñero voi oyeupe peyoepiase. Anise, aviyeteramo coiye catu tēise pe mombehu tēira pe amotarēhimbar mborerecuar upe pe reraso āgua. Ichui aviyeteramo ahe pe roquenda ucara. ²⁶Supi eté aipo ahe pēu: Ndapesēi chietera acoi peyemboepipase voi eté pesēra ichui” ehi.

Jesús oporombohe yemboaguasaēhi āgua rese

²⁷“Peicua niha Moisés porocuita yipindar: ‘Peaguasai rene ambuae ava rebireco rese’ ehi vahe. ²⁸Che rumo aipo ahe pēu:

Acoi ava omahese cuña rese ipotasa pipe, ahe inungar oyapo vahe ité mbahe sese opiha pipe yepi.

²⁹“Iyavei inungar que pe resa pe acato cotindar oipota rai ucase mbahe pëu pe mboangaipa ãgua tēi, iya penose ité, pemombo amombri peyesui. Aní pe mondo uca opacatu pe recocuer tata guasuve. ³⁰Iyavei inungar que pe po pe acato cotindar pe mboangaipa ucase, iya peyasia ité imombo amombri peyesui. Aní pe mondo uca opacatu pe recocuer tata guasuve” ehi.

Jesús oporombohe ava mendasa sui poiēhi ãgua rese

³¹“Iyavei aipo ehi Moisés aracahe: ‘Opoi potase que omenda vahe oyesui, iyacatu cuachiar imondosa poisa resendar mborerecuar rovai yuvireco chupe’ ehi. ³²Che rumo aipo ahe pëu: ava opoise güembireco sui, cuña ndoyaviise mbahe, ahese ombopihañemoñeta tiētera güembireco mboaguasa uca ãgua. Iyavei cuimbahe omendase cuña omenda vahecuer rese, oyemboaguasa tēi avei sese” ehi.

Jesús oporombohe Vu Tūpa rer poru tēiēhi ãgua rese

³³“Iyavei peicua acoi aipo ehi vahe pe ramoi upe aracahe: ‘Pemboaviye itera pemoingatu tuprise Tūpa rer pipe mbahe pemombehu vahe yepi’ ehi. ³⁴Che rumo, ‘Ndapeñehei chira que mbahe rer pipe, iva rer pipe tēi avei’ ahe pëu. Esepia, ahe niha Tūpa renda; ³⁵ivi rer pipe tēi avei ndapeñehei chira. Esepia, ahe Tūpa pirunga; Jerusalén rer pipe avei ndapeñehei chira. Esepia, ahe niha mborerecuar ivate catu vahe recua. ³⁶Pe ãca rer pipe avei ndapeñehei chira. Esepia, ndapeicatu chira que ñepepe pe ha momorochi ãgua, imou ãgua avei. ³⁷Sese niha peñehese, ñepepe reseve, ‘Aviye’ peyera; anise, ‘Aní’ peye voira. Esepia, aipo ndehi vahe mbahe tēi” ehi.

Jesús oporombohe yande amotarēhisar upe mbahe tēi mboyeviēhi ãgua

³⁸“Peicua acoi Moisés porocuita aracadendar aipo ehi vahe: ‘Que ava vinose vahe ambuae ava resa ichui, ahe sesa avei senosesara. Iyavei vinose vahe sãi ichui, sãi avei senosesara’ ehi vahe. ³⁹Che rumo aipo ahe pëu: Aní chira pemboyevi pëu mbahe tēi aposar upe. Acoi que pe amotarēhisar pe rovapetese yuvireco, ambuae coti pe rova avei

pemoporēhiñora chupe. ⁴⁰Porandusave pe rerasose pe camisa rerocua āgua yuvireco pe sui, pe saco avei pemondoñora chupe. ⁴¹Ñepei legua rupi evosii co mbahe rese cheu' ehise que ava pēu, pe rumo perasoñora ñuvirío legua rupi chupe. ⁴²Iyavei oporanduse que pe mbahe rese yuvireco pēu, pemondoño avei chupe. Aní chira perecatēhi sese" ehi.

Pesaisu pe amotarēhimbar

⁴³"Iyavei pesendu ñehesa yipindar: 'Pesepia potai rene pe amotarēhimbar, pe mboripar güeraño pesaisu' ehi vahe. ⁴⁴Che rumo aipo ahe pēu: Pesaisu catu pe amotarēhimbar iyavei peyeroqui pe momara potasar rese. ⁴⁵Evocoi nungar apo pipe pe Ru Tūpa iva pendar rahir ité peicora. Ahe niha osesape uca ari ava naporai vahe upe, ava aviye vahe upe avei. Ombou avei amar seco catupri vahe upe, ava ndaseco pōrai vahe upe avei. ⁴⁶Pe raisupar güeraño pesaisu catu tēise, ndapeipsisii chietera porerecosa evocoi nungar sui. Esepia niha, ava guarepochi rerocuar ndipihai vahe guaisupar tēi osaisu yuvireco yepi. ⁴⁷Ndahei yande mboripar upe güeraño yayapora 'avirave'. Esepia, ava ndoicuai vahe avei Tūpa oyapo 'avirave' omboripar upe yuvireco yepi. ⁴⁸Sese pe recocuer perecora pe Ru Tūpa iva pendar seco catupri vahe nungar" ehi.

Jesús oporombohe mbahe aviye vahe apo āgua rese

6 ¹"Tūpa upe mbahe peyapo potase, 'Tache repia ava yuvireco' ndapeyei chira. Esepia, ēgüe peyese, ndapeipsisii chietera pe Ru Tūpa iva pendar porerecosa. ²Evocoiyase iparaisu vahe rese peporerecose, 'Tamombehupa ava upe vichico' ndapeyei chira inungar ava Tūpa reroyasar angahu tēi yuvireco yepi. Tūparove iyavei ocar rupi mimbí omoñehe yuvireco 'Co ava aviye ité yuvirecoi, tehi angahu yuvireco yandeu' oya tēi. Supi eté aipo ahe pēu: Ēgüe ehi vahe rumo opa voi oipisi porerecosa co ivi pipe tēi yuvireco. ³Pe rumo peporerecose iparaisu vahe rese, aní chira pemombehu ambuae ava upe yepera que pe mboripar ité viña. ⁴Peporereco catu ava pe repiaēhisa pipe; pe Ru Tūpa niha mbahe ndoyecuai vahe osepia. Ahe omboura porerecosa pēu opacatu ava rembiepiave curi" ehi.

Jesús oporombohe yerure āgua rese

⁵"Acoi peyerurese, peicoi rene acoi ava 'tosepia che yeruresa yuvireco' ehi vahe nungar. Esepia, ahe opūha-pūha catu tūparo

pipe oyerogui yuvireco cupiha yacatu avei ‘tayande repia angahu ava’ ohesa pipe tēi. Supi eté che aipo ahe pēu: Ēgüe ehi vahe opa voi eté co ivi pipeve tēi oipisi porerecosa yuvireco. ⁶Iyacatu rumo pe, peyeroqui potase, peiquera pe rēta pipe peyeoquendara pe ae pe yeroqui ãgua pe Ru Tūpa upe. Evocoiyase pe Ru Tūpa oicua vahe mbahe pe rembiapo, iporerecora pe rese.

⁷“Iyavei peyeroquise, ndapemboyevi-yevii chira pe ñehe pe poranduse mbahe rese Tūpa upe inungar ava Tūpa ndoicuai vahe. Ahe omboyevi-yevi oyeruresa ‘Tūpa revo co rupi yande mboyeroya voira’ ohesave yuvireco viña. ⁸Aní chira inungar tēi peico. Esepia, pe Ru Tūpa oicua pe porandu renondeve mbahe ipane vahe pēu.

⁹Sese aipo peyera peyeroqui:

‘Ore Ru Tūpa, ivave ereico vahe, imboeteipri nde rer tasecoi.

¹⁰Tou nde mborerecuasa oreu.

Tayaposa nde remimbotar co ivi pipe, inungar ivave yaposa.

¹¹Embou ore rembihu ari yacatundar oreu co ari pipe.

¹²Iyavei ndeñero ore angaipa rese oreu inungar ore oreñero ore amotarēhimbar upe.

¹³Ore mboangaipa ucai rene eve; eipeha mbahe naporai vahe ore sui’ peyera.

¹⁴“Esepia, pe amotarēhimbar upe peñerose, pe Ru iva pendar avei iñerora pēu; ¹⁵ndapeñeroise rumo, ahe avei niñeroi chietera pēu” ehi.

Jesús oporombohe yecuacusa rese

¹⁶“Acoi peyecuacuse, ndapemboyecuai chira pe viharēhisa, inungar acoi Tūpa reroyasar angahu tēi yuvireco yepi. Esepia, ahe opa oyeerecomeguapa tupri yuvireco, ‘Co oyecuacu vahe, tehi ava yande repiasar yuvireco yandeu’ ohesa pipe tēi. Supi eté aipo ahe pēu: Ēgüe ehi vahe opa voi oipisi porerecosa ava güepia pipe tēi yuvireco. ¹⁷Pe rumo peyecuacuse, peñeaca mondoro tuprira, peyovai tupri aveira. ¹⁸Evocoiyase, ‘Co oyecuacu vahe’ ndehi chira ava yuvireco pēu. Pe Ru Tūpa, ndayasepiai vahe, güeraño oicuaru pe yecuacusa. Ahe evocoiyase iporerecora pe rese curi” ehi.

Mbahe porañeté vahe oime ivave

¹⁹“Ndapemonuha atii chietera mbahe pe rembiereco co ivi pipe. Esepia, ahe mbahe pe rembiereco mbahe raso omboaso ati-

ati imocañipa, iyavei sãve-sãve tēi opochi ati-ati oapocatusave, imonda vahe avei evocoiyase imondaño sese pēu. ²⁰Iya peseca catu tecocuer aviye vahe ivave nara. Aheve niha ndipoi chira co ivi pipendar nungar pe reco mocañi āgua. ²¹Esepia, pe mbahe pe rembiereco setá catu vahesa rupi-rupi pe pihañemoñeta yepi, yepera que co ivi pipe, anise que ivave avei” ehi.

Yande resa inungar tataendi yande recocuer uve

²²“Iyavei yande resa inungar tataendi yande retecuer upe. Evocoiyase yande resa aviye, opacatu yande retecuer upe osesape; ²³acoi imarase rumo, opacatu yande retecuer pītumimbisave tēi secoi. Tesapesa oime vahe yande rese, ahe ogüese rumo yande sui, mbahe tēi eté, pītumimbi nungar opacatu yande recocuer upe” ehi.

Guarepochi pota raisa; Tūpa mboyeroyaēhisa

²⁴“Iyavei ndipoi chietera que ava ñuvirío güerecuar omboyeroya vahe. Esepia, ñepei oyamotarēhira imboyeroya potaēhisa pipe, ambuae evocoiyase osaisu catura imboyeroya pipe. Ēgüe peye avei, ndapeicatu Tūpa mboyeroya guarepochi pota raisa pipe” ehi.

Tūpa osãro guahireta

²⁵“Iyavei ndapeyemomahenduha guasu ai chira mbahe pe remihura rese pe recove āgua, pe ihu āgua rese, pe turucuarã rese tēi avei no. Esepia, yande recovesa aviye catu vahe tembihu sui, yande retecuer avei aviye catu turucuar sui no. ²⁶Pesepia vīrai eta oveve vahe: nomahetii vahe, nomonuhai avei, ndoyapocatu avei mbahe yuvireco. Pe Ru Tūpa iva pendar ité niha omoime mbahe itohu. ¡Pe rumo ivate catu vahe ité peico vīrai sui! ²⁷Ndipoi que ñepei pe pāhu pendar oicatu vahe opihañemoñetasa pipe tēi güecocuer mopucu iri āgua.

²⁸“Ndahei chira pe turucuarã rese tēi peyemomahenduha guasu ai. Pemahecu ru mbahe potri caha pipendar rese: ndoporaviquii eté iyavei ndoipiai oturucuarã. ²⁹Iyavei yepe mborerecuar guasu Salomón vireco setá ombahe iporañete vahe aracahe viña, iturucuar catuprigüer rumo ndahoyoyai mbahe potri catuprigüer rese. ³⁰Tūpa niha omboporañete raimi tēi mbahe potri caha pipendar, moviro ari tēi yasepia, ichui sapisapaño horno pipe. ¡Ahe

rumo omondo catura turucuar p̃eu, pe ava nimbahe reroya tuprii vahe! ³¹Sese, ‘¿Mbahe p̃iha yahura, yaïhura?’ Iyavei, ¿mbahe p̃iha yamondera?’ ndapeyei chira pe yemomahenduha guasu aisa p̃ipe. ³²Ava Tūpa reroyasarēhi aipo nungar reseño tēi ip̃ihañemoñeta yuvireco yepi. Pe Ru Tūpa iva pendar rumo oicua ité p̃eu mbahe ipane vahe. ³³Pemahenduha rane Tūpa rese pe recocuer tupri p̃ipe ipovrive mbahe pe yapo ãgua semimbotar rupi, ahese omboura opacatu co mbahe ipane vahe p̃eu. ³⁴Peyemomahenduha guasa ai eme mbahe peyapo vahe r̃ese. Iyacatu rumo ahe ari oyepotase voi, peyemomahenduhara sese. Esepia, ari yacatu rupi oime mbahe pemoingatu vahe r̃e yepi.

Aní, “Oyavi mbahe” peye voi ambuae upe

7 ¹“Ndiyai, ‘Oyavi ité mbahe’ peye voiño tēi ambuae ava upe; evocoyase Tūpa, ‘Oyavi mbahe’ ndehi chira p̃eu. ²Esepia, inungar pe ambuae ava upe peico, ãgüe ehi aveira niha Tūpa p̃eu. ³iMahera ambuae ava rembiavimi rese tēi pemahe! iIya rumo peyese rane mbahe tuvichá catu vahe pesepia! ⁴Ndiyai p̃eu, ‘Che torop̃itivii mbahe nde rembiavi rese’ peye vahe r̃e chupe. Esepia, ipe peyavi guasu catu mbahe ichui! ⁵iPe Tūpa reroyasar angahu tēi peico vahe! Penose uca rane mbahe pe rembiavi tuvichá catu vahe peyesui, ahese ramo ambuae ava rembiavi tahimi vahe moingatu peicatura.

⁶“Pemondo eme mbahe maranehi ava cave nungar tēi upe, iyavei ndapemondoi chira mbahe porañete vahe ava cuchi nungar tēi upe. Aviyeteramo oyemboyerera mbahe-mbahe tēi apo yuvireco p̃eu” ehi.

Peporandu Tūpa upe p̃eu mbahe ipane vahe rese

⁷“Peporandu mbahe rese Tūpa upe, ahese omboura p̃eu; peseca ahe mbahe, ahese peyosura; inungar pemota oquenda, ãgüe peyera pe yeroquisa p̃ipe Tūpa upe, ahese imbousara pe porandusa p̃eu. ⁸Esepia, acoi oporandu vahe mbahe rese, ahe mbahe oipisira; acoi mbahe oseca vahe, oyosura, iyavei acoi oyeroquisa p̃ipe omota vahe oquenda Tūpa upe, chupe imboisara.

⁹“Ndipoi eté revo que ñepepe pe p̃ahu pendar omondo vahe r̃e ita tēi guahir upe pan rese oyeupe poranduse. ¹⁰Que pira rese oyeupe poranduse revo, ndomondoi chiaveira mboi tēi chupe. ¹¹Yepe ava

ndaseco pōrai vahe peico viña, pe rahir upe rumo pemondoño ité mbahe aviye vahe. iTahetru pe Ru iva pendar oipota catu mbahe aviye vahe mondo āgua acoi ava mbahe rese oporandu vahe upe!

¹²“Acoi mbahe peipota vahe ambuae ava oyapo vaheṛā pēu, ahe tupri avei peyapora chupe. Ahe niha Moisés porocuita iyavei Tūpa ñehe mombehusareta porombohesa” ehi.

Oime peri icāhimi vahe ava recocuer upe nara

¹³“Peique oquendipi icāhimi vahe rupi. Esepia, oquendipi guasu iyavei peri guasu cañi tēisave oso vahe. Ahe supi setá catu ava yuvirasos; ¹⁴teco apirēhisave oso vahe rumo oquendipi, peri reseve icāhimi. Supi guata āgua yavai eté; moviromi tēi ava oseca yuvireco” ehi.

Ivira aviye vahe icuasa iha rese

¹⁵“Coiye yugüerura ava Tūpa Ñehengagüer mombehusar angahu tēi pe pāhuve. Ahe ndoyavii chira ovesa ndaseco marai vahe yuvireco. Ipiha pipe rumo secocuer aviye mahembiar oñaro ai vahe. Sese peicua catu evocoi nungar sui. ¹⁶Ava recocuer icuasa sembiapo rese. Esepia, ndahipohosai yu sui uva, ndipohosai avei higuera ha ivira sāchi ati vahe sui. ¹⁷Evocoiyase ivira aviye vahe, iha aviye avei; ivira naporai vahe, iha naporai avei no. ¹⁸Esepia, ivira aviye vahe ndovirecoi oha naporai vahe, iyavei ivira naporai vahe ndovirecoi oha aviye vahe. ¹⁹Sese opacatu ivira iha naporai vahe yasiasa yepi. Ichui imondosapa tatave. ²⁰Na peyera ava recocuer cua sembiapo rese” ehi.

Ndahei chira opacatu ava yuviroique Tūpa mborerecuasave

²¹“Ndahei opacatu ava ‘che Yar, che Yar’ ehi vahe yuvireco cheu yuviroiquera che Ru Tūpa mborerecuasave. Che Ru iva pendar remimbotar aposar año tupri rumo yuviroiquera aheve. ²²Ari cañi pipe setá tēi ava aipo ehira yuvireco cheu: ‘Ore Yar, nde ñehe mombehusar niha ore oroico cuese, setá avei oromombo carugar ava sui nde rer pipe, setá poromondiisa oroyapo’ ehi tēira yuvireco cheu. ²³Che rumo, ‘iAní, ndopocuai! iPe mbahe tēi peico vahe, peyepipi che sui!’ aheñora aipo nungar upe” ehi.

Ñuvirío oi apopri

²⁴“Iyavei que ava osendu vahe che ñehengagüer, omboaviye vahe avei, ahe inungar ava ipihañemoñeta tupri vahe omopuha

ita harive güetarã. ²⁵Yepe ahe oi upe oyepota tẽi ivitu ai, amarusu reseve, ichui oyeapo tẽi avei iai chupe, oi rumo ndoviapi eté. Esepia, ita harive ité yaposa. ²⁶Acoi ava che ñehengagüer rese ndoyapisacai vahe rumo, ahe inungar ava opihañemoñeta tupriẽhisa pipe omopuha vahe ivi cuhi harive tẽi güetarã. ²⁷Ipare rumo oyepotase ivitu ai amarusu reseve chupe, ndaracaheimi ahe oi omondurupa” ehi Jesús ava rehii upe.

²⁸Ñehe renduse ava rehii, “¿Mara ehi rutei?” ehi tẽi yuvireco chupe. ²⁹Esepia, ndahei Moisés porocuita rese oporombohe vahe nungar; ahe rumo oporombohe güeco pĩratasa pipe.

Jesús ombogüera ava lepra vireco vahe

8 ¹Ivitrĩ sui ogüeyise Jesús, ava rehii avei yuvirecoi supi. ²Ahese ava lepra vireco vahe ou, oñenopiha sovai aipo ehi chupe:

—Che Yar, ereipotase, che mbogüerami eve co mbaherasi sui —ehi.

³Aipo ihese, Jesús opoco sese aipo ehi:

—Taa, aipota. ¡Ecuera cūritei! —ehi.

Aipo ihe ramoseve, ocuera voi eté.

⁴—Nde cuerasa eremombehu eme ambuae ava upe —ehi—. Nde poyavaño eso, eyemboyecua judío pahi upe. Ipare eicuavẽhe nde porrecosa nde cuera agüer resendar Moisés porocuita rupi. Ipipe sui toicua ava nde cuerasa yuvireco —ehi.

Jesús ombogüera sundao rereciar remimboacua

⁵Ipare Jesús oguataño, ñgüe ehi tecua Capernaum ve oyepota oso. Aheve oime sundao rereciar Roma iguar. Ahe ou chupe ⁶aipo ehi:

—Che Yar, che remimboacua imbaheasi guasu vupave ou. Ndoguata catui, oiporara tẽi ombaherasisa ou —ehi.

⁷—Aviye, cūritei evocoyase asora imbogüera —ehi.

⁸—Aní, che Yar, ndiyai eté che rẽta pipe nde reique ãgua; iyacatu niha cohapeve ereñeheño tẽi icuera ãgua. Evocoyase nde ñehe pipe tẽi che remimboacua ocuerara. ⁹Esepia, che niha serecua vahe avei no, areco avei sundao che voya. Ahe chupe, “Eso peve” ahese, cūritei oso; ambuae upe, “Erio ave” ahese, ou voi avei cheu; che remimboacua upe, “Ahe mbahe eyapo” ahese, che reroya avei —ehi.

10 “¡Too!” ehi Jesús aipo oyeupe hese. Ichui aipo ehi oyeupindar ava rehii upe:

—Yepe ahe ndahei vahe judío viña, opacatu Israel recua pipendar rumo ndasepiai eté ava imbahe reroya vahe yuvireco yepi co ava nungar. ¹¹ Che aipo ahe pëu: Setá ava yugüerura añihivei coti sui, caharu coti sui avei no, inungar co sundao rerecuar. Iyavei opacatu ava ivi rupindar oguapira yuvireco Tüpa mborerecuasave Abraham, Isaac iyavei Jacob piri coiye. ¹² Judío eta rumo, oyeupe ñehesa reroyaëhi pipe setá pïtumimbisave ocañi tëira yuvireco. Aheve oyaseho tëira yuvireco iyavei oñeaimbotere-tere tëira mbaherasicuer rereco yuvireco —ehi oñehe.

¹³ Evocoiyase sundao rerecuar upe aipo ehi:

—Eso, nde mbahe reroya pipe yaposa nde remimbotar ndeu —ehi.

Ahe pipeve semimboacua ocuera tupri ité.

Jesús ombogüera Pedro rembireco si

¹⁴ Ipare Jesús oso Pedro rëtave. Aheve osepia Pedro rembireco si sohi iteangase vupave ou. ¹⁵ Opocose ipo rese, ahe ramosëve sohi opituhu ichui. Ocuere, oñarapuha ava rese ohañeco ãgua.

Jesús ombogüera setá ava imbaheasi vahe

¹⁶ Ipare pïtu ramosë setá carugar vireco vahe ogüeru yuvireco chupe. Jesús rumo ñepeï reseve oñehe pipe tëi omombopa carugar ava rehii sui, iyavei opacatu imbaheasi vahe ombogüera avei no. ¹⁷ Ëgüe ehi omboaviye Tüpa ñehe mombehusar Isafás rembicuachiagüer aipo ehi vahe aracahe: “Ahe ae virocua opacatu yande mbaherasisa yande sui iyavei oiporara opacatu mbahe tasi vahe yande rese” ehi.

Oguata pota tëi vahe ava Jesús rupi yuvireco

¹⁸ Jesús osepiase ava rehii oyere guasu vahe oyese, oyocuai güemimbohe eta aipo ehi: “Peyemoingatu yandeu ipa rovai yande so ãgua” ehi. ¹⁹ Ahese Moisés porocuita rese oporombohe vahe aipo ehi chupe:

—Porombohesar, che mo aso pota nde rupi opacatu nde guatasa rupi —ehi.

²⁰ Jesús rumo aipo ehi imboyevi chupe:

—Yavaira rumo ndeu. Esepia, vīrai vireco guaiti, iyavei aguara vireco oquesa; che rumo, Ava Riquehir, ndarecoi que che rêta ité che pītuhu āgua yepi —ehi.

²¹ Ipare ñepeï ivoya aipo ehi chupe:

—Che Yar, che ru manore voi che nde rupiño ité aicora —ehi.

²²—Aní, cūrítei voi eyu che rupi —ehi—. Ëgüe tehiño ava secocuer omano vahe nungar, ahe ae toñeñeti yuvireco —ehi chupe.

Jesús omombituhu ivitu ai, ohitu vahe avei

²³ Ipare Jesús yuviroha güemimbohe reseve yuviraso carite pipe. ²⁴ Ipa pipe yuviraso pucu ramoseve Jesús oque ou. Ahese aviyeteramo tēi ivitu ai opūha ipa pipe; i ohitu vahe ndiguayii eté, seni-seni carite oyopi. ²⁵ Evocoyase semimbohe yuviraso voi imomahe:

—iOre Yar, yande rerasora mo co carite ipive! iYande pīsiro evel —ehi yuvireco chupe.

²⁶ Evocoyase aipo ehi:

—iMahera pesiquiye! iNdapeyeroyai eté che rese! —ehi güemimbohe upe.

Ahese oñarapuha aipo ehi itu guasu upe, ivitu ai upe avei no: “Pepituhupa” ehi. Aheseve voi opa tupri opituhu yuvireco.

²⁷—¿Mara ehi rutei pīha co? —ehi tēi semimbohe yuvireco chupe—. ¿Mara ehi vahe pīha co ava secoi?

Esepia niha, ivitu, para guasu avei omboyeroa yuvireco no —ehi.

Jesús omboyepipa carugar Gadara pendar sui

²⁸ Jesús oguataño güemimbohe eta reseve oyepota ipa rovai Gadara ivi rese yuviraso. Aheve ñuvirío ava carugar vireco vahe yugüeru sovaichi. Ahe ava tehögüer ruvipa rupi tēi yuvirecoi vahe, iyavei ndiporomboetei vahe yuvireco. Ichui osiquiyepave ava ndoguata potai ahe peri rupi yuvireco yepi. ²⁹ Jesús repia ramoseve rumo, oñehe pīrata yuvireco chupe aipo ehi:

—iJesús, Tūpa Rahir, eyepepi ore sui! Esepia niha, ndoyepota vitei ari nde ore mombaraisu āgua oreu —ehi tēi yuvireco.

³⁰ Namombriimi cuchi rehii yuvirecoi ichui. ³¹ Carugar evocoyase aipo ehi yuvireco chupe:

—Ore mombopañõ tõi eve evocoi cuchi rese —ehi.

³²—Aviye, peso —ehi cariguareta upe.

Aipo hese, carugar opa yuvinose ava sui, yuviroique cuchi rehii aviterve. Ipare rumo cuchi ndayaracua iri yuviceco; iivi socuer rupi yuvinoña yuviceco, opa ipa pipe ocañi tõi yuviceco.

³³Yuvinonoña evocoyase cuchi rãrosar tecuave yuviceco opacatu mbahe güembiepia mombehu ava upe yuviceco. ³⁴Ichui opacatu ava tecua pendar yuvinose ati Jesús upe, “iEso cohava sui!” ehi yuviceco chupe.

Jesús ombogüera ava ndoguatai vahe

9 ¹Ipare Jesús oha carite pipe osasa iri ipa rovai oso güecua Capernaum ve. ²Aheve, ava ndoguatai vahe omboyovai seraso imbaheasi vahe riru pipe yuviceco chupe. Ahe oicuae co ava yuvicecoi vahe oyese yeroya, aipo ehi imbaheasi vahe upe:

—Che rahir, eyemopose, che ñero nde angaipa rese ndeu —ehi.

³“iCo mbia oyemboivate ai tõi vahe, Tüpa ñehe nungar pipe tõi oñehe!” ehi Moisés porocuita rese oporombohe vahe yuviceco chupe. ⁴Jesús rumo oicua ipihañemoñetasa, sese aipo ehi chupe:

—iMahera pepihañemoñeta rai pe yapisacasa rereco! ⁵¿Uma rupi vo ñehesa ndayavaimi catu: ‘Nde angaipa rese che ñero ndeu’ hesa pñha, anise, ‘Epñha, eguata’ hesa tie? ⁶Tapeicua ru che, Ava Riquehir, areco mborerecuasa co ivi pipe ava angaipa upe che ñero água —ehi.

Evocoyase aipo ehi imbaheasi vahe upe:

—Epñha, esupi nde rupa seraso nde rõtave —ehi.

⁷Ahese opñha voi, oso güëtave. ⁸“iToo! ¿Mara ehi rutei vo?” ehi ava rehii yuviceco imboetisave. “Esepia, ahe niha ombou opñratasa ava upe” ehi yuviceco chupe.

Jesús, “Erio che rupi” ehi Mateo upe

⁹Ichui oose Jesús, che repia, che Roma pendar mborerecuar guasu upe guarepochi rerocuasa mesave che rëise. Ipare aipo ehi cheu:

—Erio che rupi —ehi.

Evocoyase apñha, aso voi supi.

¹⁰Ahe ari pipeve Jesús güemimbohe reseve yuviroique che rõtave. Ambocarú setá ambuae ava guarepochi Roma pendar

mborerecuar guasu upe monuhasar reseve, ava angaipa viyar yuvirecoi vahe reseve avei. ¹¹ Co nungar repiase, fariseo oporandu semimbohe upe yuvireco:

—¿Mahera ru pe mbohesar ocaru evocoi nungar ava angaipa viyar pãhuve tẽi? —ehi seroĩrosa pipe yuvireco chupe.

¹² Jesús rumo, osenduse oyesendar ñehesa, aipo ehi:

—Ava nimarai vahe ndosecai eté oporopõsano vahe; imbaheasi vaheño rumo oseca yuvireco. ¹³ Peyapisaca icuachiapri aracahendar aipo ehi vahe rese: ‘Poroparaisuerecosa aipota; ndaipotai mbahe cheu serocuavẽhepri tẽi’ ehi. Esepia, ndayui ava seco catupri vahe reca, ãgüe ehi rumo ayu ava angaipa viyar reca —ehi Jesús ava eta upe.

Yecuacu rese ñehesa

¹⁴ Ipare Juan Oporoãpiramo vahe rupindar yugüeru oporandu Jesús upe:

—Ore iyavei fariseo eta oroyecuacu yepi, ¿mahera ru evocoiyase nde remimbohe eta ndoyecuacui yuvireco yepi? —ehi yuvireco chupe.

¹⁵ Ahe rumo omboyevi ahe ava upe:

—iNdiyai eté ichohopri mendasave ndoyembovĩhai yuvireco imer oicovese ipãhuve! Oimera rumo ari imer reraso ãgua ichui curi. Ahese ramo oyecuacura yuvireco cute —ehi.

¹⁶ “Ndipoi chietera revo que ava oturucuar cuacua oyapete vahe turucuar ipiasu vahe pipe. Esepia niha, yapetesa ipiasu vahe oichohoño turucuar cuacua imondoro. Ichorosa evocoiyase tuvicha catu-catuño ité. ¹⁷ Iyavei ndiyai ava uva ricuer piasu oyapocatu siru mbahe pিরer cuacua vahe pipe. ãgüe ehise, mbahe pিরer opura viña, ocañi tẽira, uva ricuer avei evocoiyase ocañi tẽi aveira viña no. Acoi uva ricuer ipiasu vahe mbahe pিরer ipiasu vahe pipe yapocatupri rumo oyoya ndoyemomarai yuvireco” ehi.

Jairo rayri iyavei cuña Jesús turucuar rese opoco vahe

¹⁸ Jesús oporombohe viteseve, ou mborerecuar oñenopiha sovai aipo ehi chupe:

—Che rayri mo cūrítei omano pota ité. Yaso, nde eremondose rumo nde po sese oicovera —ehi chupe.

¹⁹ “Aviye” ehi. Evocoiyase opũha yuviraso güemimbohe reseve supi. ²⁰ Ahe pipeve cuña doce araviter rupi suvi ndopai vahe opoco

saquicuei coti iturucuar popi rese. ²¹Esepiá, ahe aipo ehi opiha pipe: “Yepe que iturucuar popi resemi tēi apocora, acuerara rumo” ehi. ²²Jesús evocoyase oyemboyere cuña rese aipo ehi chupe:

—Che rayri, eyemopoase, erecuera cūrítei nde yeroyasa pipe —ehi.

Aipo ihe ramoseve, cuña ocuera voi eté.

²³Oyepotase Jesús mborerecuar rētave, osepiá omimbi vahe iyemoingatupase omano vahe tī āgua, ava yaseho atise avei no.

²⁴Ahese aipo ehi ava oyaseho vahe upe:

—Pesēpa cohave sui. Co cuñatai nomanoi; oque tēi ou —ehi.

Ahe ava rumo opucaete atiño seroyaēhisave yuvireco. ²⁵Ichui opa ava omore, ahese oique oi pipe oipopisi cuñatai. Evocoyase ahe oñarapuha voi. ²⁶Co sembiapo evocoyase oyandupa voi opacatu tecua rupi yuvireco.

Jesús ombogüera ñuvirío ava ndasesapisoi vahe

²⁷Acoi osēse evocoi oi sui Jesús, ahese ñuvirío ndasesapisoi vahe osaquicue moña, osapucaí yuvireco chupe aipo ehi:

—¡Jesús, David suindar, ore paraísuerecomi tēi eve! —ehi pucu-pucu yuvireco chupe.

²⁸Oi pipe seiquese, oyemboya ndasesapisoi vahe yuvireco sese. Ahese Jesús oporandu chupe:

—¿Che reroya ité vo pe mbogüera āgua rese peye? —ehi.

—Nde reroyasa ité, ore Yar —ehi yuvireco.

²⁹Aipo oyeupe hese, opoco sesa rese, aipo ehi chupe:

—Tayapo pe che reroyasa pipe mbahe pēu —ehi.

³⁰Aipo ihe ramoseve osareco tupri voi yuvireco. Ipare,

—Peicua catu. Peicua ucai rene ambuae ava upe —ehi chupe viña.

³¹Ahe rumo ichui oyepipi pare, yuviraso opacatu tecua rupi, “Jesús ore mbogüera” ehi-ehiño ité yuvireco.

Jesús ombogüera niñhengatui vahe

³²Ichiri ramoseve rumo, ambuae ava viroyepota ava niñhengatui vahe carugar rerecosar Jesús upe yuvireco. ³³Ichui omosese carugar, iñhengatu cute. Sepiase opacatu ava,

—¡Too! —ehi—. ¡Ndasepiasai vahe ité co nungar mbahe yande recua pipe yepi! —ehi tēi yuvireco.

³⁴Fariseo eta rumo aipo ehiño yuvireco:

—Carugar rerecuar pīratasa pīpe co mbia omose carugar ava sui —ehi tupri tēi yuvireco chupe viña.

Jesús oiparaisuereco ava

³⁵Ichui opacatu tecua rupi Jesús oguata oporombohe tūparo yacatu. Omombehu tecovesa aviye vahe Vu mborerecuasa resendar iyavei oporombogüera opacatu-catu tēi mbaherasisa sui avei no. ³⁶Osepiase ava rehii, oiparaisuereco yuvireco. Esepia, ahe oñemosañō tēi mbahe rasicuer pāhuve inungar ovesa ndovirecoi vahe guārosar yuvireco ³⁷Evocoiyase aipo ehi güemimbohe upe:

—Supi eté mbahe miti imonuhapirā setā iteanga; sese oporaviqui vahe rumo moviromi tēi. ³⁸Sese peporandu mbahe miti Yar upe, ahe tomondo ava imonuha āgua —ehi güemimbohe eta upe.

Jesús oiporavo doce tupri apóstol

10 ¹Evocoiyase, “Perio” ehi Jesús doce güemimbohe upe. Chupe omondo güeco pīratasa carugar ava sui imboyepēpī āgua iyavei iporombogüera āgua opacatu-catu tēi mbaherasisa sui.

²Ahe ava doce tupri apóstol yuvirecoi vahe: yipīndar Simón Pedro, ahe tivri Andrés; ambuae Santiago, Zebedeo rahir, ahe tivri Juan; ³Felipe, Bartolomé, Tomás; iyavei che, Mateo, guarepochi monuhasarer; ambuae Santiago, Alfeo rahir; ambuae Tadeo; ⁴iyavei Simón, güecua rese secatēhi vahe pāhu pendarer; ipa vahe Judas Iscariote, ahe Jesús omondo vahe yamotarēhimbar upe.

Jesús oyocuai güemimbohe Vu mborerecuasa mombehu āgua

⁵⁻⁶Ipare oyocuai güemimbohe imondo aipo ehi chupe: “Pesora yipīndar judío recua rupi. Esepia, inungar ovesa ocañi vahe, ēgüe ehi tēi secocuer yuvireco. Evocoiyase pesoi rene ndahei vahe judío recua rupi iyavei ndapeiquei chira tecua Samaria ve” ehi. ⁷“Judío recua rupi pesoseve, ‘Cōimi Tūpa mborerecuasa secoi yandeu’ peyera imombehu. ⁸Iyavei pembogüera imbaheasi vahe, pembogüerayevi avei omano vahe, pembogüera lepra rerecosar iyavei carugar pemboyepēpī serecosar sui. Esepia niha, peipisi pīratasa ndasepīi vahe. Sese peyapoñō evocoi mbahe guarepochi pisiēhisa pīpe.

⁹⁻¹⁰“Ava oporaviqui pīpe sui ocaru yepi. Sese ndaperasoi chira guarepochi peyese. Ndaperasoi chiaveira pe mbahe riru,

iyavei ambuae pe turucuar, pe pitaqui; peyesendar güeraño tupri perasora. Pe pococa avei ndaperasoi chira” ehi.

11 “Iyavei que tecuave peyepotase, peseca rane ava imboyeroyapri. Ahe sētave pepitami ranera. Pemboaviyese pe cuaita, ahese ramo pesora ichui” ehi. 12 “Evocoiyase peique ramoseve oi pipe, peyapora, ‘Avirave, Tūpa tape rovasa’ peyera chupe. 13 Acoi aviyeise oi pipendar ava pēu, ahe oipisira Tūpa porovasasa; acoi ndahaviyeise rumo ava, ndoipisii chira Tūpa porovasasa yuvireco. 14 Acoi ndosendu potaise pe ñehe, ndape pisi potaise avei yuvireco, ahese pesēño ahe oi pipe sui, anise tecua sui. Peipipetera pe pi ivi rātachigüer sui, pesē pecua ichui ‘toipisi Tūpa ñemoirosa yuvireco’ pe yapave. 15 Evocoiyase supi eté ari cañi oyepotase co tecua upe, ivate catura Tūpa ñemoirosa ava Sodoma, Gomorra iguar upendar sui curi” ehi.

Yamotarēhiprira Jesús reroyasar

16 “iPesendu tupri che ñehe! Che opomondo ovesa nungar ava mbahe mimba oñaro ai vahe nungar pāhuve. Sese peresaeté tuprira peyese mboi nungar, iyavei inungar apicasu seco tupri vahe peicora. 17 Iyavei peicua catu peamotarēhimbar sui. Esepia, mborerecuar rovai pe rerasora iyavei pe nupara otūparo pipe yuvireco, 18 ichui pe reraso aveira mborerecuareta ivate catu vahe rovai yuvireco che recocuer sui tēi, ěgüe peyera peñehe che recocuer rese chupe iyavei ava ndahei vahe judío upe avei. 19 Acoi pe rerasose mborerecuar upe yuvireco, ‘¿Mbahe pīha amombehura chupe?’ ndapeyei chira; acoi peñehe potase rumo, Tūpa omondora pe ñehe āgua pēu. 20 Esepia, ndahei chira peyesui tēi peñehe, pe Ru Tūpa Espíritu pemoñehe ucara.

21 “Ipare rumo ava vivri omondora oamotarēhisar upe ‘toyuca yuvireco’ oya. Ěgüe ehi aveira ava guahir upe; tahir avei oyamotarēhira oyesupa yuca uca āgua yuvireco che recocuer rese. 22 Iyavei opacatu ava ndape ambotai chira che recocuer sui tēi yuvireco. Acoi oyemoviracua vaheño rumo ari ipa vahe rupi, ahe ipīsiproprī yuvirecoira curi. 23 Iyavei acoi pe mañeco tēise ñepei tecuave yuvireco, ahese peyepipiñora ichui ambuae tecua pipendar upe che recocuer mombehu āgua. Supi eté Ava Riquehir oura ndapemboaviye viteiseve pe guatasa judío recua rupi.

24 “Ñepei yepe niha ava oyembohe vahe ndahei eté ivate catu ombohesar sui; que ava rembiguai ndahei avei ivate catu vahe

güereciar sui. ²⁵Iyavei semimbohe, ‘Aviye ité’ ehiñora ombohesar osecoupitise. Ēgüe ehi aveira mbiguai güereciar upe. Acoi oi yar upe: ‘Carugar rereciar Beelzebú’ ehise, aipo ehi aveira niha oi pipendar upe yuvireco no” ehi.

¿Uma sui pīha siquiyesara?

²⁶“Sese ndapesiquiyei chira ava pe amotarēhimbar sui. Esepia, yaposa vahe imombehupirēhi cūrutei, icuasaño itera curi; iyavei mbahe ñomipri, icuasaño aveira no. ²⁷Acoi che amombehu vahe pītumimbisave pēu, pemombehu ari pipe coiye, iyavei acoi amombehu vahe pēuñomi, perosapucái pe rēta harive imombehu opacatu ava upe. ²⁸Iyavei ndapesiquiyei chira acoi ava peyuca potasar sui. Esepia, ndoicatu niha ava hã mocañi āgua yuvireco. Tūpa sui rumo pesiquiye catura. Esepia, ahe oicatu yande retecuer, yande hã reseve imocañi āgua tata guasu pipe” ehi.

²⁹“Yamondo niha ñuvirío vīraimi repirã ñepeimi guarepochi yepi. Yande Ru Tūpa ndoipotaise rumo, ndoviapi chietera que ñepeí vīraimi” ehi. ³⁰⁻³¹“Sese pesiquiye eme. Esepia, pe niha ivate catu vahe ité peico opacatu vīrai sui. Supi eté Tūpa niha oicua opacatu ñepeipei pe ha retacuer” ehi.

“Che aicua Jesucristo” ehi vahe opacatu ava rovaque

³²“Acoi ava ‘che aicua Jesucristo’ ehi vahe opacatu ava rovaque, che avei evocoyase: ‘Co ava che rupindar secoi’ ahera che Ru iva pendar upe. ³³Acoi ava ‘che ndahei Cristo rese aico’ ehi vahe rumo cheu ava rovaque, che avei evocoyase, ‘Ndahei co che rupindar secoi’ ahera che Ru iva pendar upe.

Jesús reroyasa pipe sui oimera yeamotarēhisa

³⁴“Mbahe tupri ai revo güeru co ivi pipe’ ndapeyei chira cheu. Ēgüe ehi rumo che yusa omoime ucara yeamotarēhisa. ³⁵⁻³⁶Sese ava oñemu ae oyeamotarēhi-rēhira yuvireco; ava oyesupa oyamotarēhira, iyavei cuña membri osi oyamotarēhira, cuña vovayar oyamotarēhi aveira.

³⁷“Iyavei acoi oyesupa tēi osaisu catu vahe che sui, ahe ndiyai eté secoi che voyarã; inungar avei osaisu catu vahe guahir, anise guayri che sui. ³⁸Iyavei acoi noñemosai vahe mbahe rasicuer upe, inungar-ra curusu rese ovosii vahe ité viña che rupi oguata

pipe, ahe chupe ndiyai eté che voya seco ãgua. ³⁹Acoi ava oipĩsiro pota vahe güecocuer tēi, ahe ocañi tēira; acoi omocañi vahe rumo güecocuer che recocuer rese, ahe oñepĩsirora” ehi Jesús güemimbohe eta upe.

Porrecosa resendar ñehesa

⁴⁰“Acoi ava pe pisi tupri vahe, ahe che pisi tupri avei yuvireco, iyavei acoi che pisi vahe, ahe oipisi avei che mbousar. ⁴¹Acoi ava oipisi tupri vahe ambuae ava Tūpa ñehes mombehusar secosa rese, ahe oipisi aveira porrecosa inungar tupri. Iyavei acoi ava oipisi tupri vahe ava seco catuprisa rese, ahe oipisi aveira porrecosa inungar tupri. ⁴²Iyavei acoi omondo vahe que chíhi i sōhisa vahe que ñepeí seco mbegüemi catu vahe toihi che reroyasar seco rese, ahe oipisi aveira Tūpa suindar porrecosa” ehi.

Juan Oporoãpiramo vahe ovoya omondo Jesús recocuer cua uca ãgua

11 ¹Opase Jesús oyocuai doce güemimbohe, ahese yuviraso oporombohe Tūpa Ñehengagüer rese judío recua rupi yuvireco.

²Ahese Juan Oporoãpiramo vahe voquendasave chinise, oyandu mbahe Jesucristo rembiapo. Sese omondo vupindar Jesús upe mbahe rese ³imboporandu ãgua: “¿Nde ité vo Tūpa Rembiporavo aipo sãrombrí ereico? anise, ¿oime tie ambuae orosãro vaheã?” ehi yuvireco chupe.

⁴Ipare omboyeveí chupe aipo ehi: “Peso, pemombehupa Juan upe mbahe pe rembiepia iyavei pesendu vahe. ⁵‘Ndasesapisoi vahe osareco tupri cūrítei yuvireco, ipãri-pãri vahe oguata tupri, iyavei lepra rerecosar ocuerapa tupri, ndayapisai vahe avei yapisapa, omano vahe opa ocuerayeví yuvireco iyavei ava iparaisu vahe upe imombehusa pĩsiosa resendar ñehesa’ peyera chupe. ⁶iOviharetera acoi ava oyeroyãno vahe che rese!” ehi Juan rupindar upe.

⁷Juan rupindar yuviraso pare, Jesús omboipi imombehu ava upe Juan recocuer: “¿Pesepiase Juan recocuer ava porēhisave capihiaata ivítu ombova-mbova vahe nungar pĩha? ⁸Anise, ¿pesepia tie iturucuar porañete ai vahe iyemboeteise? ¡Aní! Ēgüe ehi vahe rumo secoi mborerecuar guasu rētave yepi. ⁹Evocoiyase pesepiase, ¿‘Ava’ peye vo pe chupe? ¿Tūpa ñehes mombehusar ité pĩha? Taa,

ahe ité. Evocoi niha ivate catu vahe Tūpa ñehe mombehusar sui.

¹⁰ Ahe chupe ité Tūpa icuachiapri aracahendar pipe aipo ehi:

‘Che amondora nde renondeve che ñehe mombehusar nde raperã moingatu āgua’ ehi.

¹¹ Supi eté ndipoi que ñepei ava seco ivate catu vahe Juan Oporoãpiramo vahe sui. Yepe ahe ivate catu vahe viña, Tūpa mborerecuasave rumo ava seco mbegüemi catu vahe ivate catu ichui.

¹² “Juan yusa suive tupri Tūpa povri pendar oiporara mbahe tēi yuvireco. Osāha-sāha ava opīratasa pipe imocañi āgua. ¹³ Opacatu Tūpa ñehe mombehusar rembicuachía pipe, Moisés porocuaita icuachiapri pipe avei imombehusa Juan yusa rupive co Tūpa mborerecuasa resendar. ¹⁴ Yepe yavaira seroya āgua pēu viña, Juan rumo, Tūpa ñehe mombehusar Elías. Ahe imombehupri ou vahe. ¹⁵ Acoi ava osendu pota vahe che ñehe, toyapisacaño sese” ehi.

¹⁶ “¿Mbahe rese pīha amboyoyara ava recocuer cūrteindar? Esepia, co ava inungar acoi chíhivahe iguayī tēi vahe ocar rupi. Ipare oñehe pucu-pucu omboripar upe yuvireco aipo ehi: ¹⁷ ‘Oromoñehe tēi mimbi pēu, ndapepivoi eté rumo iyavei orosapucaī tēi sapucaisa viharēhisa resendar pēu, pe rumo ndapeyasehoi eté’ ehi. ¹⁸ Esepia, ouse Juan Oporoãpiramo vahe, ahe ndohui tembihu sepīrusu ai vahe iyavei ndoihui uva ricuer ipīrata vahe, sese, ‘Co mbia caruguar vireco vahe oyese’ peye tupri tēi chupe. ¹⁹ Coiye che ayu, Ava Riquehir, acarū, aihu tupri avei. Ipare, ‘Co icaru guasu ai vahe secoi, iihu guasu ai vahe avei’ peye cheu; ‘Ava angaipa viyar mboripar tēi iyavei guarepochi rerocuasar mboripar tēi’ peye avei cheu. Acoi ava supi eté vireco vahe Tūpa mbahecuasa, ahe icuasara sembiapo rese yepi” ehi.

Tecua ndiporeroyai vahe

²⁰ Ahese Jesús oñehe pīrata moviro tecua pendar upe. Esepia, aheve acoi oyapo ati catu mbahe poromondiisa viña. Ahe pendar ava rumo ndosecuñaro potai eté güecocueraī Tūpa upe nara yuvireco. Evocoiyase aipo ehi chupe: ²¹ “iPeparaisu, ava tecua Corazín pendar! iPe avei peparaisu tecua Betsaida pendar! Esepia, acoi poromondiisa pe pāhuve yapopri, yaposara yipive tecua Tiro, Sidón ve viña, co tecua pendar aracaheve anga omondera turucuar viharēhisa resendar, tanimbu avei omondora oāca rese oangaipa

mboasisa pipe yuvireco viña no. ²²Pe rumo peipisira ivate catu vahe Tūpa ñemoirosa ava Tiro, Sidón pendar sui ari cañi pipe coiye. ²³Pe avei no, tecua Capernaum pendar pemoha co ivave pe reco ãgua viña. iPe rumo pe mombosara ivicuar ipicucu catu vahe pipe. Ehi revo tecua Sodoma ve rane, acoi poromondiisa yapopri vahe pe pãhuve yaposara viña, cūrítei oime vitera ahe tecua viña. ²⁴Sese, pe peipisira ivate catu Tūpa ñemoirosa ava Sodoma iguar sui ari cañi pipe coiye” ehi.

Peyu cheu mbituhusa reca

²⁵Iyavei ahe ari pipe Jesús oyerure: “Che Ru, aviye ndeu. Nde niha íva pendar, ivi pipendar Yar ereico. Esepia, nde ereñomi co ñehesa supi tupri vahe ava imbahecua vai vahe sui; eremboyecua rumo ava seco mbegüemi vahe upe. ²⁶Ēgüe ere niha mbahe nde remimbotar apo, che Ru” ehi.

²⁷“Opacatu mbahe che Ru ombou cheu iyavei ndipoi ava che cua tupri vahe yuvireco, che Ru güeraño ité rumo che cua; ndipoi avei che Ru oicua tupri vahe yuvireco no, che güeraño ité aicua iyavei acoi que ava upe aicua uca potase, evocoi nungar upe aicua uca tuprira. ²⁸Peyu cheu opacatu icuerai vahe. Che amondora pe pituhu ãgua. ²⁹⁻³⁰Peico che povrive, peyembohe avei che sui. Esepia, che ndache reco asii, iyavei che povrive pe recosa ndayavaimi eté. Ahese ramo oimera mbituhusa pëu” ehi.

Mbituhusa ari pipe Jesús remimbohe oipoho trigo yuvireco

12 ¹Mbituhusa ari pipe Jesús yuviraso güemimbohe rese, oguata mbahe miti pãhu rupi. Ahese semimbohe ndasiepoi. Evocoiyase trigo rãhii oipoho-pohomi güemihura yuvireco.

²Fariseo yuvirecoi vahe osepiase, aipo ehi Jesús upe:

—Esepia nde remimbohe. Oporaviquiño mbituhusa ari pipe yuvireco —ehi yuvireco chupe.

³Ahe rumo omboyeveí ahe fariseo upe:

—Peicua tēi niha icuachiapri aracahendar mborerecuar guasu David rembiapogüer resendar ñehesa ondugüer reseve ndasiepoise yuvireco. ⁴Ahe niha yuviroique ité tūparo pipe pan imboeteipri Tūpa upendar hu ãgua ondugüer reseve. Ahe chupe acoi ndipotasai ihu ãgua yuvireco viña. Judío pahi yuvirecoi vahe upeño ité niha ipotasa ihu ãgua yepi. ⁵¿Ndapeyeroquii vo Moisés porocuita

resendar pipe? Esepia, judío pahi tūparo rese hañecosar ndopituhui eté tūparo pipe yuvireco mbituhusa ari pipe yepi. Ndahei rumo oyemboangaipa ipipe yuvireco. ⁶Cūrítei cohawe oime ava ivate catu vahe tūparo sui. ⁷Evocoyase pe ndapesenducuai eté Tūpa Ñehengagüer aipo ehi vahe: ‘Che aipota peporoparaisuereco, aní chira peropovêhepa porerecosa mbahe mimba tēi cheu’ ehi vahe. Pesenducuse viña, ahese, “Oyavi mbahe” ndapeye voi chira che remimbohe mbahe ndoyavii vahe upe viña. ⁸Esepia, Ava Riquehír mbituhusa ari rerecuar ité secoi —ehi fariseo eta upe.

Mbia ipo nomii vahe Jesús ombogüera

⁹Ichui olose Jesús, oique judío tūparove. ¹⁰Aheve oime mbia ipo co cotigüer nomii vahe. Aheve avei fariseo, “Yaiñhengapo angahu Jesús” ehi yuvireco viña. Sese,

—¿Iyaño pīha mbituhusa ari pipe ava imbogüerasa yepi’ —ehi yuvireco chupe.

¹¹Evocoyase Jesús aipo ehi imboyevi:

—¿Ava vo pe pāhu pendar acoi mbituhusa ari pipe oviapise seimba ovesa ivicuarve ndosoi chira senose viña? ¹²¡Ava niha aviye catu ovesa sui! Sese iyacatu yande yayapo mbahe aviye vahe mbituhusa ari pipe yepi —ehi.

¹³Ahese aipo ehi aipo mbia upe:

—Eichoho nde yiva —ehi.

Evocoyase oichohose oyiva, ocuera tupri voi inungar ambuae iyiva. ¹⁴Evocoyase fariseo opa yuvinose yuviraso oyemoingatu Jesús yuca ãgua yuvireco.

Yaviye aracahendar imombehupri Jesús recocuer resendar

¹⁵Evocoyase Jesús oicuase fariseo pihanemoñetasa, osẽ oso, ava rehii avei yuviraso supi. Setá avei imbaheasi vahe ombogüera, ¹⁶iyavei, “Che mombehui rene ava upe peyé” ehi. ¹⁷Ëgüe ehi yaviyepa Tūpa ñehe mombehusar Isaías remimombehugüer:

¹⁸“Co ité che mboyeroyasar che rembiporavo.

Ahe asaisu etepri.

Sese ité ayemboviha.

Amondora che Espiritu chupe.

Ahe omombehu aveira mbahe ihivi vahe opacatu ava ivi pipendar upe.

- 19 Noiñehepoepi-epii chira ava, nasase-sasei tēi chiaveira; iyavei ndosendui chietera ava iñehe ocar rupi.
- 20 Iyavei nomopei chietera que ñepei pataviimi oyeapa vahe; nombogüei chiaveira tataendi sātachiñomi tēi vahe. Ëgüe ehira mbahe ihīvi vahe pipe opacatu secopipa.
- 21 Evocoyase opacatu tecua pendar ava ndahei vahe judío oyeroyara yuvireco sese' ehi
- Isaías aracahe.

“Jesús vireco carugar pīratasa oyese” ehi tēi ava yuvireco

22 Ichui ava ndasesapisoi vahe, noñehei vahe carugar rerecosar viraso Jesús upe yuvireco. Evocoyase Jesús ombogüera. Ahese osareco, oñehe avei. 23 Evocoyase opacatu ava oyepihamondiisave aipo ehi yuvireco: “¿Tūpa Rembiporavo David suindar pīha co?” ehi yuvireco chupe.

24 Osenduse rumo fariseo, “Co mbia carugar rereciar Beelzebú pīratasa pipe tēi omboyepipi carugar ava sui” ehi yuvireco.

25 Oicuaño rumo ipihañemoñetasa. Sese aipo ehi: “Que mborerecuar guasu povri pendar ovava-vavase oyeupe oyeamotarēhisave yuvireco, ahese evocoi mborerecuar pīratasa ocañi tēira. Iyavei que tecua pendar, anise, que ava omu rese ovavase oyeupe, oyoya oyemocañi tēira yuvireco. 26 Ëgüe ehi avei carugar. Esepia, sereciar omboyepipise opovri pendar, ovavara oyeupe yuvireco viña. Evocoyase ahe oyemocañi tēira yuvireco. 27 Iyavei pe, ‘Beelzebú pīratasa pipe sui tēi omboyepipi carugar ava sui’ peye tēi cheu. Evocoyase, ¿ava pīratasa pipe vo pe voya eta omboyepipi carugar ava sui yuvireco? Tūpa pīratasa pipese, che avei evocoyase ayapo evocoi nungar ipīratasa pipe. Pe voya ae omboyecuar pe ñehe pe rembiavi yuvireco pēu. 28 Che rumo Tūpa Espiritu pīratasa pipe amboyepipi carugar ava sui. Sese cūrítei pesepia ité Tūpa mborerecuasa.

29 “Iyavei no, que ava oique potase ambuae ava ipīrata etepri vahe rētave imbahe rerocua āgua ichui viña, yipindar opa rane itera oñapichi-pichi. Ipare voi opara virocua imbahe ichui.

30 “Iyavei acoi ava ndache mboyoyai vahe, ahe che amotarēhimbar yuvirecoi; acoi ava ndosecai vahe ava cheu nara, ahe omosai tēi yuvireco che sui.

31 “Sese ava upe oimera ñeroisa opacatu angaipa rese iyavei iñehe mara-mara tēi vahe upe avei. Co catu acoi iñehe-ñehe

têi vahe Tûpa Espîritu upe, ahe chupe ndipoi chietera ñeroisa. ³²Iyavei acoi ava oñehe-ñehe têi vahe che, Ava Rîquehir rese, ahe chupe oimeño ñeroisa; acoi oñehe-ñehe têi vahe rumo Espîritu amotarêhisave, ahe chupe ndipoi chira ñeroisa co ivi pipe iyavei ivave” ehi Jesús fariseo eta upe.

Ava recocuer icuasa sembiapo rese

³³“Emoatiro tupri ivîra, ahe iha aviÿera; nderemoatiro tupriise ivîra, ahe evocoyase vîrecora oha naporai vahe. Esepia, ivîra icuasa iha rese. ³⁴I Evocoyase pe, mboi nungar têi peico vahe, pe recocuer naporaise, ndapeicatui chira mbahe aviÿe vahe rese pe ñehe âgua! Esepia, pe piha pipe sui têi osê pe ñehe âgua. ³⁵Iyavei acoi ava aviÿe vahe oñehe tupri opîhañemoñeta catuprisa pipe; acoi ava recocuer naporai vahe rumo, opîhañemoñeta raisa pipe têi oñehe. ³⁶Sese ari cañi pipe opacatu ava opara omombehu oñehe-ñehe têsisa Tûpa rovai yuvireco. ³⁷Esepia, pe ñehe aviÿe vahe repri peipisira, pe ñehe naporai vahe repri peipisi aveira” ehi Jesús.

Ava eta ndaseco pōrai vahe oporandu poromondiisa rese yuvireco

³⁸Evocoyase fariseo iyavei Moisés porocuita rese oporombohe vahe aipo ehi yuvireco Jesús upe:

—Porombohesar, ore orosepia pota mbahe nde rembiapo poromondiisa nde recocuer cua âgua —ehi yuvireco.

³⁹Jesús rumo omboÿevi iñehe:

—Pe ava ndaseco pōrai vahe, ndiporeroyai vahe, peporandu têi poromondiisa tecocuer cua âgua rese. Che rumo namboÿecuai chira ambuae poromondiisa; Jonás recocuer rese güeraño opomomahenduhara. ⁴⁰Esepia, inungar Jonás secoi mbosapi ari pira guasu avîterve aracahe, êgüe ehi aveira Ava Rîquehir mbosapi ari ivivriÿe tûira omano vahe pâhuve. ⁴¹Evocoyase ari cañi pipe ava tecua Nínive pendar porandusave omombehura ava cûriteindar cañipa âgua. Esepia, Nínive pendar niha omboasise oangaipa, oÿevi Tûpa upe yuvireco Jonás omombehuse Tûpa Ñehengagüer chupe. Cûritei rumo oime Jonás sui aviÿe catu vahe pe pâhuve. ⁴²Iyavei ari cañi pipe cuña mborerecuar guasu irohi coti secua vahe porandusave, omombehura cûriteindar ava cañipa âgua. Esepia, ahe ou amombri sui Salomón mbahecuasa rendu âgua.

Cūrítei rumo oime ivate catu vahe Salomón sui —ehi fariseo eta upe.

Carugar oyeví iri ava güeco agüerve

43 “Iyavei carugar osēse ava sui, oguata tēi ivi ipiru vahe rupi opituhu āgua reca. Ipare rumo ndoyosuise, ipihañemoñeta, 44 ‘Ayeví irira che reco agüerve vicho’ ehi. Aheve oyevise, osepia iri secocuer inungar oi ndiporusai vahe, sahuvapri tupri. 45 Sepiase, oso siete carugar naporai catu vahe reca. Ichui güeruse, oyoya guasu yuviroique co mbia piha pipe. Sese mbahe tēi catu ité secocuer yipindar güeco agüer sui. Ēgüe ehi aveira ava cūríteindar ndaseco pōrai vahe upe” ehi.

Jesús si, tivireta avei

46 Jesús oñeche vitesese ava upe, ahese ichi, tivireta reseve ocarve yuvinochai. Ahe oñeche pota yuvireco chupe. 47 Evocoyase mbia omombehu Jesús upe:

—Nde si, nde rivireta reseve co ocarve yuvinochai. Ahe oñeche pota yuvireco ndeu —ehi.

48 Ahe rumo,

—¿Ava piha che si; ava piha che rivri? —ehi ahe mbia upe.

49 Evocoyase omboyecua opo pipe güemimbohe eta aipo ehi:

—Co che si eta, co che rivireta. 50 Esepia, acoi che Ru iva pendar remimbotar oyapo vahe, ahe che rivri, che reindri iyavei ahe che si yuvirecoi —ehi.

Mbahe miti sui yembohesa

13 1 Ahe ari pipe Jesús osē oi sui oso, oguapi ipa popive oĩ.

2 Aheve ava oñemonuha atise yuvireco, oha carite pipe oguapi oĩ, evocoyase opacatu ava opita ipa popi rupi yuvireco.

3 Ahese omboyoya-yoya oporombohesa setá mbahe rese aipo ehi:

“Ñepeí mbia osē omaheti oico. 4 Ahe otiapi-apiise mbahe

rāhii oso, moviro oiti perí rupi. Vīrai ogüeyise rumo sese, opaño yuvirohu. 5 Iyavei moviro oiti ivi nayanai vahesave ita pāhuve.

Sese cūríteimi sorí; 6 ari tasise rumo, opaño ipiru. Esepia, ndasapoi niha. 7 Iyavei ambuae mbahe rāhii oiti yu pāhuve. Ahe yu rumo sorí poyava catu yuvireco ichui. Sese opaño oyopi. 8 Ambuae rumo

oiti ivi aviye vahesave, ahe setá iha imonuhasa; ñepeí ihi sui osē

cién iha, ambuae sui osẽ sesenta, ambuae sui treinta. ⁹Acoi ava osenducua pota vahe che ñehe, toyapisacaño sese” ehi Jesús ava eta upe.

¿Mahera pĩha co yembohesa imboyoyasa ambuae mbahe rese?

¹⁰Ichui semimbohe eta oyemboya Jesús rese yuvireco mbahe rese oporandu ãgua chupe: “¿Mahera vo eremboyoyaya-mbahe rese nde porombohesa ava upe yepi?” ehi. ¹¹Jesús aipo ehi: “Pêu rumo Tũpa oicua uca ité mbahe ndicuasai vahe omborerecuasa resendar; ambuae ava upe rumo ndoicua ucai eté. ¹²Esepia, acoi vireco vahe upe, imondosa catura; acoi ndovirecoi vahe evocoi osenducua raimi vahe serocuasanaõra ichui. ¹³Sese añehese chupe, amboyoyaya-aipo nungar mbahe yavai vahe ambuae mbahe rese yepi. Esepia, ahe osepiã tẽi, ndosepiacuã rumo yuvireco iyavei osendu tẽi, ndosenducuai avei yuvireco no. ¹⁴Na ehi yaviye Tũpa Ñehengagũer Isaías remimombehu:

‘Pe niha pesendu tẽira, ndapeicuã chira rumo; iyavei pesepia tẽira, ndapesepiacuã chira rumo.

¹⁵Esepia, evocoi ava eta upe yavai eté ipiha pipe imbahe reroya ãgua, ndayapisai eté sendu potaẽhisave; ndoyemboesapisoi avei sepiã potaẽhisave.

Esepia, ndosenducua potai opiha pipe yuvireco cheu oyevi potaẽhisave ombogũera ãgua’ ehi

Isaías aracahe.

¹⁶“Pe rumo perorivete ité sepiacuase, pesenducuae avei no.

¹⁷Supi eté setã Tũpa ñehe mombehusar iyavei ava seco catupri vahe aracahendar osepiã pota tẽi mbahe pe rembiepia, ahe rumo ndosepiã eté yuvireco; iyavei osendu pota tẽi co pe remiendu, ahe rumo ndosendui avei yuvireco” ehi Jesús güemimbohe eta upe.

Jesús omombehu yembohesa mbahe miti resendar

¹⁸Ipare aipo ehi: “Peyapisaca omaheti vahe recocuer rese. ¹⁹Acoi osendu tẽi vahe Tũpa Ñehengagũer imborerecuasa resendar, ipare rumo ndosenducuai, ahe inungar acoi mbahe rãhii oviãpi vahe perirupi. Ipare rumo carugar ou chupe. Ahe ipiha pipe osendu vahe Tũpa Ñehengagũer opa tupriño omocaño ichui. ²⁰Iyavei acoi mbahe rãhii seitipri ita pãhuve, ahe inungar ava recocuer yipriño osendu vahe, oipisi vahe avei vorivetesa pipe Tũpa Ñehengagũer. ²¹Ipare

rumo inungar co mbahe miti ndovirecoi vahe guapo ovĩracua āgua, ēgüe ehi avei evocoi nungar ava oimese mbahe-mbahe tēi Tūpa Nēhengagüer sui chupe, cūrteimi seroyaēhisave oyepepi ichui. ²² Acoi mbahe rāhii seitipri yu pāhuve, ahe inungar ava osendu vahe Tūpa ñehe. Ipare rumo ahe ipihañemoñeta catu saisusave opacatu ombahe eta co ivi pipendar rese. Ipipe sui oyembopa uca ombahe eta upe. Ichui ndoguata iriño Tūpa Nēhengagüer rupi. Sese secocuer ndaviye iri eté, inungar mbahe miti ndihai vahe. ²³ Acoi itĩsa vahe mbahe rāhii ivi aviye vahe rese, ahe inungar ava osenducua vahe Tūpa Nēhengagüer. Iyavei inungar acoi co mbahe miti ihá iteanga vahe, ēgüe ehi avei ava secocuer aviye vahe inungar ñepeipei sāhii sui osē que cien iha, sesenta iha, anise que treinta” ehi Jesús güemimbohe eta upe.

Trigo pāhuve caha naporai vahe sui yembohesa

²⁴ Jesús omombehu iri co ambuae mbahe rese yembohesa oyoya vahe: “Tūpa mborerecuasa oyoya tupri ava oivi pipe mbahe rāhii oñoti vahe rese. ²⁵ Opacatu ava queseve rumo oyepota yamotarēhisar, caha tēi rāhii oñoti trigo pāhuve oso. ²⁶ Acoi trigo iha potase, supive avei sori caha. ²⁷ Evocoyase oporaviqui vahe yuvĩraso, omombehu iyar upe aipo ehi yuvĩreco: ‘Ore rerecar, ¿ndahei vo acoi mbahe rāhii aviye vahe ereñoti nde ivi pipe? ¿Que sui ru caha sori ipāhuve?’ ehi yuvĩreco chupe. ²⁸ Iyar rumo aipo ehi chupe: ‘Oime revo que che amotarēhisar’ ehi. Evocoyase oporaviqui vahe oporandu yuvĩreco chupe: ‘¿Ndiyai pĩha caha tēi orosapohopara ichui viña?’ ehi. ²⁹ Ahe rumo aipo ehi chupe: ‘Aní, aviyeteramo caha rupive pesapoho tiētera trigo’ ehi. ³⁰ ‘Evocoyase peseya, tocuacuaño oyoya yuvĩreco. Yaviyese voi mbahe miti, ahese che ayocuaira oporaviqui vahe caha tēi rane rerocua āgua imboapuha uca sapi. Ipare oyapocatura trigo rāhii che mbahe apocatusave yuvĩreco’ ehi ivi yar” ehi Jesús.

Yembohesa mostaza rāhii suindar

³¹ Jesús omombehu iri co ambuae mbahe rese yembohesa oyoya vahe: “Tūpa povri pendar oyoya tupri mostaza rāhii rese. Ahe mbia oñoti vahe oivi pipe. ³² Supi eté co mostaza rāhii tahimi catu opacatu ambuae mbahe rāhii sui. Ipare rumo, ocuacuase, tuvichá catu ambuae mbahe miti sui inungar ivira tuvichá vahe. Ahe sāca rese vĩrai rehii oyapo guaitirã” ehi oporombohe.

Yembohesa pan mboapeposa sui

³³Ipare Jesús oporombohe iri ambuae mbahe rese aipo ehi: “Tüpa povri pendar oyoya tupri pan mboapeposa rese, acoi cuña omboyeseha tupri vahe trigo cuhi rese opacatu imboapepo ãgua yepi” ehi oporombohe.

Jesús oiporu oporombohe ãgua mbahe rese mboyoyasa yepi

³⁴Jesús omombehu opacatu evocoi nungar mbahe omboyoyayoyase oporombohesa ambuae mbahe rese opacatu ava upe. ³⁵Co rumo na ehi Tüpa ñehe mombehusar rembicuachiagüer aviye ãgua: “Che añehese, amboyoyara che porombohesa ambuae mbahe rese.

Iyavei amombehura Tüpa ivi apo suive mbahe niporëhii vahe” ehi.

Jesús omombehu tupri oporombohesa caha tēi resendar

³⁶Ahese Jesús, “Aviye” ehi ava upe. Ipare oique oi pipe. Aheve semimbohe oyemboyapa yuvireco sese ‘tomombehu trigo pãhuve caha oime vahe resendar yandeu’ oya. ³⁷Evocoyase omboyevi chupe: “Acoi ava mbahe rãhii aviye vahe oñoti vahe, ahe che, Ava Riquehir. ³⁸Ivi mbahe miti rupa, ahe ava co ivi pipendar. Iyavei mbahe rãhii aviye vahe, ahe ava Tüpa povri pendar; caha naporai vahe, ahe ava carugar suindar yuvirecoi vahe. ³⁹Acoi yamotarëhimbar, oñoti vahe caha, ahe niha Carugar ité. Evocoyase ari mbahe miti pohosa, ahe ari cañisa; acoi omonuha vahe mbahe miti, ahe Tüpa rembiguai iva pendar yuvireco. ⁴⁰Iyavei inungar acoi caha tēi imonuhapri sapi ãgua, ëgüe ehi aveira ari cañi pipe coiye. ⁴¹Evocoyase che, Ava Riquehir, che rembiguai iva pendar amondora opacatu ava ambuae omboangaipa uca vahe, mbahe-mbahe tēi aposar avei rerocua ãgua che povrive yuvirecoi vahe pãhu sui. ⁴²Ichui omondopara tata guasuve. Aheve oyaseho tēira iyavei ombotere-tere tēira guã yuvireco. ⁴³Aheseve voi ava Tüpa reroyasar seco tupri vahe, ari nungar sendi yaira Vu mborerecuasave yuvireco. Que ava osendu pota vahe che ñehe, toyapisacaño sese” ehi.

Mbahe repirusu ñomimbri sui yembohesa

⁴⁴“Evocoyase Tüpa mborerecuasa oyoya tupri mbahe sepirusu vahe que ivi pipe ñomipri rese. Ipare ava aviyeteramo tēi oyosura

viña. Ahe rumo aheve avei oñomi. Ipare vorivetesa pipe opacatu ombahe omondopa co ivi rerocua ãgua mbahe sepĩrusu vahe pota raisa pipe” ehi.

Mbohir sepĩrusu catu vahe sui yembohesa

45 “Iyavei Tũpa mborerecuasa inungar ava mbahe rerocuasar oseca vahe mbohir icatupri vahe yepi. 46 Ahe oyosuse mbohir sepi catu vahe, oso opacatu ombahe mondo co sepi catu vahe rerocua ãgua.

Pira mbohasa sui yembohesa

47 “Iyavei Tũpa mborerecuasa inungar pira mbohasa. Imondopri ipive. Ipare omboha opacatu-catu tẽi pira. 48 Acoi savapipose pira mbohasa, vinose ivi ãtasave yuvireco. Aheve oiporavo pira aviye vahe oñoñapa ombahe rĩruve yuvinoi, naporai vahe rumo opaño omombo yuvireco. 49 Ēgũe ehi aveira ari cañi pipe: ahese Tũpa rembiguai iva pendar yuvinosera opacatu ava ndaseco pĩrai vahe mboyepepi ãgua ava seco catupri vahe sui. 50 Evocoyase ava ndaseco pĩrai vahe imondosara tata guasuve. Aheve oyaseho tẽira iyavei ombotere-tere tẽira guãĩ yuvireco” ehi.

Mbahe ipiasu vahe iyavei ocuacua vahe sui yembohesa

51 Evocoyase oporandu güemimbohe eta upe:

—¿Pesenducua vo aipo opacatu? —ehi.

—Taa —ehi yuvireco chupe.

52 Evocoyase ahe aipo ehi:

—Acoi ava oporombohe vahe porocuita rese, oyembohe vahe avei che Ru mborerecuasa rese, ahe inungar ava oi yar vinose vahe ombahe ipiasu vahe, ocuacua vahe avei yapocatusa sui —ehi güemimbohe eta upe.

Jesús Nazaret ve secoi

53 Oñehe pare, Jesús osẽ ichui 54 oyepota güecuave oso. Aheve ombohe ava judío tũparo pipe oico. Evocoyase ahe pendar ava oyepihamondii tẽi:

—¿Que pĩha co ava oyembohe catu ombahecua ãgua? iyavei, ¿mara ehi pĩha co mbahe poromondiisa apo? —ehi yuvireco—.

55 ¿Ndahei vo acoi carpintero rahir tẽi? Ichi niha acoi María, iyavei

yuvirecove tivri, ahe Santiago, José, Simón, Judas. ⁵⁶Seindri avei niha yuvirecove yande pãhuve. Evocoyase, ¿que pãha oyembohera viña? —ehi tēi yuvireco chupe.

⁵⁷Ipípe sui ndoviroyai yuvireco. Ahe rumo aipo ehi chupe:

—Tũpa ñehe mombehúsar niha omboetei opacatu rupi yuvireco yepi. Secua pipendar, sēta pipendar ae rumo nomboetei yuvireco —ehi.

⁵⁸Evocoyase, ahe ava viroyaēhisa rese, moviro tēi oyapo mbahe poromondiisa ipãhuve.

Juan Oporoãpiramo vahe mano agüer

14 ¹Ahe ari rupi Herodes, mborerecuar guasu Galilea pendar, oyandu Jesús rerãcua. ²Evocoyase aipo ehi opĩtiviisar upe: “Juan Oporoãpiramo vahe revo ocuerayevi. Sese oyapo poromondiisa ipĩrata vahe” ehi.

³Esepia niha, yipindar Herodes Juan oipisi, oñapichi carena pipe soquenda ãgua vivri Felipe rembireco Herodías sui tēi, ⁴“Ndiyai eté nde rembireco nungar ererecora” oyeupe hese.

⁵Herodes oyuca pota Juan viña, osiquiyēño rumo ava eta sui. Esepia, ahe, “Tũpa ñehe mombehúsar secói” ehi yuvireco chupe.

⁶Acoi Herodes haragüer mboeteisa pipe rumo aipo cuña Herodías membri osē opivoi ava rehii rembiepiave. Herodes upe evocoyase aviye ai eté. ⁷Sese ahe oyemoingatu ñepeí reseve que mbahe oyeupe oporanduse imondo ãgua chupe. ⁸Evocoyase ahe cuñatai oyeupe osi remimombehu rupi, aipo ehi Herodes upe:

—Embou Juan Oporoãpiramo vahe ãca poratu pipe cheu —ehi.

⁹Aipo ñehesa nombovihai eté Herodes; ndiya iri rumo, “Aní” ohe ãgua. Esepia, opacatu ava güemimbori eta rovaque aipo ehi. Sese, “Taperu chupe” ehiño. ¹⁰Ahese oporocuai Juan ãca hasia ãgua soquendasave. ¹¹Ipare viraso poratu pipe cuñatai upe yuvireco. Evocoyase ahe omondo osi upe.

¹²Ahese Juan remimbohe oyepota yugüeru, viraso sete ñoti yuvireco. Ipare yuviraso Jesús upe imombehu.

Jesús oyopoi cinco mil cuimbahe

¹³Jesús oyanduse Juan manosa, ahese ahe ae oso ava porēhisave carite pipe. Ava rehii rumo oyanduse, yuvinose voi güecua sui, ivi rupi yuviraso osupiti secosave yuvireco. ¹⁴Evocoyase osēse

carite pipe sui, osepia ava rehii. Ahese oiparaisuereco ava eta. Sese opa ombogüera imbaheasi vahe serasopri. ¹⁵Evocoiyase caharuse semimbohe oyemboya yuvireco sese aipo ehi:

—Caharú ité moco cute iyavei ndipoi oi co rupivemi vahe. ¿Ndiyai vo eremondopa ava tecua-tecuami rupi, ahe supi tovirocua mbahe güemihura yuvireco? —ehi yuvireco chupe.

¹⁶—Aní, ndiyai yuvirasó. Pe pemondora mbahe semihura yuvireco —ehiño chupe.

¹⁷—Poyandepomi tēi rumo pan orovireco iyavei ñuviriomi tēi avei pira —ehiño semimbohe yuvireco chupe.

¹⁸—Peruño ave cheu —ehi güemimbohe upe.

¹⁹Ipare aipo ehi ava rehii upe: “Peguapi capihi harive” ehi. Evocoiyase oipisi poyandepomi vahe pan, ñuviriomi vahe pira. Ichui omahese iva rese, “Aviye ndeu, che Ru” ehi. Ichui omombite-mbite pan imondo güemimbohe upe. Ahe evocoiyase omboyaho-yaho ava eta upe semihura yuvireco. ²⁰Evocoiyase opacatu ava ocaru vahe ihitaropa tēi yuvireco. Ipare semimbohe omboapipopa doce tupri iruova sembihu rumbirer yuvireco. ²¹Ahe cuimbahe ocaru vahe retacuer cinco mil. Cuña rumo iyavei chíhivahe ndipapasai yuvireco.

Jesús oguata i hari rupi

²²Ipare Jesús, “Peha pe rane carite pipe, pesasa ipa peso che renondeve. ‘Aviye’ tahe rane ava eta upe” ehi güemimbohe upe. ²³“Aviye” ohe pare ava upe, oyeupi oso ahe ae ivitri rese oyeriqui ãgua. Pītuse chupe, opitaño aheve. ²⁴Aheseve carite oso pucuse ipa popi sui, ivitu ipirata vahe osovaichi yuvireco. Sese ohitu vahe nambegüe-mbegüei ocua sese. ²⁵Cõhe potase, oguata i hari rupi oso güemimbohe coti. ²⁶Semimbohe i hari rupi iguatase, oyembosiquiye yuvireco ichui. Sese,

—iNdahei vo evocoi hãgüer secoi! —ehi yuvireco chupe.

²⁷Güemimbohe upe rumo aipo ehi:

—iPeyemoviracuãño, che tēi! iPesiquiye eme che sui! —ehi.

²⁸—Che Yar —ehi Pedro—. Nde ité ereicose, taguata i hari rupi vicho nde piri —ehi.

²⁹—Erio ru —ehi chupe.

Evocoiyase Pedro ogüeyi carite pipe sui, oguata i hari rupi. Osora ipiri viña. ³⁰Ivitu pĩrata repiase rumo, osiquiye ichui. Oso senise rumo ipive,

—iChe Yar! iChe p̄siromi eve! —ehi.

³¹Ahese cūrteimi voi oipisi Pedro po rese, aipo ehi chupe:

—iChīhi tēi ereyeroya che rese! iMahera ndereyeroya tuprii che rese! —ehi.

³²Oyuvirohase rumo carite pipe, opituhu voi ivitu. ³³Evocoyase carite pipe yuvirecoi vahe oñenopiha sovai,

—iSupi eté catu nde Tūpa Rahir ereico! —ehi yuvireco chupe.

Jesús ombogüera imbaheasi vahe Genesaret pendar

³⁴Osasase ipa, oyepota Genesaret ivi rese yuviraso. ³⁵Opacatu ahe pendar ava oicuase Jesús yepota, ahese opacatu tecuami rupi omombehu-mbehu ava upe yuvireco. Evocoyase viraso imbaheasi vahe chupe, ³⁶aipo ehi yuvireco: “Topocomi tēi nde turucuar popi rese yuvireco” ehi; evocoyase opacatu sese opoco vahe, ocuerapa voi eté yuvireco.

Porombohesa yande mboangaipa vahe resendar

15 ¹Oyemboya Jesús rese moviro fariseo iyavei Moisés porocuita rese oporombohe vahe, yugüeru vahe tecua guasu Jerusalén sui. Ahe oporandu yuvireco chupe:

²—¿Mahera vo nde remimbohe ndoguatai yande ramoi aracahendar aracuasa rupi yuvireco? ¿Mahera vo yande porocuita mboaviyeēhisa pipe ndoyepoi ocaru āgua yuvireco yepi? —ehi.

³Jesús ombovevi aipo ehi chupe:

—Pe no, imahera ndapemboyeroyai Tūpa porocuita pe ramoi aracahendar aracuasa rupi tēi pe guata āgua! ⁴Esepia, Tūpa aipo ehi: “Pemboyeroyara iyavei peip̄tiviira pe ru, pe si avei no. Acoi ñehe mara vahe oyesupa upe, ahe tomanoño” ehi aracahe. ⁵Pe rumo aipo peye tēi: “Acoi ava aipo ehi vahe vu upe, osi upe avei no: ‘Ndiyai chira mbahe mondo āgua p̄u. Esepia, che opacatu mbahe areco vahe imondopri Tūpa upe’ ehise, ⁶ahese ndiyai eté ip̄tīvii āgua chupe” peye. Ēgüe peye pe aracua raisa pipe pemocañi Tūpa porocuita peyesui. ⁷Pe Tūpa reroyasar angahu tēi peico vahe! Supi tupri ité Tūpa ñehe mombehusar Isaías rembicuachía aracahendar omombehu pe recocuer:

⁸‘Co tecua pendar ava oyuru pipe tēi che mboetei yuvireco; ipihañemoñetasa rumo amombri tēi che sui.

⁹Oyerure tupri tēi yuvireco cheu.

Esepia, iporombohesa ava porocuita tēi' ehi Isaiás rembicuachiagüer pipe aracahe —ehi Jesús imombehu.

¹⁰ Ipare,

—Perio —ehi ava rehii upe—. Peyapisaca, pesenducua tupri che ñehe: ¹¹ mbahe oi que vahe ava yuru rupi nomboangaipa ucai. Mbahe osē vahe ava yuru pipe sui, ahe rumo omboangaipa uca —ehi.

¹² Evocoyase semimbohe oyemboya sese, oporandu yuvireco chupe:

—¿Ereicua vo acoi fariseo oñemoiro nde ñehe renduse yuvireco? —ehi.

¹³ Ahe rumo aipo ehi chupe:

—Opacatu mbahe miti ndahei vahe che Ru iva pendar remiti, opara sapohosa curi —ehi—. ¹⁴ Ëgüe tehiño yuvireco. Esepia, evocoi inungar ndasesapisoi vahe viroguata ambuae ava ndasesapisoi vahe yuvireco. Ahe evocoyase oyoya voira oviapi ivicuar pipe yuviraso —ehi.

¹⁵ Evocoyase Pedro oporandu chupe aipo ehi:

—Emombehu tupri catu iri mbahe eremombehu vahe oreu —ehi.

¹⁶ —¿Ndapesenducua vitei avei catu pe co ñehesa? ¹⁷ ¿Ndapeicuai vo opacatu mbahe acoi ava yuru rupi oi que vahe oso yaviterve, ipare osē setecuer sui? ¹⁸ Ava pihañemoñetasa sui osē vahe rumo iyuru rupi, ahe ava omboangaipa. ¹⁹ Esepia, ava pihañemoñetasa sui osē pihañemoñeta raisa, porapichisa, mendasa sui yemboaguasasa, nomendai vahe yemboaguasa tēisa, mondasa, temira iyavei ava rese ñemoñeta tēisa. ²⁰ Evocoi nungar mbahe rumo omboangaipa ava; ndahei angaipa acoi yande caru renonde yande yepoiēhisa nungar —ehi.

Cuña ndahei vahe judía viroya Jesús

²¹ Ichui osē Jesús oso, oguata Tiro ivi rupi, Sidón ivi rupi avei.

²² Cuña cananea, Tiro, Sidón ivi rese secoi vahe oyemboya Jesús rese aipo ehi:

—iChe Yar, David suindar, che paraisuerecomi eve! iChe membri vireco carugar oyese! —ehi pucu-pucu ou chupe.

²³ Ahe rumo nomboyevii eté chupe. Evocoyase semimbohe oyemboya yuvireco sese aipo ehi:

—Emboyepipi co cuña yande sui. Esepia, sãse pucu-pucu ou yande raquicuei —ehi yuvireco chupe.

24 Evocoyase aipo ehi güemimbohe upe:

—Che Ru Tüpa rumo che mbou Israel recua pendar upeño. Esepia, ahe ovesa ocañi tēi vahe nungar yuvireco —ehi.

25 Ahe cuña rumo oñenopiha sovai, aipo ehi chupe:

—iChe Yar, che pītiviimi eve! —ehi.

26 Ahe rumo aipo ehi chupe:

—Naporai rumo yarocua pan tahir sui cave tohu yamondo vaherā —ehi.

27 —Supi eté, che Yar, cave avei rumo ohuño ité pan rahicuer oviapi vahe yepi —ehiño chupe.

28 —iCuña, tuvichá nde yeroyasa! Aviye, ěgüe tehi eté nde remibotar rupi —ehi.

Aipo ihe ramoseve, ocuera voi eté imembri.

Jesús setá ombogüera ava imbaheasi vahe

29 Ichui Jesús osē oso ipa Galilea ivii. Ipare oyeupi ivitri rese oguapi oĩ. 30 Aheve setá ava oyepota, güeru ati imbaheasi vahe yuvireco chupe: ndipindugüei vahe, ndasesapiso vahe, ipāri-pāri vahe, niñhengatui vahe, iyavei ambuae setá imbaheasi vahe no. Omondose sovai yuvireco, ahe opa ombogüera. 31 Ichui ava niñhengatui vahe oñehe; ipāri-pāri vahe ocuera tupri; ndoguatai vahe oguata avei iyavei ndasesapiso vahe osareco yuvireco. Sepiase ava rehii oyepihamondii aipo ehi: “Imboetepri Israel Tüpa tasecoi” ehi yuvireco.

Jesús oyopoi cuatro mil cuimbahe

32 Evocoyase Jesús oñehe güemimbohe upe aipo ehi:

—Iparaisu catu co ava yuvireco cheu. Esepia, mbosapi ari yuvirecoi yande piri iyavei ndipoi eté mbahe semihura. Ndiyai sētave sie porēhi reseve amondo. Aviyeteramo oviroviapi-api tiētera tieporēhi peri rupi yuvireco viña —ehi.

33 Evocoyase semimbohe aipo ehi yuvireco chupe:

—¿Que sui pīha orosecara tembihu ava rehii upe nara cohava ava porēhisave viña? —ehi yuvireco.

34 —¿Mbovi vo pan pereco? —ehi.

—Orovirecomi siete pan iyavei moviromi tēi pirami —ehi semimbohe yuvireco chupe.

35 Evocoyase, “Peguapi ivi harive” ehi ava rehii upe. 36 Ahese oipisi siete pan, pirami reseve, “Aviye ndeu” ehi Vu upe. Ichui

omboyaho-yaho güemimbohe upe imondo. Ahe evocoyase omondopa ava rehii upe yuvireco. ³⁷Opacatu ava ocaru vahe ihitaro yuvireco. Ipore semimbohe omboapipo iri rane sumbirer siete iruova yuvireco. ³⁸Cuimbahe ocaru vahe retacuer cuatro mil. Cuña, chíhivahe retacuer rumo ndicuasai. ³⁹Ipore Jesús, “Aviye” ehi ava upe, ahese oha carite pipe oso ivi Magadán rupi.

Fariseo iyavei saduceo oporandu poromondiisa rese yuvireco

16 ¹Fariseo iyavei saduceo yuviraso Jesús repia secoãha ãgua yuvireco viña. “Emoporêhi Tūpa suindar nde recosa poromondiisa pipe oreu” ehi yuvireco chupe.

²Aipo ehi rumo fariseo, saduceo yuvirecoi vahe upe: “Supi eté amove caharuse pe aipo peye: ‘Ari tupri aira. Esepia, iva rese pīrá iteanga’; ³iyavei añihivei: ‘Co pipe ari naporai chira. Esepia, iva rese pīra vai anga, pītu guasu-guasú avei’ peye. Pe niha peicua mbahe iva resendar tēi oyecua vahe mombehu; ndapeicuai rumo mara oyapave co poromondiisa cūrteindar ava upe imombehu. ⁴Co ava ndaseco pōrai vahe oyepepi vahe Tūpa sui oporandu poromondiisa rese ‘¿Tūpa suindar ité pīha?’ oyapave. Che rumo namboyecuai chira ambuae poromondiisa chupe; acoi poromondiisa Tūpa oyapo Jonás upe güeraño tupri asevara chupe” ehi.

Ichui oseyapaño ava rehii oso.

Fariseo iyavei saduceo porombohesa inungar pan mboapeposa

⁵Evocoyase semimbohe oyepota ipa rovai yuviraso. Pan sui rumo sesarai eté yuvireco. ⁶Evocoyase Jesús aipo ehi chupe: —Peicua catu fariseo iyavei saduceo pan mboapeposa sui —ehi.

⁷Iñehe renduse, semimbohe aipo ehi oyeupe yuvireco:

—iNdayarui eté rumo pan! —ehi-ehi tēi oyeupe yuvireco.

⁸Ahe rumo oicua güemimbohe pīhañemoñetasa. Sese aipo ehi chupe:

—iMahera, “Ndayarui pan” peye! iPe ndapeyeroya tuprii che rese! ⁹¿Ndapeicua vitei vo che rembiapo? ¿Ndapeyemomahenduha vitei eté vo acoi poyandepo pan mboyaho agüer acoi ava cinco mil upendar rese, iyavei mbovi iruova pemboapipo sumbirer imonuhase? ¹⁰¿Ndapeyemomahenduha vitei avei vo acoi amboyaho vahe siete pan ava cuatro mil vahe upe, iyavei mbovi

iruova pemboapipo sumbirer? ¹¹ ¡Too, mara peye rutei pe aipo senducuaēhi! Ndahei mo pan rese ité añehe. Peicua catu fariseo iyavei saduceo pan mboapeposa sui —ehi.

¹² Ahese ramo oicua yuvireco cute, ndahei pan mboapeposa rese ité ñehe, Jesús rumo ñehe fariseo iyavei saduceo eta porombohesa rese tēi.

Pedro oicua uca Jesús Tūpa Rembiporavo secose

¹³ Oyepotase Jesús, oso tecua Cesarea coti Filipino ivi rese, aheve oporandu güemimbohe upe aipo ehi:

—¿Mara ehi vo ava ñehe yuvireco che rese, Ava Riquehir che recose? —ehi.

¹⁴ Semimbohe evocoyase aipo ehi yuvireco chupe:

—Amove ava: “Juan Oporoāpiramo vahe” ehi yuvireco ndeu; ambuae aipo ehi yuvireco: “Elías”; ambuae ava aipo ehi avei yuvireco: “Jeremías”; anise ambuae ava, “Tūpa ñehe mombehugar mboetasa” ehi yuvireco ndeu —ehi.

¹⁵ —Pe no, ¿Ava co secoi’ peye ru pe cheu no? —ehi güemimbohe upe.

¹⁶ —Nde niha Tūpa supi eté vahe Rembiporavo imombehupri; Tahir ité ereico —ehi Simón Pedro.

¹⁷ —Nde sovasapri ereico Simón, Jonás rahir. Esepia, ndahei ava tēi omboyecua co mbahe ndeu, che Ru iva pendar teieté omboyecua ndeu —ehi—. ¹⁸ Nde Pedro ereico, co ita guasu harive amopuhara che tūparoguã. Ñepei yepe manosa ndosecoreroyii chietera opīratasa pipe. ¹⁹ Evocoyase che amondo Tūpa mborerecuasa resendar mboisa ndeu; acoi, “Aviye” erese que mbahe uve co ivi pipe, ēgüe ehi aveira ivave; iyavei, “Aní” erese que mbahe uve co ivi pipe, ēgüe ehi aveira ivave —ehi.

²⁰ Ipare Jesús aipo ehi güemimbohe upe: “ ‘Co Tūpa Rembiporavo Poropīsiosar’ peye eme ava upe cheu” ehi.

Jesús omombehu omano āgua

²¹ Ichuive tupri Jesús omboipi imombehu güemimbohe upe oico: “Iya niha cheu che so āgua tecua guasu Jerusalén ve. Aheve judío rerecuar, pahi rerecuar ivate catu vahe iyavei Moisés porocuita rese oporombohe vahe, ahe che mombaraisu ucara iyavei che yuca ucara yuvireco. Che yucasa sui rumo imombosapisa ari

pipe acuerayevira” ehi. ²²Pedro rumo viraso co cotimi chupe oñhengata ãgua:

—iTüpa ndoipotai eté evocoi nungar nde reco ãgua, che Yar!
iNdipoi chietera mbahe ndeu! —ehi Pedro chupe viña.

²³—iEsiri che sui, Carugar! —ehi Pedro upe—. Nde che reiti pota eve mbahe tẽi pipe. Esepia, nandepihañemoñetai mbahe Tüpa upendar rese, ava nungar tẽi nde pihanemoñeta eico —ehi.

²⁴Ipare aipo ehi güemimbohe upe:

—Acoi oguata pota vahe che rupi, tasesarai mbahe güemimbotar aposa sui iyavei inungar-ra curusu rese ovosiira viña, toyemoingatu voi che recocuer rese oparaisu ãgua iyavei toguata tupri che rupi.

²⁵Esepia, acoi ava güetecuer tẽi raisupar, ocañi tẽi etera; acoi ava omocañi tẽi vahe rumo güetecuer che recocuer rese, ahe oñepisirora.

²⁶Esepia, ¿aviye ai angahu pïha ava upe opacatu mbahe co ivi pipendar pisi ãgua, ahe ae tẽi omocañise güecocuer yuvireco viña?

¿Mbovi pïha omondora ava güecocuer repirã viña? ²⁷Esepia che, Ava Riquehir, ayevira che Ru reco pïratasa pipe che rembiguai iva pendar reseve curi. Che evocoyase aicuara ñepeipei ava rembiapo agüer rupi chupe. ²⁸Supi eté oimera amove cohava ava nomano vitei chivaherã, ahe che, Ava Riquehir, che repia rane itera che yevise che mborerecuasa pipe yuvireco curi —ehi güemimbohe upe.

Jesús ñecuñaro agüer

17 ¹Seis ari pare Jesús viraso Pedro, Santiago, tivri Juan reseve co coti ivitri ivate vahesave oyeupi. ²Aheve, aviyeteramo tẽi oñecuñaro güemimbohe rovai. Evocoyase sendi sova inungar ari, iturucuar morochí, sendi avei. ³Aheseve voi oyemboyecua Moisés, Elías reseve yuvireco chupe. Ahe oñemoñeta oyeupe yuvinoha. ⁴Ahese Pedro aipo ehi chupe:

—Che Yar, iaviye ai eté cohava yaico! Ereipotase, ayapora mbosapi teyupami: ñepeipei ndeu nara, ambuae Moisés upe, ambuae evocoyase Elías upe nara —ehi.

⁵Aviyeteramo tẽi iva quiha rese osesapé ogüeyi ou oyopipa tupri ité. Ipãhuve oyeendu ñehesa aipo ehi: “Co che Rahir, che rembiaisu. Che mboviharete; peyapisaca catu iñehe rese” ehi vahe.

⁶Aipo renduse, semimbohe osiquiyé iteangasa pipe opaño ivi rese oñaca mboya yuvireco ichui. ⁷Ahese oyemboya oso güemimbohe rese, oñatoi aipo ehi chupe:

—Pepūha; pesiquiyei rene —ehi.

⁸ Evocoiyase omahe yuvireco sese, ahese ahe güeraño osepia imoha yuvireco.

⁹ Ipare yuvirogüeyi ivitri sui aipo ehi evocoi mbosapï güemimbohe upe:

—Ndapemombehui chietera que ñepeí ava upe co mbahe pesepia vahe, pemombehura rumo acoi che, Ava Riquehir, acuerayevise voi —ehi.

¹⁰ Evocoiyase semimbohe oporandu yuvireco:

—¿Mahera ru Moisés porocuita rese oporombohe vahe: “Elías rane rumo oura curi” ehi yuvireco? —ehi yuvireco chupe.

¹¹ Evocoiyase omboyeví güemimbohe upe aipo ehi:

—Elías rane ité niha oura opacatu mbahe moingatu ãgua curi.

¹² Ahe rumo ou ité cuese. Ndoicuai rumo ava yuvireco. Amove rumo opacatu güemimbotar tēi oyapo yuvireco sese. Ëgüe ahe aveira niha cheparaisura ahe ava povrive vichico —ehi.

¹³ Evocoiyase semimbohe osenducua ramo iñehe yuvireco. Ëgüe ehi Jesús oñehe Juan Oporoãpiramo vahe rese.

Jesús ombogüera chíhivahe carugar rerecosar

¹⁴ Vïroyepota Jesús güemimbohe ava rehiisave seraso. Aheve mbia oyemboya oso sese, oñenopiha sovai aipo ehi chupe:

¹⁵ —Che Yar, ereiparaisuerecomi tēira che rahir cheu viña.

Esepia, ahe ipiha mbaheasi vahe, oyemombaraisú iteanga. Setá yupagüer oviapi tatave, ive avei no. ¹⁶ Sese aru tēi nde remimbohe upe. Nombogüera catui rumo yuvireco —ehi.

¹⁷ —iToo, ndapeyeroya tupri viteí eté che rese! ¡Co coti tēi vite pe pihañemoñetasa! ¡Mboví rupi rutei vo aico vitera pe pãhuvē che ñemosasa pipe! Peru evocoi chíhivahe cheu —ehi.

¹⁸ Ahese oñehe pīrata carugar upe chíhivahe sui imose. Aheseve ocuera tupri voi eté.

¹⁹ Ipare semimbohe oporandu co cotimi yuvireco chupe:

—¿Mahera pīha ndoromose catui eté carugar ichui? —ehi yuvireco.

²⁰ —Esepia, ndapeyeroya tuprii Tūpa rese. Supi eté sese pe yeroyasa, yepe ndoyavii chira mostaza rāhii tahimi vahe viña, aipo peyera co ivitri upe: ‘Esiri, eso coi coti’ peyera. Evocoiyase ivitri osiriño itera. Ahese ndapemboavaimi chira mbahe. ²¹ Evocoi nungar carugar imosesa yayerurese yande yecuacusa pipe —ehi.

Jesús omombehu iri omano āgua

22 Jesús oguata viteseva Galilea ivi rupi, aipo ehi güemimbohe upe oico:

—Che, Ava Riquehir, imondopri aicora che amotarẽhimbar povrive. 23 Che yuca aveira yuvireco. Acuerayevira rumo imombosapisa ari pipe —ehi.

Osenduse semimbohe aipo ihe, ndovihai tẽi yuvireco.

Jesús omondo guarepochi tũparo uve nara oyeupe oporandu vahe upe

24 Oyepotase Jesús güemimbohe reseve tecua Capernaum ve, aheve guarepochi rerocuarar tũparo upe nara yuviraso Pedro upe, oporandu yuvireco chupe:

—¿Supi eté pe rerecuar ndomondo guarepochi tũparo upe nara? —ehi.

25 —Omboepi niha —ehi Pedro chupe.

Evocoyase oiquese Pedro oi pipe, aheve Jesús rane oñehe chupe aipo ehi:

—¿Mara ehi nde piñañemoñeta, Simón? ¿Ava sui vo virocua guarepochi mborerecuar guasu co ivi pipe yepi? ¿Omu sui piña, ambuae ava sui tie? —ehi.

26 Pedro evocoyase omboyeve chupe:

—Ambuae ava sui —ehi.

—iTaa! —ehi—. Evocoyase mborerecuar povri pendar nomboepi chira yuvireco —ehi—. 27 Guarepochi rerocuarar moñemoiroẽhi āgua rumo, eresora ipa pipe, epirapoi. Acoi yipindar pira erenose vahe, ahe iyuru pipe ereyosura ñepe guarepochi. Ahe eraso chupe. Ipipe iyacatura imboepi āgua yandeu —ehi Jesús Pedro upe.

¿Ava vo seco ivate catu vahe?

18 1 Ahe ari pipeve semimbohe oyemboya Jesús rese yuvireco mbahe rese oporandu āgua chupe:

—¿Uma vo seco ivate catu vahe Tũpa mborerecuasa pipendar? —ehi.

2 Evocoyase Jesús: “Erio” ehi ñepe chihivahemi upe, omondo güemimbohe pãhuve imoha, 3 aipo ehi:

—Supi eté, acoi ndapeñecuñaroise iyavei ndapeicoise chihivahemi nungar, ahese ndapeiquei chira Tupa mborerecuasa pipe. ⁴Acoi oñemomini vahe rumo inungar co chihivahemi, evocoi nungar seco ivate catura Tupa mborerecuasave. ⁵Acoi ava oipisi vahe co chihivahemi nungar che rer pipe sereco, che ité che pisi yuvireco —ehi.

Iparaisu itera ava oporomboangaipa uca vahe

⁶“Acoi que ava rumo omboangaipa uca vahe co chihivahemi nungar che reroyasar, iyacatu evocoi nungar ava ñapichisa ita guasu iyesho rese para guasu pipe imombo agua. ⁷Iparaisu co ivi pipendar che reroyasar omboangaipa uca vahe yuvireco! Che reroyasar upe rumo oimeño itera poroãtoisa yepi, iahe imboangaipa ucasar rumo iparaisu itera!

⁸“Sese inungar pe po, anise que pe pi avei pemboangaipa uca vahe, peyasia, pemombora amombri peyesui viña. Esepia, aviye catu peiquera tecove apirēhisave ñepepe pi, pe po rese, peso rāgüer sui tata guasu apirēhisave ñuvirío pe po, que ñuvirío pe pi reseve. ⁹Iyavei pe resa pe mboangaipa ucase, penose, pemombo amombri peyesui. Esepia niha, aviye catu peiquera ñepeimi pe resa rese tecove apirēhisave, ñuvirío pe resa rese tata guasu apirēhisave pe reique rāgüer sui.

Porombohesa ovesa ocañi tēi vahe resendar

¹⁰“Peroĩroi rene que ñepepe chihivahemi che reroyasar. Esepia, ivave sembiguai che Ru pirindar ité yuvirecoi yepi” ehi. ¹¹“Che niha, Ava Riquehir, ayu ava ocañi tēi vahe pĩsiro agua.

¹²“¿Mara ehi pe pihave? Acoi virecose mbia cien tupri ovesa güeimba, ipare rumo ocañira ñepepe ichui viña, evocoyase oseyá ranera noventa y nueve tēi vahe ovesa ivitri rese. Oyevira ocañi vahe reca oso. ¹³Ipare oyosuse rumo, oviharete catuñora evocoi ovesa rese ambuae noventa y nueve nocañi vahe sui. ¹⁴Ēgüe ehi avei che Ru ivave secoi vahe, ndoipotai eté que ñepepe ava che reroyasar chihivahemi nungar cañi agua” ehi.

Porombohesa yande ñero agua rese

¹⁵“Acoi nde mboetasa Tupa reroyasar oyapose que mbahe tēi ndeu, eresora nde ae, eñehe mbahe ndeu oyavi vahe rese chupe.

Nde ñehe viroyase, ahese peñero oyeupe cute. ¹⁶Nande reroyaise rumo, ahese ereñehera ñepei, anise ñuvirío ava upe nde pñivii água rese. Ahe avei tosendu pe ñehe. Ahese oimera que ñuvirío, anise mbosapi sendusar. ¹⁷Acoi ndoviroyaise pe ñehe, ahese emombehu opacatu Jesús reroyasar upe; ahe ndoviroyaise ité no, evocoyase Tũpa ndoicuai vahe nungar pereco iyavei inungar mbahe-mbahe tẽi aposar, ãgũe peye sereco” ehi.

¹⁸“Supi eté acoi, ‘Aviye’ peyese que mbahe upe co ivi pĩpe; ãgũe ehi aveira ivave. Iyavei co ivi pĩpe, ‘Aní’ peyese que mbahe upe, ãgũe ehi aveira ivave.

¹⁹“Iyavei co amombehu potami avei pẽu: Acoi ñuvirío co ivi pĩpe pe pihañemoñetasa oyoya tuprise que mbahe rese peporandu água pe yeruresa pĩpe, evocoyase che Ru iva pendar omondora pe porandusa pẽu. ²⁰Esepia, acoi ava ñuvirío, que mbosapi oñemonuhase che rer pĩpe yuvireco, aheve che aico ipãhuve” ehi.

²¹Ipare Pedro oyemboya sese oporandu:

—Che Yar, ¿mbovi rupi vo che ñerora che mboetasa mbahe tẽi cheu oyapose? ¿Siete yupagũer rupi pĩha? —ehi.

²²—iAní! —ehi—. ¡Setenta rupi siete oyupagũer! —ehi Pedro upe.

Yembohesa ava niñero potai vahe resendar

²³“Tũpa mborerecuasa inungar mborerecuar guasu omoingatu pota vahe güembiguai revesa chupe. ²⁴Evocoyase omboipĩ imoingatu água, ahese ipñiviisar güeru ireve ati catu vahe guarepochi rese chupe. ²⁵Ahe rumo ndovirecoi imboepĩ água. Sese co mborerecuar oyocuai opñiviisar aipo ehi: ‘Timondopasa co che rembiguai sembireco reseve, tahir iyavei opacatu mbahe vireco vahe reseve irevesa mboepĩpa água cheu’ ehi. ²⁶Evocoyase sembiguai oñenopiha sovai aipo ehi chupe: ‘¡Too! Che rerecuar, eñemosañomi tẽi cheu. Opara niha amboepĩ ndeu’ ehi chupe. ²⁷Ahese oiparaisuereco, opoi irevesa sui.

²⁸“Aheseve voi rumo sembiguai osẽse, osepia ambuae ondugũer oyeupe ndasetu tuprii vahe ireve. Ahe chupe aipo ehi iyesho pisi: ‘¡Emboepĩpa acoi nde revesa cheu!’ ehi. ²⁹‘¡Aní!’ ehi oñenopiha oso sovai, ‘Eñemosañomi tẽi cheu’ ehi, ‘amboepĩpara niha acoi che revesa ndeu’ ehi. ³⁰Niñero potai eté rumo. ‘Tomboepĩpa rane ité orevesa cheu’ ehi soquenda uca. ³¹Osepiase rumo ambuae imboetasa, tasí

iteanga ipiha pipe. Ahese yuviraso omombehu güerecuar uve opacatu sembiapocuer yuvireco. ³² Evocoyase ahe serecuar güeru uca aipo ehi chupe: ‘iMbahe tēi eté nde rembiapo! Che apoiño opacatu nde revesa sui. Esepia, ereyemombaraisu catumi ereporandu cheu.

³³ iNdiyai vo nde avei ereiparaisuereco nde mboetasa viña, inungar che oroparaisuereco!’ ehi. ³⁴ Ichui serecuar oñemoirosave oyocuai imombaraisu ãgua ‘tomboepipa rane ité orevesa cheu’ oyapave.

³⁵ “Indó, evocoyase ãgüe ehi aveira che Ru iva pendar pëu ndapeñeroise ité peyeupe” ehi Jesús güemimbohe upe.

Jesús oporombohe mendasa sui poiēhi ãgua

19 ¹ Ipare Jesús osẽ Galilea sui, oso Judea ivi rupi ari sēsa coti iai Jordán rovai. ² Ava rehii yuviraso saquicuei. Aheve setá imbaheasi vahe ombogüera.

³ Evocoyase oyemboya fariseo Jesús rese yuvireco; secoãhasave oporandu yuvireco chupe:

—¿Aviye pīha opoi cuimbahe güembireco sui que mbahe tēi oyapose? —aipo ehi yuvireco chupe.

⁴ Ahe rumo omboyeve fariseo upe:

—¿Ndapesenducuaimi vo ñehesa icuachiapri pipe peyeroquise: ‘Yipindar yande Aposar oyapo cuimbahe, cuña avei’ ehi? ⁵ Iyavei aipo ehi: ‘Sese niha cuimbahe omendase, oyepepira oyesupa sui güembireco rese ité yuvirecoi ãgua. Evocoyase ñuvirío yuvirecoira ñepei ava nungar’ ehi. ⁶ Sese ndahe iri ñuvirío, ñepei vahe ité yuvirecoira. Evocoyase ava Tūpa omomenda vahe oyese, ndiyai ava tēi omboyepepi yuvireco oyesui —ehi.

⁷ Evocoyase fariseo oporandu yuvireco chupe:

—¿Mahera ru oyocuai Moisés cuimbahe omondo vaherã güembireco upe cuachiar poisa resendar opoi ãgua ichui? —ehi.

⁸ —Pe poreroyaēhisa pipe niha Moisés ãgüe ehi pëu. Yipisuive ité rumo Tūpa ndoipotai oyesui opoi ãgua yuvireco. ⁹ Esepia, acoi opoi vahe güembireco mbahe ndoyavii vahe sui omendase ambuae cuña rese, ahe oyemboaguasa tēi vahe —ehi fariseo upe.

¹⁰ Ipare semimbohe aipo ehi yuvireco chupe:

—Ëgüe ehise cuimbahe güembireco rese, evocoyase aviye catu ndayamendai chira —ehi.

¹¹ —Ndahei chira rumo opacatu osenducua che aipo ahe vahe yuvireco. Tūpa ombou vahe sembiaporã, ahe güeraño

osenducara yuvireco —ehi güemimbohe upe—. ¹²Esepia, oime piñañemoñetasa ava mendaēhi āgua: amove ohasa suive ndatahii vahe, ambuae nomboahi ucai ava yuvireco, ambuae evocoiyase nimendasei. Esepia, ahe oporaviqui pota Tūpa mborerecuasa reseño ité. Acoi oicatu vahe co ñehesa reroya āgua, toviroyaño —ehi.

Jesús osovasa chīhivahe

¹³Ipare ahe pendar güeru moviro chīhivahe Jesús upe yuvireco ‘tomondo opo iharive; toyerure avei sese no’ oyapave; semimbohe rumo, “¿Mahera vo peruño tēi chīhivahe?” ehiño serusar upe yuvireco. ¹⁴Jesús rumo aipo ehi:

—iMahera ndapeipotai iyu āgua! Toyugüeruño chīhivahe cheu. Esepia, co chīhivahe nungar ava yuviroiquera che Ru povrive —ehi.

¹⁵Ipare omondo opo chīhivahe harive osovasa. Ichui osē oso.

Mbia chīhivahe imbahe eta vahe omoñeta Jesús

¹⁶Mbia chīhivahe mbahe yar oso Jesús upe oporandu:

—Porombohesar, ¿mbahe vo aviye vahe ayapora tecovesa apirēhi vahe rereco āgua? —ehi.

¹⁷—iMahera ereporandu cheu mbahe aviye vahe rese! —ehi—. Ñepeño ité aviye vahe oime. Erereco potase rumo tecovesa apirēhi vahe, emboyeroya mborocuaita —ehi.

¹⁸—¿Uma vo aipo mborocuaita? —ehi.

Ahese omboyevi chupe:

—‘Ndereporoyucai chira, nandeaguasai chira, nandemondai chira, nanderemirai chaveira ambuae ava rese, ¹⁹eremboyeroyara nde ru, nde si avei, eresaisura ambuae ava nde yeaisu nungar eico’ ehi icuachiapri pipe —ehi mbahe yar upe.

²⁰—Co rumo mborocuaita opacatu amboaviye ité yepi. ¿Mbahe vo evocoiyase ipane vite che ayapo vaheerā? —ehi.

²¹—Ereipotase mbahe tupri pipe nde reco āgua, emondopa rane nde mbahe; ahe sepi evocoiyase eremondora ava iparaisu vahe upe. Ichui ererecora mbahe aviye vahe ivave. Ipare ereguatara che rupi —ehi chupe.

²²Aipo oyeupe hese rumo, ahe mbia oyepepiño ichui oviharēhisave oso. Esepia, mbahe yar ité secoi.

²³Evocoyase aipo ehi güemimbohe upe:

—Supi eté yavai eteanga imbahe eta vahe upe oique vahe^{rã} che Ru mborerecuasave. ²⁴Aipo ahe iri: Yavai rai camello upe yucuar rupi seique ãgua; ava imbahe eta vahe upe rumo yavai catu che Ru mborerecuasave seique ãgua —ehi.

²⁵Aipo ñehesa renduse, semimbohe oyepihamondii aipo ehi:

—iAva angahu pñha evocoyase oñepisirora yuvireco viña! —ehi yuvireco.

²⁶Omahe güemimbohe rese, aipo ehi:

—Ava tẽi upe yavai aipo nungar mbahe apo. Tũpa upe rumo mbahe opacatú ndayavaimi eté —ehi.

²⁷Ahese Pedro aipo ehi chupe:

—Ore rumo oroseyapa opacatu ore mbahe nde rupi ore guata ãgua. ¿Mbahe evocoyase oimera oreu? —ehi.

²⁸—Oime itera niha mbahe pẽu. Esepia, acoi ari oyepotase opacatu mbahe recuñaro ãgua, ahese che, Ava Riquehĩr, aguapira che rendave che mborerecuasave. Pe avei, che rupindar, peguapira doce tenda harive. Ahese opacatu judío acoi doce imar Israel suindar recocuer rese peporandura curi. ²⁹Acoi opacatu ava oseya vahe güeta, anise que viquehĩr, anise vivri, güeindri, que vu, anise osi, guahĩr, que oivi avei che raisusa pipe, ahe oipisira omahera cien yupagũer rupi mbahe oseya vahe iyavei virecora tecovesa apirẽhi vahe. ³⁰Seta vai rumo cũritei yipindar vahe, ipa tẽira yuvirecoi; setã aveira cũritei ipa tẽi vahe, yipindar yuvirecoira curi —ehi.

Yembohesa oporaviqui vahe resendar

20 ¹“Tũpa mborerecuasa inungar acoi ava ivi yar osẽ añihiveive oyeupe nara oporaviqui vahe reca ‘toporaviqui che uva tive yuvireco’ oyapave. ²Oyosuse ava, ahese omoingatu oyeupe oporaviqui vahe^{rã} upe ñepeⁱ ari mboraviqui repri imboepi ãgua. Ahese opa omondo ocove imboporaviqui. ³Ipare osẽ, oso añihivei, arivate catumi osepia ocarusu pipe ambuae ava oporaviquisa ndovirecoi vahe, ⁴aipo ehi chupe: ‘Peso, tapeporaviqui che uva tive. Amboepi tuprira niha pẽu’ ehi. Ahe evocoyase yuviraso oporaviqui ãgua icove. ⁵Ipare oso iri mbiter ari rupi oyeupe oporaviqui vahe reca, ãgũe ehi tupri avei caharuse, las tres rupi. ⁶Ipa osẽ iri las cinco pipe, aheve avei osepia ambuae

ava ndovirecoi vahe oporaviquisa yuvinoha. Chupe aipo ehi: ‘¿Mahera peyembohi tēi ari momba cohave pehā?’ 7 ‘¡Aní!’ ehi yuvireco, ‘Esepia, ndipoi eté ava, tapeporaviquimi, ehi vahe oreu’ ehi. Evocoyase, ‘Peso, pe avei peporaviqui tive’ ehi. 8 “Pĩtu ramose, cove yar aipo ehi oporaviqui vahe rese yangarecuar upe: ‘Eñehapa ava oporaviqui vahe upe. Emboepi ipa yugüeru vahe upe rane iporaviqui yuvireco chupe. Ipare tenonendar uve’ ehi. 9 Evocoyase las cinco pipe yuviroique vahe oporaviqui, ahe rane tenonde yugüeru. Oyacatu ñepepei-pei ñepepei ari rupindar oipisi guarepochi yuvireco. 10 Ipare tenonde catu yuviroique vahe oporaviqui, ahe chupe ipa tēi imboepisa. Ahe ipihañemoñeta, ‘Yaipisi catura revo guarepochi’ ehi oyeupe yuvireco viña. Ipare rumo ahe tupriño avei oipisi ñepepei ari rupindar yuvireco. 11 Guarepochi pisire rumo oñemoiro cove yar upe yuvireco, 12 aipo ehi: ‘Co ava yugüeru ipa tēi vahe, ñepepei horami tēi oporaviqui yuvireco. Nde rumo eremboepi oyoya tupriño ité oreu eremboepi vahe rese. Oroñemosañ tēi oroporaviqui ari momba sacucuer upe oroico’ ehi. 13 Cove yar rumo aipo ehi ñepepei ipāhu pendar upe: ‘Mbori, ndahei mbahe tēi ayapo ndeu. Esepia, amboepi guarepochi ñepepei ari resendar ndeu acoi, Aviye, peye vahecuer rese cheu’ ehi. 14 ‘Evocoyase ndo co, eipisi nde guarepochi, eraso. Che rumo amondo pota co ava ipa tēi oique vahe upe inungar tupri ndeu amboepi. 15 Esepia, cheu iyacatu ité che remimbotar rupi mbahe ayapo che guarepochi rese. Nderecatēhi tie ambuae ava mbahe rese che ayapose mbahe aviye vahe chupe’ ehi.

16 “Indó, ěgüe ehi aveira ava seco ivi coti catu vahe seco ivate catura yuvireco; iyavei yipindar ava seco ivate catu yuvirecoi vahe, ahe seco ivi coti catu tēi vaheṛã yuvireco curi” ehi güemimbohe upe.

Jesús omombehu iri omano āgua

17 Jesús oguata oso tecua Jerusalén piar rupi. Ahese co cotimi oipeha güemimbohe doce vahe oyeupe aipo ehi chupe:

18 —Peyapisaca tupri che ñehe rese: yasora tecua Jerusalén ve. Aheve che, Ava Riquehir, che pisira, che mondo pahi eta rerecuar iyavei Moisés porocuita rese oporombohe vahe povrive yuvireco. Ahe, “Tomano” ehira yuvireco cheu. 19 Ipare che mondora ava ndahei vahe yande mu upe mara-mara tēi che rereco

ãgua che roeroĩrosa pipe. Ipípe che yucara curusu rese yuvireco. Imombosapisa ari pipe rumo acuerayevira —ehi.

**Santiago, Juan si oporandu Jesús upe
mbahe rese omembri upe nara**

²⁰ Ipare Zebedeo rembireco ñuvirío omembri reseve, oyemboya Jesús rese yuvireco. Ahese oñenopiha sovai oporandu ãgua mbahe rese. ²¹ Evocoyase,

—¿Mbahe vo ereipotami? —aipo ehi ichi upe.

—Che aipota che membri eremboguapira ndeyepiri ñepeí nde mbahe rese pocosa coti, ambuae nde mbahe rese pocoẽhisa coti nde mborerecuasave —ehi chupe.

²² —Pe ndapeicuai mbahe rese peporandu. ¿Peiporara catura pĩha co mbahe-mbahe tẽi aiporara vaheerã, inungar-ra que igua iro vahe aihu vaheerã viña? —ehi.

—Taa, oroicatuño itera —ehi yuvireco.

²³ —Supi eté peiporarara mbahe-mbahe tẽi. Co rumo ndiyai cheu, che piri opomboguapĩ ãgua che mbahe rese pocosa coti, ambuae che mbahe rese pocoẽhisa coti avei. Che Ru rumo omoingatu güembiporavo upe nara oguapi vaheerã che ipive —ehi.

²⁴ Aipo iñehesa renduse ore ambuae diez semimbohe, oroñemoiro Santiago, Juan upe avei. ²⁵ Evocoyase, “Perio” ehi oreu.

—Peicua niha acoi mborerecuar guasu yuvirecoi vahe Tũpa cuaparẽhi oporocuai oporoyuca ai tẽisa pipe, iyavei acoi ivate catu vahe oyecoapirasá omborerecuasa pipe yepi. ²⁶ Pe rumo ãgüe ndapeyei chira peico. Iyacatu rumo acoi ava oipota vahe ivate catu güeco ãgua pe pãhuve, ihañeco rane itera opacatu ambuae ava rese. ²⁷ Iyavei acoi pe pãhu pendar oipota vahe tenonde catu güeco ãgua, ihañeco tupri ranera opacatu pe pãhu pendar rese. ²⁸ Esepia, che, Ava Riquehir, ayu ndahei ava che rese ihañeco ãgua, che rumo ayu ava rese che hañeco ãgua iyavei amano vaheerã ava eta repirã Carugar povri sui senose ãgua —ehi.

Jesús ombogüera ñuvirío ndasesapisoi vahe

²⁹ Ipare Jesús, güemimbohe reseve oñocuase tecua Jericó yuvireco, ahese ava rehii yuviraso saquicuei. ³⁰ Aheve peri popive ñuvirío ava ndasesapisoi vahe oguapi yuvinoi. Evocoyase osenduse Jesús ocuase supi, osapucui pĩrata yuvireco chupe aipo ehi:

—iOre Yar, mborerecuar guasu David suindar, ore paraisuerecomi tēi eve! —ehi yuvinoi.

³¹Ahe ava oyaca-yacaño: “Quiriri” ehi yuvireco chupe. Ahe rumo osapucaí pĩrata catuño ité yuvireco aipo ehi:

—iOre Yar, David suindar, ore paraisuerecomi tēira eve viña! —ehi iriño ité yuvireco.

³²Evocoyase osendu ñeche, opita, “Perio” ehi chupe. Ipare, —¿Mbahe vo peipota ayapo vaherã pēu? —ehi.

³³—iOre Yar, ore mbosarecomi tēi eve! —ehi.

³⁴Evocoyase saísusave opoco sesa rese. Ahe ramoseve ndasesapisoí vahe osareco tupri ai eté yuvireco. Ipare yuvirasoño ité supí.

Jesús oiique Jerusalén pipe

21 ¹Acoi orovirovise Jerusalén, oroyepota tecuami Betfagé popive, ivitri Olivo serer vahe ñipiimi. Aheve omondo ñuvirío güemimbohe ²aipo ehi chupe:

—Peso co tecuami yande rovaingarve. Aheve pesepiara guaricu imembri reseve ñapichimbri imoha. Ahe peyorañora seru cheu.

³Acoi que ava oporanduse yuvireco pēu sese, “Yar oiporu pota, ipare niha omboyevi voiñora” peyera chupe —ehi güemimbohe upe.

⁴Co ãgüe ehi chupe arachendar Tũpa ñeche mombehúsar ñehengagüer mboaviye ãgua, aipo ehi vahe:

⁵“Pemombehu Sión pendar upe:

‘Pesepia, pe rerecuar guasu ou oico güeco mbegüesa pipe pēu guaricu harive imembri reseve’ peyera” ehi.

⁶Evocoyase evocoi semimbohe yuviraso, oyapo ité ocuaisa yuvireco. ⁷Güeru guaricu imembri reseve yuvireco chupe. Omondo oturucuar icupeao ãgua yuvireco. Ipare Jesús oyeupi iharive.

⁸Iyavei ava rehii oipipira oturucuar peri rupi imboetei guasusa pipe. Ambuae evocoyase oyasia pindo omondo peri rupi yuvireco saperã. ⁹Ava rehii senonde, saquicuei avei oguata vahe osapucaí yuvireco aipo ehi:

—iCo mborerecuar guasu David suindar, imboeteipri tasecoi! —ehi—. ¡Sovasapri secoi ou vahe yande Yar rer pipe! ¡Ivave imboeteipri tasecoi! —ehi yuvireco.

¹⁰Oiqueste Jerusalén pipe, opacatu co tecua pipendar oyepihamondii yuvireco. Iyavei setá oporandu-randu yuvireco:

—¿Ava p̄ha co mbia? —ehi t̄i yuvireco.

¹¹ Ava rehii uguata vahe Jesús rupi aipo ehi yuvireco chupe:

—Co niha Jesús, T̄pa ñehe mombehusar, ivi Galilea rupindar, Nazaret pendar —ehi yuvireco chupe.

Jesús omombopa ava mbahe mboepisar t̄paro pipe sui

¹² Ipare Jesús oi que judío t̄paro guasu pipe. Ipipendar opa omombo ichui ava mbahe mondosar, mbahe rerocuasar. Iyavei ava guarepochi recuñarosar mesa opa omboviapi ichui; apicasu mondosar renda avei omboviapi imondo. ¹³ Ipare aipo ehi chupe:

—Icuachiapri arachendar pipe aipo ehi: ‘Che r̄ta yeruresa r̄tarã’ ehi. Pe rumo imonda rai vahe r̄ta nungar t̄i pereco —ehi.

¹⁴ Aheve oyemboya Jesús rese yugüeru ava ndasesapisoi vahe, ip̄ri-p̄ri vahe avei. Ahe opa ombogüera. ¹⁵ Osepiase rumo pahi rerecuar guasu iyavei judío porocuaita rese oporombohe vahe yuvireco mbahe ndayasepiai vahe sembiapo, iyavei t̄paro pipe osenduse ch̄hivahe sapucaisa: “iImboeteipri David suindar tasecoi!” ehise, ahese oñemoiro yuvireco ¹⁶ aipo ehi chupe:

—iEresendu vo aipo ehi t̄i vahe ch̄hivahe yuvireco! —ehi.

—Taa, asendu ité —ehi—. Pe no, ¿ndapeyeroquii vo sesendar ñehesa icuachiapri pipe:

‘Ch̄hivahemi, p̄tanimi avei osapucaira nde mboeteisa pipe yuvireco’ ehi vahe? —ehi.

¹⁷ Ipare opaño oseya ava oso tecua Betania ve. Aheve ñepei p̄tu oque.

Jesús omomara ivira higuera ndihai vahe oñehe pipe

¹⁸ Ahere ayihive añihiveive, oyevise tecua Jerusalén ve, Jesús ndasiepoi oico. ¹⁹ Aheve peri popive osepia ivira higuera. Ahe sese oyemboya oso ‘¿iha p̄ha?’ oya viña. So güeraño t̄i rumo osepia. Evocoyase ahe aipo ehi chupe:

—iCo pipe suive nandehai chietera! —ehi.

Aheseve voi opa ipiru. ²⁰ Ahe mbahe repiase, ore,

—iToo, mara ehi rutei p̄ha co c̄riteimi opa voi ipiru! —orohe t̄i chupe.

²¹ Ahese omboyevi oreu:

—Acoi peyeroyase ité T̄pa rese, ahese ndahei co mbahe güeraño peyapora. Co ivitri uve avei rumo: ‘Esiri ave sui, eso para guasu

pipe' peyese, ahe evocoyase osiriño itera. ²²Indó, acoi peyerurese mbahe pe porandusa rese Tūpa rese pe yeroyasa pipe, peipisi itera ahe mbahe —ehi.

Jesús mborerecuasa

²³Ichui Jesús oique iri judío tūparo guasu pipe oporombohe. Ahese pahi eta rerecuar, judío rerecuar avei oyemboya sese, oporandu yuvireco chupe:

—¿Ava nde cuaita pipe vo ereyapo co nungar eico? ¿Ava vo ombou nde mborerecuarã ndeu? —ehi.

²⁴Evocoyase ahe aipo ehi chupe:

—Che avei aporandura mbahe rese pëu. Pemboyevisé che porandusa, ahese che avei amombehura ava porocuita rupi eté pīha ayapo co mbahe vichico. ²⁵¿Ava vo Juan ombou ava āpiramo āgua? ¿Tūpa pīha, ava tēi tie? —ehi.

Evocoyase oñemoñeta aipo ehi oyeupe yuvireco: “Tūpa ombou yahese chupe, ahe evocoyase omboyevíra yandeu: ‘¿Mahera ru evocoyase ndaperoyai?’ ehira. ²⁶Anise, ‘Ava tēi remimbou’ yahese rumo, aviyeteramo opacatu ava yande amotarēhira yuvireco. Esepia, opacatu: ‘Juan omombehu vahe ñehesa Tūpa suindar’ ehi eté yuvireco chupe” ehi. ²⁷Sese,

—Ndroicuai eté Juan mbousar —ehiño yuvireco.

Ahese ahe aipo ehi:

—Evocoyase che avei, “Ahe iporocuita pipe co mbahe ayapo” ndahei chietera pëu —ehi mborerecuar guasu upe.

Ñuvirío ava rahír recocuer sui yembohesa

²⁸Iyavei Jesús aipo ehi judío rerecuareta upe:

—¿Mara ehi pe pīhañemoñetasa co rese? Oime mbía víreco vahe ñuvirío guahír. Ahe aipo ehi ocuacua catu vahe upe: ‘Che rahír, co pipe eresora, eporaviqui cove’ ehi. ²⁹‘iNachequerēhii!’ ehi voiño. Coiye rumo, ‘¿Mahera ēgüe ahe?’ ehi. Ipare osoño ité, oporaviqui.

³⁰Ipare oso ambuae guahír upe: ‘Eresora, eporaviqui cove’ ehi tupri avei. Evocoyase, ‘Asora, che ru’ ehi angahu. Ipare rumo ndosoi eté.

³¹¿Uma vo co ñuvirío yuvirecoi vahe oyapo vu remimbotar? —ehi.

—Co yipindar vahe —ehi yuvireco.

—Supi eté. Esepia, co angaipa viyar mbahe-mbahe tēi aposar, cuña oyemondo-mondo tēi vahe avei, ahe rane yuviroiquera

Tūpa mborerecuasave pe sui. ³²Esepia, Juan Oporoãpiramo vahe ou co tecocuer ihīvi vahe mboyecua āgua pēu pe reco tupri āgua viña. Pe rumo ndaperoyai eté. Co angaipa viyar iyavei co cuña oyemondo-mondo tēi vahe ava upe, ahe rumo viroya ité yuvireco. Yepe pesepia tēi opacatu evocoi mbahe viña, ipare rumo ndapeñecuñaroi pe recocuerai sui seroya āgua —ehi mborerecuar guasu yuvirecoi vahe upe.

Ava mbahe tēi oporaviqui vahe recocuer sui yembohesa

³³“Pesendu ambuae ava recocuer rese yembohesa: Oime ivi yar oñoti vahe uva oivi pipe, ahe oñachi tupri sereco, oyapo uva riāvii āgua; oyapo avei oi ivate vahe ahe sese mahemoha āgua. Ipare oseya oivi ava oporaviqui vahe upe iporu āgua. Ichui osē oso amombri vahesa rupi. ³⁴Coiye oyepotase ari uva pohosa, ahese omondo güembigui oporaviqui vahe upe imboporandu āgua ‘taipisi uva pohopri cheundar cute’ oyapave viña. ³⁵Ipare rumo oporaviqui vahe oipisi sembiguai yuvireco: amove oinupa-nupa yuvireco, amove oyuca, oyapi-yapi avei amove ita pipe yuvireco. ³⁶Ipare rumo ivi yar setá catu omondo iri güembigui. Oporaviqui vahe rumo mara-mara tēiño avei vireco yuvireco.

³⁷“Coiye rumo guahir teieté omondo chupe cute. Ahe ipihañemoñeta: ‘Omboyeroya catura revo che rahir yuvireco’ ehi viña. ³⁸Evocoyase ahe ava tahir repiase, ‘Co aipo oipisira vu mbahe; yayucaño, evocoyase co ivi opitara yandeu nara’ ehi oyeupe yuvireco. ³⁹Evocoyase oipisi, vinose miti pāhu sui, oyuca ité yuvireco” ehi.

⁴⁰“Acoi ouse ivi yar, ¿mbahe vo oyapora oporaviqui vahe upe?” ehi oñehe rendusar upe.

⁴¹Ahe evocoyase,

—Opara revo oyuca saisuēhisa pipe ité co ava ndipihai vahe yuvireco. Ipare revo omondora oivi ambuae ava oporaviqui vahe uve iporu āgua ‘ahe tombou voimi uva ipohopirer cheundar cheu curi’ ohesa pipe —ehi yuvireco.

⁴²Aipo ihe pare, aipo ehi oñehe rendusar upe:

—¿Ndapeyeroqui vo co aipo ehi vahe icuachiapri pipe?

‘Co ita oi aposar opaño omombo yuvireco.

Ahe ita rumo aviye catu vahe oi moviracua tupri āgua.

Ēgüe ehi niha Yar yapo yande mohapisi ai eté’

ehi icuachiapri pipe. ⁴³Sese che Ru Tūpa mborerecuasa serocuasara pe sui. Ambuae ava upe rumo imondosara. Ahe virasora che Ru mombaheesa chupe. ⁴⁴Acoi que oviapi vahe evocoi ita harive, opa tēira ahe ae oyemomara; iyavei acoi oviapise evocoi ita que ava harive, ahese opa tupri aveira omocañi —ehi Jesús oñehe oyese.

⁴⁵Acoi osenduse pahi rerecuar iyavei fariseo yuvirecoi vahe, osenducua oyesendar ñehesa yuvireco. ⁴⁶Aheseve oipisi pota voi yuvireco viña. Osiquiyeño rumo ava rehii sui yuvireco. Esepia, opacatu ava ipihañemoñeta: “Co ité Tūpa pīratasa pipe oñehe” ehi yuvireco chupe.

Jesús oporombohe carusa mendasa resendar rese

22 ¹Ipare Jesús oporombohe iri ambuae ava recocuer rese aipo ehi:

²“Tūpa omborerecuasave inungar mborerecuar guasu guahir mendase oyapo pieta. ³Ipare oyocuai güembiguai eta ‘ava ichohopri upe toyugüeru cute’ oya. Ichohopri rumo niquerēhi iri yugüeru aheve. ⁴Ipare oyocuai iri ambuae güembiguai eta aipo ehi: ‘Aipo peyera ichohopri upe: ¡Toyugüeruño ité! Esepia, opa ité oingatu tembihu iyavei ayuca uca tivi iyavei ambuae mbahe mimba iquira vahe. Che opacatu amoingatu. Sese toyugüeruño ité mendasave, ehi, peyera chupe’ ehi güembiguai upe. ⁵Ichohopri rumo ndoviroyai eté yuvireco. Evocoiyase ñepeí osoño ocove, ambuae oso ombahe movendesave, ⁶ambuae rumo oipisi sembiguai mara-mara tēi sereco ãgua. Ahe ipipe oyuca yuvireco. ⁷Evocoiyase mborerecuar guasu oñemoiro eteprisave omondo osundao eta co ava oporapichi vahe yuca uca ãgua, iyavei secua rapipa ãgua. ⁸Ipare aipo ehi ambuae güembiguai eta upe: ‘Opa oingatu tembihu mendasave. Co rumo yipindar ichohopri, ndiya iri chira yugüeru vaheñã cohava. ⁹Sese peso opacatu ava guata catusa rupi, peñehe mendasave yugüeru vaheñã opacatu pe rovaichisar upe’ ehi. ¹⁰Evocoiyase sembiguai eta yuvinosepa yuvirasosocar rupi. Ahe osovaichi vahe setá omonuha yuvireco que seco tupri vahe, seco rai vahe avei; ãgüe ehi ava savapipo tupri oi guasu mendasave yuvireco.

¹¹“Evocoiyase acoi mborerecuar oi que ava ichohopri repia. Ipare omahecua tupri ñepeí ava ipãhu pendar rese. Ahe rumo ndomondei

turucuar mendasa resendar. ¹²Evocoyase aipo ehi chupe: ‘Che mboripar, ¿mara ere eique ave co turucuar mendasa resendar porēhi?’ ehi. Ahe rumo noñehiño ité chupe. ¹³Evocoyase, ‘Peipisi co mbia, peñapichi ipi, ipo avei, pemose ocarve pītumimbisave. Aheve oyaseho tēira, sāitere-tere tēira mbaherasicuer rereco’ ehi ichohopri rese hañecosar upe. ¹⁴Esepia, setá tēi ichohopri, moviromi tēi rumo iporavopri ipāhu sui” ehi mborerecuareta uve.

Fariseo osecoña iri tēi Jesús guarepochi rese yuvireco

¹⁵Ipare fariseo oñemonuha, ipihañemoñeta yuvireco oyeupe Jesús ñehe yavi uca āgua mborerecuar rovai imomara-mara tēi āgua.

¹⁶Ahe evocoyase omondo moviro ovoya yuvireco mborerecuar Herodes rupindar reseve Jesús upe. Ahese aipo ehi angahu chupe:

—Porombohesar, ore oroicua nde supi eté vahe mbahe eremombehu eico iyavei ereporombohe mbahe supi tupri vahe Tūpa recocuer rese. Nde niha ndereroyai vahe ava ñehesa tēi. Esepia, ava pihañemoñeta rupi ndereicoi vahe; nde pihañemoñeta rumo ñepeí reseve erereco. ¹⁷¿Mara ehi nde pihañemoñeta?

¿Aviyera piha yamondo guarepochi rese oporanduse Roma pendar mborerecuar ivate catu vahe upe viña, aní tie? —ehi yuvireco.

¹⁸Oicua rumo fariseo pihañemoñeta raisa. Sese aipo ehi chupe:

—Pe seco tupri angahu tēi vahe peico. ¡Mahera che moingue pota mbahe tēi pipe peye! ¹⁹Pemboyecua ru ñepeí guarepochi mborerecuar guasu upendar cheu —ehi.

Evocoyase güeru yuvireco chupe.

²⁰—¿Ava rahanga vo co guarepochi rese chini iyavei ava rer vo co chini sese no? —ehi.

²¹—Roma pendar mborerecuar guasu —ehiño fariseo yuvireco chupe.

—Pemondora evocoyase mborerecuar upe mbahe chupendar, Tūpa upendar mbahe evocoyase pemondora Tūpa upe —ehi fariseo upe.

²²Osenduse, oyepihamondii tēi yuvireco. Evocoyase yuvinose yuviraso ichui.

Saduceo oporandu Jesús upe cuerayevisa rese secoñasave

²³Ahe ari pipe saduceo “ndipoi eté cuerayevisa” ehi vahe yugüeru Jesús upe, oporandu tēi angahu yuvireco chupe:

24—Porombohesar, Moisés aipo ehi aracahe:

‘Que cuimbahe omanose guahiêhiseve, ahese tivri omendara sembirecocuer rese ahe viquehir omano vahecuer upe nara tahirã oico’ ehi —ehi yuvireco chupe—.

25 Cohave, ore pãhuve, oime siete tupri oyesuindar pãve yuvirecoi vahe. Yipindar vahe omenda. Ipare omanoño guahiêhiseve. Evocoyase tivri omenda sembirecocuer rese. 26 Ahe omano guahiêhiseve avei no. Ëgüe ehi avei opacatu ambuae tivri, omano avei guahiêhiseve yuvireco. 27 Opacatu imano pare, cuña avei omano cute. 28 Evocoyase opase ocuerayevi yuvireco, ¿uma rese ité pïha opitara ahe cuña? Esepia, opacatu niha omenda yuvireco sese —ehi saduceo yuvireco chupe.

29—Pe pïhañemoñetasa co coti tēi eté. Esepia, ndapeicuai eté Tūpa ñehe icuachiapri aracahendar, ndapeicuai avei Tūpa pïratasa —ehi—. 30 Esepia, acoi omano vahe ocuerayevise, chupe ndipo iri chira mendasa. Ahe rumo Tūpa rembiguai ìva pendar nungar yuvirecoira ìvave —ehi—. 31 Co cuerayevisa resendar rumo amombehura pēu. Aviye ndapeyeroquii anga vahe acoi Tūpa omombehu vahecuer rese. Supi eté ahe aipo ehi aracahe: 32 ‘Che Abraham, Isaac iyavei Jacob Tūpa aico’ ehi. ¡Tūpa ndahei omano vahecuer Tūpa, ahe rumo oicove vahe ité Tūpa secoi! —ehi.

33 “¡Too!” ehi ava rehii. “¡Mara ehi rutei iporombohesa!” ehi tēi yuvireco.

Porocuita aviye catu vahe

34 Ipare fariseo oyanduse yuvireco Jesús omonguiriripañoose saduceo oyesui, ahese oñemonuha yuvireco. 35 Ñepeipãhu pendar Moisés porocuita rese oporombohe vahe, ahe oyemboya oso Jesús rese oporandu ‘toyavi oñehe Moisés porocuita sui yandeu’ oyapave viña:

36—Porombohesar, ¿uma ité vo porocuita aviye catu vahe opacatu ambuae porocuita sui? —ehi.

37 Evocoyase ahe aipo ehi chupe:

—‘Eresaisura nde Yar Tūpa opacatu nde pïhañemoñetasa pipe, opacatu nde recocuer pipe, nde yapisacasa pipe avei’ ehi. 38 Co porocuita aviye catu vahe ambuae porocuita sui. 39 Imoñuviriosa inungar tupri avei aipo ehi no: ‘Eresaisura ambuae ava nde yeaisu nungar’ ehi. 40 Co ñuvirío porocuita rupi oguata opacatu

Moisés porocuita icuachiapri, opacatu Tūpa ñehe mombehúsar rembicuachía avei —ehi.

¿Ava suindar pīha Poropīsirosar?

⁴¹Fariseo ñemonuha viteseve, ⁴²Jesús oporandu chupe:

—¿Mara ehi pepihañemoñeta acoi Tūpa Rembiporavo ou vaherã ava pīsiro ãgua rese? ¿Ava suindar-ra pīha secoi? —ehi.

—Ahe niha David suindar secoira —ehi fariseo yuvireco chupe.

⁴³Ahese aipo ehi fariseo upe:

—¿Mahera pīha evocoyase David oñehese Espíritu pīratasa pipe aracahe, “Che Yar” ehi chupe? Esepia, ahe aipo ehi:

⁴⁴‘Yar aipo ehi che Yar upe:

Eguapí che acato coti acoi che amondose voi eté nde

amotarēhimbar nde povrive yuvireco’

ehi David aracahe. ⁴⁵Evocoyase, ¿mahera ru: “Poropīsirosar David suindar secoira” peye, David teieté, “Che Yar” ehise chupe? —ehi fariseo upe.

⁴⁶Evocoyase ndoicatu iri imboyeve ãgua yuvireco cute. Ahe arí pipe sui ndipo iri que ñepe iquerēhi vahe iñehe avi uca ãgua oñehe pipe yuvireco.

**Jesús oicua uca fariseo iyavei Moisés porocuita
rese oporombohe vahe recocueraí**

23 ¹Ipare Jesús aipo ehi ava eta upe, oreu avei no:

²“Co Moisés porocuita rese oporombohe vahe iyavei fariseo eta, ahe icuita Moisés porocuita mombehu tupri ãgua yuvireco. ³Sese iya peroyaño ité iyavei peyapo opacatu mbahe semimombehu; aní chira rumo peyapo mbahe sembiapo ai. Esepia, omombehu tupri tēi mbahe viña, ipare rumo co coti tēi mbahe oyapo yuvireco. ⁴Iyavei omondo porocuita inungar mbahe ndayasupi catui vahe ava upe ‘tomboaviye opacatu ité yuvireco’ oya. Ahe ae rumo nomboaviyei eté que ñepe oporocuita yuvireco no. ⁵Oyapo angahu mbahe opacatu ava rembiepiave yuvireco yepi ‘tayande repia yuvireco’ oyapave tēi. Osiva rese, oyiva rese avei ipe guasu vahe vireco-reco tēi oturucuar rese Tūpa Ñhengagüer cuachiapri yuvireco. Iyavei ipi catu vahe oturucuar popi moaro ãgua omondo yuvireco. ⁶Oipota carusa rupi güenara aviye catu vahe yuvireco, oseca avei tenda porañete catu vahe güenara

otūparo pipe yuvireco no. ⁷Oipota avei ava oyeupe ‘avirave’ apo āgua omboetisave ocar rupi iyavei oipota, ‘Porombohesar’ oyeupe he yuvireco.

⁸“Pe rumo, ‘Porombohesar’ ndapembohe ucai chira ava peyeupe. Esepia, pe opacatu guasu peyeivri peico, iyavei ñepeño ité pereco pe Mbohesar. ⁹Iyavei, ‘Che ru’ ndapeyei chira que ava co ivi pipendar tēi upe. Esepia, ñepeño ité pe Ru pereco, ahe niha iva pendar. ¹⁰Ndiyai avei, ‘Mborerecuar’ pembohe uca ava peyeupe. Esepia, Poropīsirosar güeraño ité pe rerecuar secoi. ¹¹Acoi ava seco ivate catu vahe, ahe toporopītivii güeco mbegüesa pipe. ¹²Esepia, acoi oyemboivate ai vahe opara seco reroyisa, iyavei acoi ava seco mbegüe vahe, ahe seco mboivate catusara curi.

¹³“iPeparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe peico! Pemombitaño ava Tūpa povrive seique rāgüer sui peico yepi. Pe avei eté ndapeiquei ipovrive, iyavei acoi yuviroique pota vahe pemombitaño seique rāgüer sui.

¹⁴“iPeparaisu catu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe peico! Esepia, perocua-rocuano tēi cuña imer mano vahecuer rēta ichui, ipare peyeroqui tupri tēi angahu ava rembiepiave. Sese peipisira Tūpa ñemoirosa ipirata catu vahe curi.

¹⁵“iPeparaisu catu itera pe Moisés porocuita rese oporombohe vahe, pe avei fariseo, pe guata tēi angahu vahe Tūpa rese! Peguata opacatu ivi rupi iyavei para guasu rovai rupi ava mbohe. Ipare rumo pe remimbohecuer mbahe tēi catu pe sui. Pe nungar carugar ratave nara tēi pereco uca.

¹⁶“iPeparaisu catu itera, pe ava mbohesar ndasesapisoi vahe nungar peico! Pe aipo peye tēi vahe: ‘Yamombehuse mbahe tūparo rer pipe yande ñehe mboaviye āgua, ēgüe yahe tēi eté; co rumo yamombehuse mbahe oro tūparo pendar rer pipe, ahese iya itera yamboaviye yepi’ aipo peye tēi. ¹⁷iPe ndapembahecuai vahe nungar, ndasesapisoi vahe nungar avei peico! ¿Uma vo aviye catu vahe: oro pīha, anise tūparo tie? Tūparo pipe niha oro rovasasa yepi. ¹⁸Iyavei co uve avei aipo peye tēi peico: ‘Yamombehuse mbahe seropovēhepri renda rer pipe yande ñehe mboaviye āgua, ēgüe yahe tēi eté; co rumo mbahe yamombehuse mbahe seropovēhepri renda hari pendar rer pipe yande ñehe mboaviye āgua, ahese iya

ité yamboaviyera yande ñehe yepi' aipo peye tēi. ¹⁹iPe ndasesapisoi vahe nungar peico yepi! ¿Uma vo aviye catu vahe? ¿Evocoi porerecosa seropovēhepri pīha, anise mbahe seropovēhepri renda tie? Ahe tenda harive niha porerecosa sovasasa yepi. ²⁰Sese acoi mbahe omombehu vahe mbahe seropovēhepri renda rer pipe oñehe mboaviye āgua, ndahei serer pipe güeraño, omombehu avei opacatu ihari pendar mbahe seropovēhepri rer pipe, ²¹iyavei acoi ava omombehu vahe mbahe tūparo rer pipe oñehe mboaviye āgua, ahe omombehu ipipendar rer pipe avei. Ahe niha Tūpa secoci. ²²Iyavei acoi omombehu vahe mbahe que ambuae ava upe iva resendar rer pipe oñehe mboaviye āgua, omombehu avei Tūpa recua rer pipe, Tūpa rer pipe avei. Esepia, Tūpa aheve ité secoci.

²³“iPeparaisu catu itera, pe Moisés porocuita rese oporombohe vahe iyavei pe fariseo peico vahe, pe peyapo angahu tēi vahe pe recocuer pipe mbahe peico yepi! Yepe pemondo ñepeipei diez pe remiti menta, anis, comino pereco vahe sui ñepeipei Tūpa uve nara viña, pe rumo pepoi co porombohesa aviye catu vahe porocuita resendar sui. Ahe peyapora mbahe ihīvi vahe, peporoparaisuerecora iyavei pemboaviye tuprira pe cuaita yepi. Iyacatu rumo ahe pemboaviye aveira viña. ²⁴iPe ava mbohesar ndasesapisoi vahe nungar peico! Pe pembogua rutei mbahe rahicuer sui pe igua; mbahe tuvicha vahe rumo pemocoño ité evocoiyase. Ēgüe peye co mborocuita upe.

²⁵“iPeparaisu itera pe Moisés porocuita rese oporombohe vahe iyavei pe fariseo peico vahe, pe seco tupri angahu tēi vahe! Esepia, inungar igua riru iyavei tembihu riru icupe rupi tēi yoseipri. Ipipe rumo iquiha opitaño ité. Ēgüe ehi tēi pe recocuer pe monda raisave, mbahe pota-pota tēisave avei. ²⁶iPe fariseo peico vahe, ndapepihañemoñetai vahe mbahe pe rembiapo ai rese, pemoatiro rane pe piha pipe mbahe yavaeté vahe sui! Ahese ramo pe rembiapo icatuprira cute.

²⁷“iPeparaisu catu itera, pe Moisés porocuita rese oporombohe vahe, fariseo peico vahe, peyapo angahu tēi vahe mbahe pe recocuer pipe peico! Pe recocuer inungar tuvipa imomorochimbri tēi. Iharive tēi icatupri chupe. Ipipe rumo tehögüer cangüer iyavei opacatu mbahe yavaeté vahe ovireco oyese. ²⁸Ēgüe peye: ava rembiepiave aviye pe reco ihīvi vahe viña, pe piha pipe rumo oime pe porombopasa iyavei opacatu mbahe-mbahe tēi.

29“iPeparaisu catu itera pe Moisés porocuita rese oporombohe vahe, pe fariseo peico vahe, pe reco tupri angahu tēi vahe! Esepia, pemoingatu Tūpa ñehe mombehusar ruvipagüer peico sese pe yemomahenduha āgua iyavei pemoporañete ai tēi ava seco ihīvi vahe ruvipagüer yepi viña. 30Ipare aipo: ‘Yande yaicose revo aracahe yande ramoi recose, ndayaipñivii chietera Tūpa ñehe mombehusar yuca āgua yuvireco viña’ peye tupri tēi. 31Aipo peyese rumo, pemboyecua Tūpa ñehe mombehusarer yucasar suindar pe yesusa. 32iPemboyeapī iriño evocoyase pe ramoi rembiapocuerai!

33“iPe mboi vai suindar tēi peico! Ndapesoyepe chira rumo Tūpa ñemoirosa sui, pesora rumo tata guasuve. 34Evocoyase che amboura pēu Tūpa ñehe mombehusar ava yaracua vahe iyavei ava pe mbohe āgua yuvireco viña. Amove rumo ipāhu pendar peyucara, ambuae peyaticara curusu rese sereco. Ambuae peinupara pe ñemonuhasa rupi iyavei ambuae peseca-secara peico tecua yacatu rupi. 35Sese pēuño ité oura Tūpa ñemoirosa opacatu ava aviye vahe yuca agüer rese co ivi pipe; Abel seco ñvi tupri vahe yuca agüer sui, ipare opacatu ambuae saquicuerindar ava yuca agüer sui, ipa Berequías rahir Zacarías sui avei, ahe peyuca vahe tūparo pipe mbahe seropovēhepri renda rovai. 36Supi eté opacatu co mbahe tēi oura pe recove viteseve” ehi.

Jesús oyaseho Jerusalén pendar rese

37“iToo rutei, pe Jerusalén pendar, peyuca vahe Tūpa ñehe mombehusar, ita pipe peyapi-yapi ava Tūpa remimbou yepi! iSetá rupi che opomonuha pota tēi pe rereco, inungar tacura omonuha vahe omembri opepovrive! Ēgüe ahe pota tēi pe rereco viña, pe rumo ndapeipotai eté evocoi nungar pe rereco āgua. 38Sese seyapirā tēi peicora. 39Esepia, ndache repiai chira peye acoi, ‘iImboeteipri Yar remimbou tasecoi!’ peyese voi che repia irira peye” ehi Jesús ava eta upe.

Jesús omombehu judío tūparo guasu mocañi āgua

24 1Ipare Jesús osē judío tūparo pipe sui oso. Aheseve ore semimbohe royemboya sese aipo orohe chupe: “iOre Yar, esepia co tūparo!” orohe. 2Ahe rumo:

—Supi eté amombehu pēu: co opacatu pesepia vahe, ndipoi chietera que ñepe i ita oyeha vite vahe. Opacatu ité imondurusara curi —ehi oreu.

Jesús omombehu mbahe oime vaherã ari cañi renonde

³Ipape Jesús oso ivitri Olivo ve oguapí oĩ. Aheve ore güeraño tupri oroso chupe mbahe rese ore porandu ãgua:

—Emombehu catu oreu: ¿Mbahese vo aipo mbahe yaviyera? ¿Mbahe poromondiisa rese rane vo icuasara nde yu ãgua iyavei ari cañi ãgua? —orohe chupe.

⁴—Peicua catu, peyembopa ucai rene ambuae ava upe peico. ⁵Esepia, setá ava yugüerura, ‘Che aico Tüpa remimbou ava písiro ãgua’ ehi tẽira ava eta mbopa yuvireco. ⁶Iyavei pesendura ñehesa vavasa resendar cohawe iyavei que rupi. Ndapeyembosiquiyei chira rumo ichui. Esepia, ãgüe ehi rane itera niha; ndehi vitei chira rumo ari cañisa. ⁷Esepia, ñepepe ivi pĩpendar ovavara ambuae ivi pĩpendar rese oyeupe yuvireco. Ahese oimera tiavor, ivi rirĩ opacatu-catu tẽi tecua rupi. ⁸Opacatu evocoi mbahe rumo omboĩpi ramomi vahe mbahe tẽi porarasa.

⁹“Ahese pe písira yuvireco mara-mara tẽi pe rereco ãgua, pe yuca ãgua avei. Iyavei opacatu ava-ava tẽi ndape ambotai chira che recocuer sui tẽi yuvireco. ¹⁰Ahe ari rupi evocoyase setá ava ndache reroya iri chira yuvireco. Ahe oyeamotarẽhira iyavei omondora ambuae omboetasagüer yamotarẽhimbar povrive yuvireco. ¹¹Iyavei setá Tüpa ñehese mombehusar angahu tẽi oimera, ahe ava ombopa-mbopa tẽira yuvireco. ¹²Ombouvicha catura mbahe-mbahe tẽi naporai vahe. Ipape sui ndoyeaisu tupri iri chira ava yuvireco. ¹³Acoi ava oyemoviracua vaheño rumo ari ipa vahe rupi, ipĩsiropri yuvirecoira. ¹⁴Iyavei co ñehesa icatupri vahe Tüpa mborerecuasa resendar imombehusapa ranera opacatu ivi rupi icua uca ãgua. Ahese ramo oimera cañisa co ivi pipe” ehi oreu.

¹⁵“Tüpa ñehese mombehusar Daniel oicuachía mbahe-mbahe tẽi aposa resendar oime vaherã tüparo guasu maranehi vahe pipe aracahe. Ahe pesepiase oĩ maranehi pipe —acoi oyerogui vahe, ahe tosenducua tupri yuvireco—, ¹⁶evocoyase Judea ve yuvirecoi vahe toñemipa poyava ivitri rese yuvireco ichui; ¹⁷iyavei acoi güẽta harive yuvirecoi vahe ogüeyise, toique iri eme güõtave ombahe reca; ¹⁸iyavei acoi que rupi tẽi yuvirecoi vahe, toyevĩ iri eme güõtave que oyeaosa renose ãgua yuvireco. ¹⁹Iparaisu itera cuña ipuruha vahe, imembi pĩtani vahe avei yuvireco! ²⁰Peporandu Tüpa upe pe recua pipe sui pe sãẽhi ãgua irohi pipe,

mbituhusa ari pipe avei. ²¹Esepia, ahe ari pipe ava iparaisu catura opacatu yipive ava ivi apo ramo suive yuvirecoi vahe sui. Ipare ndipo iri chietera evocoi nungar. ²²Iyavei nomombituhuse Tüpa co ari naporai vahe, ndipoi chietera ava oñepísiro vahe yuvireco viña. Ahe rumo güembiporavo raisusa pipe omombituhura” ehi.

²³“Iyavei que ava, ‘Esepia co Poropísirosar secoi’; anise, ‘Peve secoi’ ehise yuvireco pëu, aní chira peroya aipo ehi vahe. ²⁴Esepia, yugüerura ava ‘che Poropísirosar aico’ ehi tēi vahe iyavei ‘che amombehu vahe Tüpa Ñehengagüer’ ehi angahu tēi vahe; iyavei oyapora mbahe ava ndoyapoi vahe poromondiisa güeco pīratasa mboyecua āgua yuvireco. Ipipe osecōāhara Tüpa rembiporavo imbopa āgua yuvireco. ²⁵Opa aipo co senondeve amombehu pëu. ²⁶Sese que ava pëu: ‘Pesepia pe ivi iporupirēhisave secoi’ ehise, pesoi rene aheve seroyasave, aní chiaveira peroya acoi ‘pesepia co secoi oi pipe’ ehi vahe yuvireco. ²⁷Che rumo inungar overa vahe sendi añihivei sui caharu coti ocua iva rese, ěgüe ahera che, Ava Riquehír, opacatu ava rembiepiave ayevi irise vitu curi. ²⁸Esepia, mbahe rehōgüer reimesave, uruvu oñemonuha ati yuvireco yepi” ehi güemimbohe eta upe.

Jesús yevi āgua resendar

²⁹“Ahe ari pipe mbahe-mbahe tēi pare cūrteimi ndoyecua iri chira ari, yasi avei ndosesape iri chira, yasitata avei opara oviapi iva sui iyavei iva resendar mbahe oririira yuvireco. ³⁰Ahese oimera iva rese iporēhi vahe che, Ava Riquehír, yu āgua resendar. Evocoiyase opacatu ava-ava tēi co ivi pipendar oyaseho tēira osiquiyepave yuvireco. Che repia aveira yuvireco agüeyise iva quiha rese che pīratasa rendigüer porañetesa pipe. ³¹Iyavei amboura che rembiguai eta iva pendar. Ahe evocoiyase güemimbi omoñehe pīratara opacatu che rembiporavo co ivi rupindar que amombri rupi yuvirecoi vahe monuha āgua” ehi.

³²“Peyembohera ivira higuera recocuer sui: Co ivira soqui ramose, yaicua cōimi ari sacu vahe yepota āgua yandeu yepi. ³³Na ehi aveira pëu che ñehe rupi tupri mbahe pesepiase, sese peicuara cōimi eté che yevi āgua. ³⁴Supi eté yuvirecove vitera ava osepia vahe co mbahe opase yaviye. ³⁵İva, ivi opara ocañi, che ñehengagüer rumo imboaviyesa rane itera.

³⁶“Ndipoi eté rumo ava oicua vahe ari iyavei hora che yevi āgua. İva pendar che Ru rembiguai avei ndoicuai yuvireco. Che avei ndaicuai eté. Che Ru güeraño ité rumo oicua.

37“Inungar ava Noé recose yuvirecoi aracahe, ěgüe ehi tupri aveira che, Ava Riquehir, yevi āgua renonde. 38 Yipive amarusu renonde, ahese ava ocaru, oiĥu; guahir, guayri avei omomendaño yuvireco. Noé arca pipe seiquese, ěgüe ehi vite yuvireco.

39 Nomohai eté rumo amarusu viapi āgua yuvireco oyeupe viña, ěgüe ehi rumo aviyeteramo tēi amar oviapi imocañipa. ěgüe ahe aveira che, Ava Riquehir, ayevi aviyeteramo tēi. 40 Evocoi ari pipe oimera ñuvirío ava amombri güecua sui yuvirecoi vahe: ñepe serasosara, indugüer rumo opítara. 41 ěgüe ehi aveira ñuvirío cuña ohicho vahe upe: ñepe serasosara, indugüer rumo opítara.

42“Sese pemahemoha yepi. Esepia, ndapeicuai mbahe ari pipe che, pe Yar, ayevira iva sui. 43 Iyavei peyapisaca tupri co rese: inungar acoi oi yar oicuae revo que hora pítu pipe imonda vahe yepota āgua, ahese imahemohara sese güēta pipe seiqueĥi āgua viña. 44 ěgüe peye aveira peyemoingatu che yevi āgua rese. Esepia niha, che, Ava Riquehir, aporoesapiha tēira vitu curi” ehi.

Mbiguai omboaviye vahe ocuaita, nomboaviyei vahe avei

45“Acoi ava mbahe rese ñangarecuar omboaviye tupri vahe ocuaita, yaracua vahe avei, ahe chupe serecuar oseya icuaitarā güēta pipendar rese hañeco āgua ‘tembiĥu tomondo che rēta pipendar upe che porocuita rupi’ ohesave. 46 Acoi omboaviyese ocuaita, ahese oviharetera güerecuar yevise. 47 Supi eté niha serecuar oyocuirā opacatu ombahe rese hañeco āgua. 48 Ahe mbiguai rumo ndipihaise ‘ndoyepota vitei chira revo che rerecuar’ oya, 49 omboetasa omboipi mara-mara tēi sereco iyavei oyemboya caguar tēi rese ipiri ocaru iyavei oiĥu tēi āgua. 50 Ipare rumo serecuar oyepotara imahemohaĥiseve. 51 Ahese omombaraisu catura, ‘Tinupasa, ava seco tupri ai angahu tēi vahe nupasa nungar pipe’ ehira chupe. Ahese oyaseho tēira, oyemoaitere-tere tēi aveira” ehi güemimbohe upe.

Diez cuñatai ndaseco marai vahe resendar ñehesa

25 1“Evocoi ari pipe Tūpa mborerecuasa inungar-ra mendasave diez cuñatai ndaseco marai vahe virasora tataendi ambuae cuña mevi piši āgua yuvireco. 2 Ipāhuve yuvirecove cinco ndipihañemoñetai vahe, ambuae cinco rumo ipihañemoñetai tupri vahe yuvireco. 3 Ipare ndipihañemoñetai vahe

oipisi guataendirã yuvireco, ndovirasoi rumo yandi guataendi riru mboapipo iri ãgua yuvireco; ⁴evocoi ipihañemoñeta tupri vahe rumo viraso yandi siru pipe guataendi reseve yuvireco. ⁵Acoi ndoyepota apihaise cuña mevi, ahese sopesii tõi yuvireco. Coiye opaño yuviroque yuvireco ichui. ⁶Pĩtu mbĩter senise rumo, osendu ñehesa aipo ehi vahe yuvireco: ‘iCoi imevi turi! iPesẽ ipisi ãgua cute!’ ehi. ⁷Evocoiyase opacatu evocoi cuñatai oñarapuha voi iyavei omoingatu guataendi yuvireco. ⁸Ahese nimahemohai vahe aipo ehi ambuae imahemoha vahe upe yuvireco: ‘Pemboumi tõi chĩhi pe yandi oreu. Esepia, ogũe pota ité ore rataendi’ ehi tõi yuvireco. ⁹‘Aní, ndiyai chira revo oromondo vaherã pẽu. Iyacatu revo peso imboepisave serocua peyeupe nara’ ehi. ¹⁰Imboepi yuvirasoi viteseve, ou cuña mevi cute. Oyemoingatu vahe rumo yuviroique supi mendasave. Evocoiyase saquicuerive voi omboya oquenda rãrosar. ¹¹Ipare oyepotase ambuae cinco cuñatai yugũeru aipo ehi yuvireco oi yar upe: ‘iEmboimi tõi oreu!’ ehi tõi yuvinoha. ¹²‘Aní, ndopocuai vahe ité’ ehiño chupe.

¹³“Pe evocoiyase pemahemohara. Esepia, ndapeicuai mbahe ari pipe, mbahe hora pipe che, Ava Riquehir, ayevíra” ehi Jesús oreu.

Ñehesa guarepochi mondosea resendar

¹⁴“Iyavei Tũpa omborerecuasave inungar-ra ava mbahe yar oso ãgua renonde ivi amombrisave omonuha güembiguai oguarepochi rãro ãgua viña. ¹⁵Yipĩndar ñepei upe omondo cinco mil guarepochi, ambuae upe omondo dos mil, iyavei imombosapisa upe omondo mil tõi: ahe omondo ñepei-peu upe seco etegũer rupi-rupi. Ipare voi oso cute. ¹⁶Evocoiyase evocoi mbiguai oipisi vahe cinco mil guarepochi, ahe oporaviqui co guarepochi rese. Ipipe sui coiye oipisi catu iri ambuae cinco. ¹⁷Inungar avei ambuae oipisi vahe dos mil, ichui oipisi catu iri ambuae dos mil. ¹⁸Ambuae oipisi vahe rumo ñepei guarepochi, ahe oyoho ivicuar. Aheve oñoti güerecuar guarepochi.

¹⁹“Ipare coiye oyevisẽ serecuar, ahese oñehe güembiguai upe oguarepochi retacuer cua ãgua. ²⁰Yipĩndar cinco mil guarepochi oipisi vahe ranengatu oyemboya güerecuar rese aipo ehi: ‘Ndo co acoi erembou vahe cinco mil cheu, ichui co ambuae cinco aipisi irimi ndeu’ ehi. ²¹‘Aviye ité, nde mbiguai seco aviye vahe ereico iyavei eremboaviye tupri vahe nde cuaita co moviro tõi

guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovihara che rese' ehi chupe. ²² Ipare ambuae sembiguai oipisi vahe dos mil guarepochi, oyemboya güerecuar rese aipo ehi chupe: 'Ndo co erembou vahe dos mil cheu. Ipipe sui co ambuae aipisi irimi dos mil avei ndeu' ehi. ²³ 'Aviye ité, nde mbiguai seco aviye vahe, eremboaviye tupri vahe nde cuaita co moviro tēi guarepochi ndeu amondo vahe pipe. Sese tuvicha catu amondora nde cuaitarã. Indó, eique che piri, yayembovihara che rese' ehi avei chupe.

²⁴ "Ipare acoi oyepotase ambuae mbiguai oipisi vahe mil guarepochi, ahe aipo ehi güerecuar upe: 'Che aicua nde reco; nde acoi ndihavai vahe ereico. Esepia, ava remitigüer tēi eremonuha iyavei imbovepepírer tēi avei ereipisi ndeyeupe nara. ²⁵ Sese che siquiyesa pipe añomi ivivrive nde guarepochi. Ndo co nde mbahe' ehi chupe. ²⁶ 'Nde mbiguai ndaseco pōrai vahe, yangaipa vai vahe avei ereico. Nde niha ereicua che recocuer aipisise mbahe nañotii vahe sui. ²⁷ Ereyapocatumira che guarepochi guarepochi apocatusave cuese rahe viña che yevise voi senose ãgua cheu imboyevi catumi ãgua viña' ehi. ²⁸ Ipare aipo ehi: 'Perocua guarepochi ichui, pemondora evocoi diez rupi guarepochi omboeta vahe upe' ehi. ²⁹ 'Indó, acoi vireco vahe mbahe, chupe imondosa catura, sumbire aveira; acoi ndovirecoi vahe rumo mbahe, opaño itera serocuasa mbahe sembierecomi ichui. ³⁰ Sese pemose co mbiguai ãgüe ehi tēi vahe ocarve pítumimbisave. Aheve toyaseho, tasãitere tēi oĩ' ehira serecuar chupe" ehi Jesús oreu.

Jesús oura opacatu ava recocuer rese porandu ãgua

³¹ "Che, Ava Riquehir, ayevisse, opacatu che Ru rembiguai iva pendar reseve che reco ivategüer pipe, ahese aguapira che renda porañete vahesave ava recocuer rese porandu ãgua. ³² Evocoiyase ava opacatu tecua rupindar imonuhasara che rovai yuvireco. Ahese aipehara ava oyesui, inungar ovesa rãrosar oipeha vahe ovesa cavara sui. ³³ Che evocoiyase ovesa aipehara mbahe rese che pocosa coti, cavara mbahe rese che pocoẽhisa coti. ³⁴ Ahese che mborecuar ivate catu vahe aipo ahera che acato cotindar upe: 'Perio pe opacatu che Ru sui sovasapri peico vahe, peique che Ru mborerecuasa pipe; ahe acoi yipive ivi apo ramo suive imoingatupri pëu nara. ³⁵ Esepia, ndacheriepoise, pe evocoiyase pembou mbahe che remihura; iyavei

che huseise, pe evocoyase pembou taihu; che aguata tẽise pe recua rupi vichico, pe avei oi pembou che que ãgua. ³⁶Turucuar cheu ipanese, pe avei pembou che turucuarã; chembaheasise, peso avei che piri; che roquendasave peso avei che repia no' ehi. ³⁷Evocoyase evocoi seco catupri vahe aipo ehira yuvireco cheu: 'Ore Yar, ðmbahese vo nde repiasa nanderiepoise eico iyavei imondosa nde remihura? ðMbahese vo nde repiasa ndehuseise, ipare imondosa tereihu? ³⁸ðMbahese vo nde repiasa nde guatase ore recua rupi, ipare nde monguesa ore piri, ipanese nde turucuarã, ore aipo evocoyase oromondo ndeu? ³⁹Iyavei, ðmbahese vo aipo nde repiasa nembraheasise, anise que nde roquendasave, aheve aipo oroso nde repia yepi?' ehira yuvireco cheu. ⁴⁰Evocoyase che, mborerecuar ivate vahe, amboyvira yuvireco chupe aipo ahera: 'Supi eté, opacatu mbahe peyapose que ñepei seco mbegüemi vahe che reroyasar pãhu pendar upe viña, cheu rumo ãgüe peye' ahera.

⁴¹"Ahese aipo ahera cute che mbahe rese pocoẽhisa cotindar upe: 'Pesiri che sui. Esepia, pe peico Tũpa ñemoirosavri pendar. Pesopa tata guasu apirẽhisave, evocoi imoingatupri opacatu caruguar upe nara serecuar reseve. ⁴²Esepia, ndacheriepoise, pe evocoyase: Yamondomi icaru ãgua, ndapeyei eté cheu; che huseise, ahese, Yamondomi toihu, ndapeyei avei cheu; ⁴³ambuae tecua pipe aguata tẽise vichico, ahese, Eique che rõtave che piri, ndapeyei eté cheu. Ipanese che turucuarã, pe rumo ndapembou cheu, chembaheasise vichico, iyavei che roquendasave, Yasomi tẽi sepia, ndapeyei eté cheu' ahera. ⁴⁴'Ore Yar, ðmarase vo aipo nde repiasa nanderiepoise, anise aipo nde huseise, ipanese nde turucuarã ndeu no, nembraheasise, anise nde roquendasave, marase vo mbahe rese nande pãtiviisai?' ehi tẽira yuvireco cheu. ⁴⁵'Supi eté acoi amove mbahe ndapeyapose que seco mbegüemi vahe upe viña. Ipipe rumo cheu avei mbahe ndapeyapoi eté' ahera. ⁴⁶Ahe ava yuvirasora Tũpa ñemoirosa apirẽhi vahesave. Seco ñvi vahe rumo teco ori opaẽhisave yuvirasora" ehi Jesús oreu.

Jesús yamotarẽhimbar omboguai yuca ãgua yuvireco

26 ¹Ipare Jesús aipo ehi oreu:
²—Pe peicua ñuvirío ari tẽi ipane vite co Pascua pieta yepota ãgua yandeu. Ahese che, Ava Riquehir, imondopri aicora che atica ãgua curusu rese yuvireco —ehi.

³Ahe pipeve avei Jerusalén ve, co pahi rerecuareta, iyavei judío rerecuareta oñemonuha yuvireco pahi rerecuar ivate catu vahe Caifás rêtave. ⁴Aheve oñemoñeta: ‘Yambopa ipisi yuca ãgua’ ehi yuvireco oyeupe. ⁵Ahe rumo:

—Ndiyai pieta pipe ité yaipisi ava rehii yemondii guasuēhi ãgua yandeu —ehi.

Cuña oiþiyere Jesús ãca rese mbahe sãacuá vahe

⁶Jesús tecua Betania ve secoi, Simón lepra vireco vahecuer rêtave. ⁷Aheve mesave chiniseve, cuña vireco vahe mbahe sãacuá vahe siru reseve viroyepota chupe. Ahe oiþiyere Jesús ãca rese.

⁸Orosepiase rumo oroñemoiro aipo orohe oreyeupe:

—iMahera vo co omocañi tēi! ⁹Omondo vahe ité tie co setá guarepochi rupi ava iparaisu vahe p̄tivii ãgua viña —orohe tēi chupe.

¹⁰Jesús rumo oicua ore p̄hañemoñetasa. Sese aipo ehi oreu:

—iMahera vo co cuña pemañeco tēi! Esepia, co mbahe oyapo vahe aviye ité cheu. ¹¹Ava iparaisu vahe niha yuvirecoiño itera pe p̄ahuve. Che rumo ēgüe ndahe viteñoi chira vichico pe p̄ahuve. ¹²Esepia, co cuña oiþiyere mbahe sãacuá vahe che rese che t̄i ãgua renondeve. ¹³Supi eté aipo ahe p̄eu: co ñehesa p̄sirosa resendar mombehuse opacatu tecua rupi, imombehusa aveira co cuña rembiapo sese mahenduha ãgua —ehi.

Judas Iscariote oyemoingatu Jesús mondo ãgua yamotarēhimbar povrive

¹⁴Ipare ñepi ore p̄ahu pendar, Judas Iscariote, oso, oñehe pahi eta rerecuar yuvirecoi vahe upe ¹⁵aipo ehi:

—¿Mbovi rupi vo pemboepira cheu amondose Jesús p̄eu viña? —ehi.

“Treinta guarepochi rupi” ehi yuvireco chupe. ¹⁶Ahesa reseve voi oseca Jesús mondo ãgua yamotarēhimbar upe.

Jesús caru agüer ipa vahe güemimbohe rese

¹⁷Ari yipindar vahe pieta resendar, pan ndayapepoi vahe husa pipe, ahese ore Jesús remimbohe oroico vahe oroyemboya sese aipo orohe:

—¿Que vo ereipota oromoingatura carusa Pascua pieta resendar yandeu? —orohe chupe.

18 Evocoyase,

—Peso tecua gasuve che cua vahe rētave aipo peyera chupe: ‘Ore Mbohesar aipo ehi: Cōimi che mano āgua, sese ayapo potami sētave Pascua pieta che remimbohe reseve, ehi ndeu’ peyera chupe —ehi.

19 Evocoyase oyapo semimombehu rupi tupri ité yuvireco, omoingatu carusa Pascua pieta resendar yuvireco aheve.

20 Pītu ramomise, opacatu oroguapī mesave Jesús piri ore caru āgua. 21 Ore carusave aipo ehi oreu:

—Supi eté aipo ahe pēu: ñepei pe pāhu pendar che mondora che amotarēhisar upe —ehi.

22 —Che Yar, ¿che pīha? —orohe-rohe tēi ñepei-peí ore yacatu ore viharēhisa pipe chupe.

23 —Omondo vahe opo che caro pipe, ahe che mondora che amotarēhisar upe —ehi—. 24 Imboaviyesa itera che, Ava Rīquehīr, rese ñehesa icuachiapri. Iparaisu catura rumo acoi mbia che mondosar! Aviye catura ndoyesuisse viña —ehi.

25 Ahese Judas imondosavi oporandu:

—Ore Mbohesar, ¿che tie? —ehi.

—Taa, inde ité niha ēgüe erera! —ehi chupe.

26 Ore caru viteseve, Jesús oipisi pan, “Aviye ndeu” ehi Vu upe. Aipo ohe pare, ombohi-mbohi oreu imondo, aipo ehi:

—Ndo co, pehu co che rete —ehi.

27 Ipare oipisi igua riru, “Aviye ndeu” ehi Vu upe. Aipo ohe pare ombou oreu aipo ehi:

—Peihu peyacatu co sui. 28 Esepia, co che ruvi, ahe omoimera che Ru remimbotar ipiasu vahe pēu, ahe oyepiyerera ava rehii angaipa rese ñero āgua. 29 Ndaihu iri chira uva ricuer cheu ari oyepotase voi che Ru mborerecuasave aihura pe rese ambuae uva ricuer ipiasu vahe —ehi oreu.

Jesús, “ ‘Ndaicuai vahe ité aipo mbia’ erera cheu” ehi Pedro upe

30 Ore sapucaire, oroso ivitri Olivo ve. 31 Evocoyase Jesús aipo ehi oreu:

—Opara pemocañi che rese yeroyasa peyesui co pītu pipe. Esepia, acoi icuachiapri pipe aipo ehi: ‘Ayucara ovesa rārosar, ahese oñemosai tēira ovesa opacatu rupi yuvireco’ ehi vahe. 32 Che cuerayevire rumo, aso voi etera pe renonera Galilea ve —ehi.

33 Pedro rumo,

—Yepe ambuae opacatu nande reroya iri chira yuvireco, che rumo ndayepepi chietera nde sui —ehi chupe.

34—Che rumo supi eté aipo ahe ndeu: co pĩtu pipeve voi eté tacura ñehe renondeve, “Ndaicuai vahe ité aipo mbia” erera mbosapi oyupagüer rupi cheu —ehi Pedro upe.

35 Pedro rumo,

—Yepe amanora nde rupi viña, che rumo, “Ndaicuai vahe aipo mbia” ndahei chietera —ehi-ehi catuño ité chupe.

Aipo orohe pãve tupri tẽi chupe.

Jesús oyerogui Getsemaní ve

36 Ipare Jesús rupi orosoño Getsemaní ve. Aheve aipo ehi oreu:

—Peguapi cohave; che aso ranera peve catumi, ayerogui —ehi.

37 Aheve viraso Pedro oyeupi iyavei ñuvirio Zebedeo rahir. Ahese oyandu oviharẽhisa oico. 38 Evocoyase ahe aipo ehi chupe:

—Ndavihai eté. Esepia, che hã oyandu ité manosa. Pepita rane cohave iyavei pemahemohara pe yeroqui pipe che rese —ehi.

39 Evocoyase oso tenonde catumi. Aheve oñenopiha ovapi ivi rese oyerogui Vu upe aipo ehi: “Che Ru, iyase ndeu che renose mbahe-mbahe tẽi sui eve; tayapo eme ru che remimbotar tẽi, nde remimbotar rupi catu tayapo” ehi.

40 Ipare oyevi güemimbohe upe. Ahe rumo opaño yuviroque yuvirocua. Ahese aipo ehi Pedro upe:

—iNdapeñemosai eté vo pe ropesii upe che rãro ãgua que ñepe hora che mondugüe ãgua peye! 41 Pemahemoha, peyerogui mbahe tẽi pipe pe viapiẽhi ãgua. Supi eté pequerẽhi ité viña, pe retecuer tẽi niha nipiratai pẽu —ehi.

42 Ichui imoñuviriosa rupi oso iri oyerogui aipo ehi: “Che Ru, ereipotase che reique ãgua co mbahe tẽi pipe, eyapo nde remimbotar che rese” ehi.

43 Ipare oyevisẽ, osesapiha iri iqueseve ou. Esepia, sopesii nomboyeroyai eté yuvireco. 44 Evocoyase oseyapa iri oso oyerogui ãgua imombosapisa rupi. Aipo ehi tupriño avei oyerogui Vu upe.

45 Ipare oyevi iri güemimbohe upe aipo ehi chupe no:

—iPequeño vite vo peyu! Osupiti che, Ava Riquehir, mondo ãgua ava yangaipa vahe povrive. 46 Pepũha, yaso. Esepia, cõimi eté che amotarẽhisar upe che mondo vaheã secoi —ehi.

Jesús oipisi yuvireco

47 Jesús ñehe viteseve, Judas oyepota oso chupe. Ahe ñepei semimbohe ore pãhu pendar, iyavei setá iteanga ava yugüeru quise pucu, ivira reseve-seve supi. Ahe pahi eta rerecuar yuvirecoi vahe judío rerecuareta porocuaíta rupi oyapo yuvireco. 48 Yipindar rumo imondosar Judas aipo ehi: “Asovaupitese, ahese peicuara; ahe peipisira” ehi. 49 Ipare oyemboya voi oso sese.

—iAvirave, Porombohesar! —ehi sovaupite.

50 —Che mboripar —ehi Jesús—, eyapoño mbahe nde remimbotar cheu —ehi.

Aheseve voi oipisi yuvireco.

51 Evocoyase semimbohe secoi vahe supi vinose oquise pucu, oyasia pahi rerecuar ivate catu vahe rembiguai nambi.

52 —iAní! —ehi güemimbohe upe—. Emoingue siru pipe nde quise pucu. Esepia, acoi ava opacatu ovava vahe oquise pipe yuvireco, ipipe avei opara yucasa yuvireco. 53 ¿Ndereicuai vo aporanduse che Ru uve viña, ahe evocoyase cūritei voi omboura doce mil sui setá catu vahe güembiguai che repi água viña? 54 Ëgüe ehise rumo Tūpa Ñehengagüer icuachiapri ndayaviyei chietera viña, ahe co cūritei osupiti —ehi.

55 Ahese aipo ehi ava rehii upe:

—Pe quise pucu, ivira reseve-seve rutei co peyu che ropeña che pisi água imonda rai vahe nungar che rereco peye. Che ari yacatu rupi aguapise pe pãhuve pe mbohe água tūparo pipe, ndapeyapoi eté co nungar cheu. 56 Co rumo opacatu ãgüe peye Tūpa ñehe mombehúsar rembicuachiagüer mboaviye água cute —ehi ava rehii upe.

Ahese voi opacatu oroñemosaiapa, oroseya ahe aetemi Jesús ava rehii upe imoha.

Jesús serasosa pahi rerecuar ivate catu vahe rovai

57 Ahese Jesús pisisar viraso Caifás rētave yuvireco, ahe pahi rerecuar ivate catu vahe secoi. Aheve oñemonuha Moisés porocuaíta rese oporombohe vahe, judío rerecuar yuvirecoi vahe avei no. 58 Pedro rumo amombri rupive tēi osaquicue moña oso. Ëgüe ehi oyepota pahi rerecuar ivate catu vahe rēta rocar áchisave. Aheve oique ipipe, iyavei oguapi oĩ sundao pãhuve ‘¿mara ehi etera pãha sereco yuvireco?’ oya.

⁵⁹Ahese pahi eta rerecuar iyavei opacatu porandusa ivate catu vahe pendar, ahe oñhengapo-ngapo uca tēi ava Jesús amotarēhisave yuca uca āgua yuvireco, ⁶⁰yepe oyemboyecua setá iteanga yamotarēhisar semira-mira tēi vahe yuvireco viña, ndoyosui eté rumo mbahe sembiapo naporai vahe yuca uca āgua yuvireco. Aheseve yugüeru ñuvirío yamotarēhisar oporombopambopa tēi vahe yuvireco cute.

⁶¹—Co mbia aipo ehi: ‘Che aicatu co tūparo monduru; aicatu aveira imopuha iri mbosapi ari rupi’ ehi —ehi tēi yuvireco chupe.

⁶²Ahese pahi rerecuar ivate catu vahe opūha, oporandu Jesús upe:

—¿Mahera vo nderemboyevii eté iñehe yuvireco chupe? ¿Mbahe ehi vo aipo nde amotarēhisar nde rese oñehe? —ehi.

⁶³Noñehei eté rumo. Ahese,

—Che orocuai Tūpa supi eté vahe rer pipe emombehu oreu: ¿Poropĩsirosar ité nde ereico, Tūpa Rahir? —ehi pahi rerecuar ivate catu vahe chupe.

⁶⁴—Taa, supi eté niha aipo aipo ere cheu, co catu amombehura pēu, che repiara niha peye che, Ava Riquehir, aguapise Tūpa mbahe mboavaisarēhi acato coti, ayevise avei iva quiha rese curi —ehi.

⁶⁵Evocoyase pahi rerecuar ivate catu vahe imboasipave omondo oturucuar aipo ehi:

—¡Indó, mbahe tēi eté iñehe Tūpa upe! ¡Mbahe iri vo yaipota vite yaico! Yasendupa niha aipo Tūpa upe iñehe-ñehe tēisa cūrítei.

⁶⁶¿Mara ehi aipo pe pihave? —ehi.

—Supi eté, oyavi mbahe. ¡Tomanono ité! —ehiño ivoya eta yuvireco chupe.

⁶⁷Ahese ondivi-ndivi sova rese iyavei yuvirocua-rocua yuvireco sese. Ambuae osovapete-pete, ⁶⁸aipo ehi yuvireco chupe:

—Nde niha aipo ereico Tūpa remimbou Poropĩsirosar, ¿eicua ité ru, ava evocoi ocua nde rese? —ehi yoyai catu-catu yuvireco.

Pedro, “Ndaicuai vahe evocoi mbia” ehi Jesús upe

⁶⁹Pedro evocoyase uguapi sãro ocarve ñachimbri pipe oĩ. Aheve oyemboya cuña mbiguai oso sese aipo ehi chupe:

—Nde avei Jesús Galilea pendar rupindar ereico —ehi.

⁷⁰Ahe rumo aipo ehiño opacatu ava rovaque:

—Ndaicuai aipo nde ñehesa —ehiño cuña mbiguai upe.

⁷¹ Ichui oso oquendipive. Aheve omahe ambuae cuña sese. Ahe sepiase aipo ehi ava ahe pendar yuvirecoi vahe upe imombehu:

—Co ava avei acoi secoi Jesús Nazaret pendar rupi yepi —ehi ava upe.

⁷²—¡Aní! —ehi iri ahe cuña upe—. ¡Tūpa oicua, supi eté ndaicuai aipo mbia! —ehi angahu tēi.

⁷³ Iparemi tēi aheve yuvirecoi vahe, oyemboya sese aipo ehi yuvireco chupe:

—Nde avei eté niha supindar ereico. Esepia, nde ñehe pãrigüer rese nde cuasaño —ehi yuvireco.

⁷⁴ Ahe evocoyase,

¡Tūpa niha oicua ndopombopai eté niha! ¡Che ndaicuai vahe ité evocoi mbia, ahe mo aipo pēu! —ehi angahu tēi chupe.

Aipo iheseve, tacura oñehe. ⁷⁵ Ahese Pedro oyemomahenduha Jesús oyeupe, ‘Acoi tacura ñehe renondeve mbosapí oyupagüer rupi: Ndaicuai vahe ité aipo mbia, erera cheu’ ihe agüer rese. Ahese osē, oyasehó iteanga oso.

Jesús serasosa Pilato rovai

27 ¹ Cōhe ramosé, ahese opacatu pahi eta rerecuar, judío rerecuar avei oñemonuha ati oyemboyoya guasu ‘Jesús tayucasa ité’ oyapave yuvireco. ² Ipare oipocua-pocua seraso mborecuar guasu Pilato upe yuvireco.

Judas yeyuca agüer

³ Judas, acoi Jesús omondo vahe yamotarēhisar uve oicua, “Jesús tayucasa cute” ehise, ahese tasí iteanga chupe. Evocoyase oso voi tēi tūparo guasuve pahi eta rerecuar yuvirecoi vahe upe iyavei judío rerecuareta upe treinta guarepochi mboyevi āgua aipo ehi:

⁴—Che ayemboangaipa tiēte vichico. Esepia, amondoño tēi mbia seco catupri vahe pēu yuca uca āgua —ehi mborerecuareta upe.

—Mara etemo ore orovireco. ¡Nde remimbotar niha! —ehiño yuvireco chupe.

⁵ Evocoyase opaño guarepochi omombó tūparo pīpe. Ichui voi oso oyemboyaseco, oyeyuca.

⁶ Pahi eta rerecuar rumo omonuhase guarepochi aipo ehi yuvireco oyeupe:

—Ndiyai rumo yamondo co guarepochi porerecosa riru pipe. Esepia, ava yucapirã repri tēi —ehi yuvireco.

⁷Ipare oyoya guasu ipihañemoñeta yuvireco co guarepochi rese ñaihu rese oporaviqui vahe ivi rerocua ãgua ‘toime ava secua ambuae vahe rehögüer tĩ ãgua’ oyapave yuvireco. ⁸Sese cūrítei co ivi upe, “Ava ruvi repri tēi” ehi yuvireco yepi. ⁹Ēgüe ehi co imboaviye ité Tūpa ñehe mombehusar Jeremías remimombehugüer aipo ehi vahe: “Oipisipa treinta guarepochi yuvireco, ahe ava Israel suindar mborerecuar remimombehugüer rupi eté evocoi mbia pisi ãgua. ¹⁰Ipipe virocua ñaihu rese oporaviqui vahe ivi yuvireco. Cheu che Yar omombehu vahecuer rupi tupri ité oyapo yuvireco” ehi Tūpa ñehe mombehusar aracahendar.

Jesús serasosa mborerecuar Pilato rovai

¹¹Jesús serasosa mborerecuar Pilato upe, ahese Pilato oporandu chupe:

—¿Nde ité vo judío rerecuar ivate catu vahe ereico? —ehi.

—Nde niha aipo, ‘Ahe ereico’ ere cheu —ehiño imboyevi Pilato upe.

¹²Evocoyase acoi pahi eta rerecuar iyavei judío rerecuareta oñemonuha vahe eipeve oiñhengapo-ngapo tēi yuvireco.

Nomboyevei eté rumo iñehe chupe oyeepe ãgua. ¹³Evocoyase:

—¿Nderesendui vo aipo co opacatu ndeu ñehe-ñehe tēisa? —ehi Pilato chupe.

¹⁴Nomboyevei eté rumo que ñepei angara ñehesa chupe viña.

“¡Too, mara ehi rutei vo co!” ehi-ehi tēi mborerecuar chupe.

“¡Tayaticasa!” ehi Jesús upe ava yuvireco

¹⁵Mborerecuar guasu recosa ité ñepei ava soquendapri renose ãgua Pascua pieta pipe ava rehii remimbotar rupi yepi. ¹⁶Aheve oime soquendapri mbia icuapri vahe ité Barrabás serer vahe; ¹⁷evocoyase ava rehii oñemonuha atise, Pilato oporandu chupe yuvireco:

—¿Uma peipota che amose ucara pēu: Barrabás pñha, anise Jesús “Poropñisrosar” ehi vahe yuvireco chupe tie? —ehi.

¹⁸Esepia, ahe oicuaño ité ava rese yemoecatēhisa pipe sui imondopri secoise.

¹⁹Pilato güendave chini viteseve, sembireco omondo oñehe chupe aipo ehi: “Ereyapoi rene mbahe evocoi ava seco catupri vahe upe. Esepia, che querve asepia mbahe tēi eté sesendar” ehi.

²⁰Evocoi pahi eta rerecuar iyavei judío rerecuareta rumo ava rehii omonguerēhi, “Barrabás tosē; Jesús evocoyase tomano” he āgua yuvireco. ²¹Evocoyase Pilato oporandu iri ava rehii upe:

—¿Uma peipota catu co ñuvirío yuvirecoi vahe sui amose vaherā pēu? —ehi.

—iBarrabás tosē! —ehi yuvireco.

²²—¿Mbahe vo evocoyase che ayapora Jesús rese chupe acoi ava, “Poropīsirosar” ehi yuvireco? —ehi.

—iTayaticasa curusu rese! —ehi ati-atiño yuvireco chupe.

²³—¿Mbahe ité vo oyapo naporai vahe? —ehi tēi ava rehii upe.

Ahe rumo:

—iTayaticasa ité curusu rese! —ehi ati-ati iriño yuvireco chupe.

²⁴Evocoyase Pilato: “Ndaicatui mbahe moingatu sepi āgua” ehi tēi oyeupe. Sese ava yaivu guasu catu-catu irise, ogüeru uca i. Ipípe oyepoi opacatu ava rehii rovaque aipo ehi:

—Ndahei che remimbotar rupi co mbia yucasara; pe remimbotar rupi eté —ehi.

²⁵—iOre rese ité, ore rahir rese avei toviapi que mbahe tēi co mbia mano sui! —ehi atiño ité yuvireco.

²⁶Ahese Pilato omose uca Barrabás; Jesús rumo oinupá iteanga uca tucumbo tupeicha nungar pípe imondo curusu rese yatica āgua.

²⁷Evocoyase mborerecuar sundao viroique Jesús ambuae oi pípe. Aheve opacatu omboetasa omboyere tupri uca sese yuvireco.

²⁸Ahese osequiipa iturucuar ichui. Ipape omonde turucuar pīra vahe yuvireco sese ²⁹iyavei omonde ñaca rese yu piapri, omondo avei ñepeí tacuarmi mbahe rese ipocosa coti ipove yuvireco. Ipape oñenopiha angahu sovai yuvireco aipo ehi:

—iImboeteipri judío rerecuar tasecoi! —ehi angahu sese oguayi tēisa pípe yuvireco.

³⁰Iyavei ondīvi-ndīvi yuvireco sese. Ipape yuvirocua-rocua ipo pendar tacuarmi pípe ñaca rese yuvireco. ³¹Ēgüe ehi yoyai catu-catu yuvireco. Ipape virocua-se turucuar pīra vahe ichui, ahese omonde iturucuar ité yuvireco sese. Ichui viraso curusu rese yatica āgua yuvireco cute.

Jesús yaticasa curusu rese

³²Acoi yuvinosese yuviraso, osepia mbia Cirene pendar, Simón serer vahe. Ahe chupe, “Erio, terevosii co curusu Jesús vireco vahe rese” ehi voiño tēi yuvireco.

³³Oyepotase yuviraso Gólgota serer vahesave, ahe ‘ava ãcagüer’ oya aipo ehi chupe, ³⁴aheve uva ricuer imboyesehapri mbahe pihaupiar rese omondo tēi yuvireco Jesús toiĥu. Osāha tēi, ndoiĥu potai rumo.

³⁵Ipare oyatica curusu rese yuvireco. Ahese sundao iguayĩño oyeupe iturucuar mboyaho-yaho ãgua rese. ³⁶Ipare aheve oguapi yuvinoi sãro. ³⁷Iyavei omombehu ivate curusu rese ñaca harive mbahe sui oyuca yuvireco: “Co Jesús judío rerecuar guasu” ehi icuachiapri oĩ.

³⁸Ñuvirío imonda rai vahe yaticasa avei curusu rese supive yuvireco, ñepe mbahe rese ipocosa coti, ambuae evocoyase mbahe rese ipocoēhisa coti yuvireco. ³⁹Acoi ava ñocuasar iñehe-ñehe tēi, oñeaca mbovava, ⁴⁰aipo ehi yuvireco chupe:

—Nde acoi, “Opara tũparo amonduru. Ipare mbosapĩ ari rupi opa irira amopuha” ere acoi cuese. iEñepĩsiro ru nde ae cute! iTũpa Rahir nde recose, egüeyi curusu sui! —ehi tēi yuvireco chupe.

⁴¹Aipo ehi avei pahi eta rerecuar, Moisés porocuita rese oporombohe vahe iyavei judío rerecuareta avei; ahe iñehe mara-mara tēi yuvireco chupe aipo ehi:

⁴²—Oipĩsiro ambuae, ahe ae rumo ndoicatuĩ oñepĩsiro. Israel rerecuar guasu secoise, itogüeyi curusu sui cūritei, ahese voi seroyasara! ⁴³Ahe oyeroya Tũpa rese, Tũpa evocoyase oipotase, toipĩsiro cūritei. Esepia, ahe, “Che Tũpa Rahir aico” ehi yandeu cuese —ehi yuvireco.

⁴⁴Imonda rai vahe avei rumo acoi yaticapri supive, ahe avei mara ehi-ehi tēi chupe.

Jesús mano agüer

⁴⁵Ahese mbiter ari pipe, opa tupri pĩtu ivi rupi. Ēgüe ehi las tres rupi. ⁴⁶Ahese tupri avei Jesús oñehe pĩrata aipo ehi: “Elí, Elí, ¿lema sabactani?” ehi, (ahe ‘che Ru Tũpa, che Ru Tũpa, ¿mahera vo che reya eve?’ oyapave aipo ehi).

⁴⁷Ava aheve yuvirecoi vahe osenduse iñehe, aipo ehi yuvireco: —Esendu co mbia, Tũpa ñehe mombehusar Elías upe oñehe —ehi yuvireco chupe.

⁴⁸Aheseve voi imboetasa oña, oso mbahe saviyu vahe reca, omoaqui vinagre pipe imondo ivira apri rese chupe ‘toiĥu’ oya.

⁴⁹Ambuae rumo aipo ehiño yuvireco:

—Ēgüe tehiño rane, ¿oura p̄ha Elías ip̄siro ãgua? —ehi yuvireco.

⁵⁰Ahese Jesús sãse p̄rata iri, omano. ⁵¹Ahe pipeve voi tũparo guasu turucuar ivate coti sui ovo tupri. Aheseve avei ivi oririi iyavei ita guasu-guasu oyeca. ⁵²Tehõgüer ruvipa ita apopri avei oyemboi yuvireco iyavei setá Tũpa reroyasar omano vahecuer, ahe avei opa ocuerayevi yuvireco. ⁵³Ēgüe ehi Jesús cuerayevire, ahe opa yuvinose tehõgüer ruvipa sui. Ipare yuviroique Jerusalén maranehi pipe. Aheve setá ava upe oyemboyecua yuvireco.

⁵⁴Evocoyase co sundao rerecuar iyavei Jesús rãrosareta, ahe oyanduse ivi ririi yuvireco iyavei ambuae mbahe ěgüe ehi vahecuer repiase, ahese oyembosiquiye guasu aipo ehi yuvireco:
—iSupi eté catu co mbia Tũpa Rahir ité secoi! —ehi tēi yuvireco.

⁵⁵Iyavei setá cuña aheve amombrive osepia catu yuvinoha, ahe acoi Galilea sui yugüeru vahecuer Jesús rupi iyavei setá rupi oip̄tivii yuvireco yepi. ⁵⁶Ahe ip̄ahuve María Magdalena secoi, iyavei ambuae María ahe Santiago, José si, Zebedeo rahir si avei supi secoi.

Jesús apocatu agüer tuvipa pipe

⁵⁷P̄itu potase, ou mbia mbahe yar José serer vahe, ahe Jesús reroyasar tecua Arimatea pendar. ⁵⁸Evocoyase ahe oso Pilato upe oporandu Jesús rehõgüer rese. Evocoyase Pilato aipo ehi: “Aviye, timondosaño chupe” ehi. ⁵⁹José evocoyase viraso sehõgüer. Ipare oimama tupri turucuar secose vahe ndiquihai vahe pipe. ⁶⁰Ichui omoingue ombahe tuvipa ipiasu vahe, ita oyoho uca vahe pipe. Ipare osovap̄i ita guasu yapayere vahe pipe oso. ⁶¹Aheve María Magdalena ambuae María rese suvipa rovai oguapi yuvinoi.

Jesús ruvipa osãro sundao yuvireco

⁶²Ahere ayihive mbituhusa ari pipe, yuviraso pahi eta rerecuar iyavei fariseo Pilato upe mbahe rese oporandu ãgua ⁶³aipo ehi yuvireco:

—Ore rerecuar, ore oroyemomahenduha acoi iporombopa serai vahe ñehe agüer rese: “Acuerayevira mbosap̄i ari pare omano vahe p̄ahu sui” ehi acoi cuese oicove v̄tese —ehi yuvireco—. ⁶⁴Sese emondo sundao sehõgüer ruvipa rãro tupri ãgua mbosap̄i ari rupi semimbohe ñomiēhi ãgua p̄itu pipe yuvireco. Aviyeteramo,

“Ocuerayevi omano vahe pãhu sui” aipo ehi tupri tēi tiētera ava upe yuvireco. Aipo ehise yuvireco, yipindar semira tēi vahe sui ivate catura serecosa —ehi yuvireco.

⁶⁵Pilato evocoyase aipo ehi chupe yuvireco:

—Aviye —ehi—. Amondora sundao pēu. Peraso, pemoviracua tupri ité sãro ãgua —ehi.

⁶⁶Evocoyase yuviraso tehögüer ruvípa rãro tupri ãgua yuvireco. Ahese omondo tehögüer rovapisa ita guasu rese mbahe imomiisa cua ãgua yuvireco. Ipare oseya aheve sundao sãro ãgua yuvireco cute.

Jesús ocuerayevi

28 ¹Cõhe ramomise, domingu pipe, María Magdalena iyavei ambuae María yuviraso tehögüer ruvípa repia yuvireco. ²Aviyeteramo tēi oriríi pĩratá ivi Tũpa rembiguai iva sui igüeyise. Ëgüe ehi oyepota tehögüer ruvípave ou, ahe virocua itape guasu sovapisa ichui. Ipare iharive oguapĩ oĩ. ³Ëgüe ehi sendí iteanga aviye acoi overa vahe. Iturucuar evocoyase morochí eté. ⁴Osepiase sundao, oriríi eteanga osiquiyepave yuvireco ichui, opa oyuca pucu-pucu tēi yuvireco. ⁵Tũpa rembiguai rumo aipo ehi voi eté cuña upe:

—Pesiquirei rene. Esepia, che aicua pe peseca Jesús yaticapirer.

⁶Ndipoi eté cohave. Esepia, ahe ocuerayevi güemimombehu rupi eté. Tapesepia ru supagüer —ehi.

Ipare aipo ehi:

⁷—Peso poyava voi, tapemombehu semimbohe eta upe:

‘Ocuerayevi omano vahe pãhu sui iyavei ahe rane osora pe renonera Galilea ve. Aheve pesepiara’ tapeye chupe. Co che cuaita imombehu ãgua pēu —ehi Tũpa rembiguai cuña upe.

⁸Evocoyase cuña yuviraso poyava voi suvípa sui, osiquiye pãhuve rumo ovihãno yuvireco; Ëgüe ehi yuvinoñá iteanga imombehu yugüeru oreu. ⁹Ahese Jesús oyemboyecua cuña upe cute omboavirave. Ahe cuña evocoyase oyemboya sese oñenopiha ipicuhaguã imboeteisave yuvireco. ¹⁰Evocoyase ahe aipo ehi chupe:

—Pesiquirei rene che sui. Pesoño, tapemombehu che reroyasareta upe. Ahe toyuviraso Galilea ve. Aheve che repiara yuvireco —ehi cuña upe.

Sundao omombehu mbahe güembiepia yuvireco

¹¹ Cuña yuviraso viteseve, ahese moviro sundao yuviroique tecua guasu Jerusalén pipe yuvireco. Ahe omombehupa pahi eta rerecuar upe opacatu mbahe osepia vahecuer yuvireco.

¹² Evocoiyase pahi rerecuareta oñemoñeta judío rerecuar rese opihañemoñeta mboyoya ãgua. Ichui omondo setá guarepochi sundao upe yuvireco, ¹³ aipo ehiño yuvireco chupe:

—Aipo peyera ava uve: “Oroque viteseve p̄itu pipe, ahese revo Jesús remimbohe yugüeru sehögüer ñomi ãgua ore sui” peyera —ehi mborerecuar yuvireco chupe—. ¹⁴ Acoi oyanduse rumo mborerecuar guasu curi, ahese opoviroya ucara chupe. Evocoiyase ndipoi chira mbahe pe rese —ehiño pahi eta rerecuar sundao upe yuvireco.

¹⁵ Evocoiyase oipisipa guarepochi yuvireco. Ipare yuviraso oyapo oyeupe imombehu agüer yuvireco. Ëgüe ehi vite cūrítei judío Jesús cuerayevisa reroyaẽhi yuvireco yepi.

Jesús omondo güemimbohe ivi yacatu rupi oñhengagüer mombehu ãgua

¹⁶ Evocoiyase ãgüe orohe oroso semimbohe once oroico vahe Jesús remimombehu ivi Galilea pendar ivitrive. ¹⁷ Acoi orosepiase rumo Jesús, ahese oromboetey oroico, yepe moviro t̄ei ore p̄ahu pendar ndoviroya tupri vitei yuvireco viña. ¹⁸ Evocoiyase ahe oyemboya ore rese aipo ehi oreu:

—T̄upa che mbou mborerecuar ivate catu vahe che reco ãgua ivave, ivive nara avei no —ehi—. ¹⁹ Peso ava upe opacatú ivi rupi iyavei pembohe che recocuer rupi eté yuvirecoi vaheerã; peñapiramo avei che Ru rer pipe, che rer pipe, Espíritu Santo rer pipe avei no. ²⁰ Iyavei pembohe che opacatu pe mbohe agüer reroya ãgua rese —ehi—. Peicuañora che aicovera pe reseve ari yacatu rupi yepi, acoi ari ipa vahe rupi —ehi Jesús oreu.

Aviye, aipo rupive.